

察哈爾省通志

宋哲元題

第七冊



察哈爾省通志卷十五

戶籍編

風俗

尚書曰。天秩有禮。自我五禮五庸哉。五禮者。謂吉凶賓軍嘉也。嘗疑禮由人類表見。何以謂之天秩。及一考夫中外禮制。中國所宜致禮者。外國亦然。此不謀而合。雖形式不同。而以精神表見之。則一也。蓋天之生人之始。卽賦以重禮之性。故能中外皆同。此非天秩而何。記曰。禮主敬。所以行禮者。致其敬也。孔子嘗曰。禮者。事之治也。有其事。必有其治。治國而無禮。譬猶瞽之無相。歟。俛俛乎其何之。譬如終夜。有求於幽室之中。非燭何見。由孔子之言而推之。自一身一家一邑一國。莫不有禮。否





則不治。不治則亂端興。古今中外一也。今之婚喪祭祀交際行於民間者。皆在古者五禮之中。而軍禮自有系統。餘則行爲風俗。未必悉合古禮。然俗亦有不可輕者。孟子追求商政。而稱其故家遺俗。周禮地官大司徒之職。施十有二教。其六曰以俗教安。則民不偷。蓋俗善則民安。而不入於偷薄也。自三代時。即重乎俗矣。今考婚喪祭祀交際之禮於風俗中。亦無不可焉。

婚嫁。爲古者五禮中之嘉禮。今察省婚嫁之禮。各縣大同小異。分別紀之有數端。曰婚齡。往時有少數縣。習爲早婚。男子有十二三歲。即爲授室娶妻者。而妻每大於夫數歲。或至十歲不等。此惡風也。近則此風漸少。此足見社會進化。日有顯徵。今男子完婚。多在十六七歲以上。或二十歲左右。女子與男



子歲略相等。曰開紅帖。即古者問名之義。俗曰議婚。即憑媒妁之言。以父母或家長之命行之。男女兩方。以紅帖開具年庚八字。以審定八字中。有無互相妨害。或妨及翁姑處。俗謂之合婚。宜則親定。不宜則否。有少數縣。以年庚八字。供於竈神前。視三日內所遇事。是否順利。卜親事之吉凶。此雖出於敬慎。然失之迷信。曰訂婚。即古者納采之義。此由審定男女八字相宜後。兩方備具龍鳳大柬。書年庚八字於上。男家用龍柬。女家用鳳柬。龍鳳者帖面所印之象也。紅帖而金印。彼此交換。而婚事告成。今則用公家制定之婚姻證書。男家用首飾相贈。女家多用鍼帶物品。或書冊筆墨相答。其禮物輕重。則以貧富爲定。或有男家父母家長。親至女家相女。果相宜。則面贈首飾爲定者。俗謂之插簪。亦有父母率其子至女家。面見女。彼此相晤而後定者。然行



此者占少數。以上俗謂之小定。曰通婚期。此男家於將完婚前一月。以結婚日通知女家。儀式係用紅箋書明。並載新人冠戴之時刻方向。及所忌之三相名稱等事。逐項書明。俾女家有所預備。曰過禮。過禮者男家致聘禮也。俗謂之大定。此事或擇吉行之於訂婚後。或行之於迎娶前一日。其禮物多係食品。富者踵實增華。以多爲貴。貧者簡焉。或有送國幣者。其數普通四十元至八十元。禮物多者。亦以紅箋開列致送。女家受禮。有陳列於庭。告祖先而後受者。有徑受者。其答男家。則僅以書領謝某某物品而已。曰迎娶。即古親迎之義。然古者男子親自御車。迎女而歸。故謂之親迎。今行者甚尠。多遣男女以車或轎。偕音樂儀仗代迎。是日男家謂之下茶。女家謂之過嫁妝。迨迎娶者至女家致禮。車轎候於門。此時新人用制定之鳳冠袍。頭覆紅巾。由



其父兄輩負之入車轎。或有以女客二人扶入者。至男家門。多有然爆竹爲迎者。遣女客扶新人出。或有新郎出至車轎前一揖。然後遣女客扶下者。或有於新人下車轎時。以錫製瓶。內盛五色糧。使新人抱之者。謂之寶瓶。然亦有置於禮堂案者。亦有以瓶中所盛糧。灑於夫婦襟者。曰拜堂。拜堂者。即男女結婚行禮之地。或在堂內。或在庭內。以高桌供天地神位。上置斗。插弓矢。並陳列刀。剪。尺。秤。鏡。箸等物。新人下車轎。由女客導入。至堂前。與新郎並行。禮贊者唱禮。行三跪九叩。或令新人立於旁。新郎獨行拜叩。或新郎行跪拜時。新人跪於旁者。或有贊禮人口唱歌。而手撒五色糧等物者。謂之下親。俟新郎禮畢。以人導入洞房。男先行。女隨之。新人自進大門。以至洞房。皆以黃布鋪路行其上。謂之履黃道。取其吉也。然亦有用紅氈者。洞房門設馬鞍一。



男女跨鞍過。取平安之義。此時新郎挾弓矢。向洞房四隅射之。或但作欲射狀。或有對新人作射狀者。或不作射狀。而以矢置於屋之四隅者。要之用弓矢。所以示男子尙武。有四方之志耳。其供刀翦尺箸。則示女人執鍼黹主中饋之義。其用秤者。取男女平衡之義。鏡則取其光明也。新人入洞房後。新郎以劍或以矢或以秤。去新人之覆巾而後出。或俟新人去鳳冠袍帶換衣後。行合卺禮。即酌酒一盃。令新郎新婦共飲。或各飲一盃。或次日行之。亦有不

行此禮者。曰參拜。此新郎新人妝飾後。先拜祖先。有祖廟者拜於廟。無則設位拜於堂。然後拜舅姑家長。以行輩爲先後。俗曰認大小。次親戚。次來賓。皆以人指導之。或行於當日。或行於次日。或謁祖廟後。即拜鄰里。亦有謁拜祖墓者。曰賀禮。此由親賓來賀。各持物品以致敬。大半以金錢或首飾。亦以交



誼深淺貧富爲重輕。主人受而宴客。且以新郎新婦拜謝之。曰回門。回門者既結婚後。女家接女與婿至其家少住。婿即以次拜其家之尊長。此多在完婚第三日。或擇雙日者。有男女同住三日歸者。或當日歸者。或婿先歸而女後歸者。至新式結婚。在察省僅有之。未風行於全省也。

此外尙有瑣事不勝紀。大要如此也。至各縣皆有鬧新房聽新房之戲。此陋習也。古以婚娶爲重禮。禮主敬。鬧新房多主褻。則不敬矣。爲禮而終不敬。背禮甚矣。至謔浪過甚。纏擾不休。有激主人之怒。以此啓釁。或因而挾嫌成訟者。反招禍矣。至寶昌縣俗。以來賓所贈錢物置禮堂。使新郎新婦爭取。得多者爲有福。又以月餅一。使新郎新婦爭裂之。亦以得多者爲有福。夫既成夫婦。爲一體。宜共甘苦。同貧富。乃結合之始。即導之以爭貨爲得意。陋孰甚哉。



以上敝俗。賴有維持風化之士君子。勸導而矯正焉。

喪葬。喪葬爲古者五禮中之凶禮。今察省之喪葬。亦大同小異。分別紀之。有數端。曰小殮。小殮者人死。易以新衣。殮其形體也。今多於臨死。氣未絕前。易之。與古者屬纊致慎之義相乖。而俗以爲不如此。則死者氣絕。而不得享衣服之用也。曰大殮。大殮者納尸於棺也。或當日。或次日。殮時。男女眷屬皆著喪服。以五服遠近親疏爲服之輕重。既歿。而合家舉哀。哭無次數。設祭供奉。如生時。即以白紙束而懸門首。俗謂之告天紙。門內立陽榜。書死者姓名。生卒年月日時。享年若干。列孝子名次於榜下。門貼白紙。門前貼恕報不周字。以示親友。按束白紙懸門首。所以招魂也。杜甫詩云。剪紙招我魂。可見唐時已有此習。今俗不知其義。傳會之曰告天紙也。曰接三。接三者死者第三日。



既訃告。親友來致弔。各送燈籠一對。喪家邀僧道奏鼓樂導前。孝子挾告天紙辭柩前。赴城隍廟。無城隍則報五道廟。以火把燈籠引路。抵廟。孝子跪地。取告天紙於神前。左右各繞三匝。出廟。高呼死者三。然後負告天紙哭而返。至家。孝眷跪迎諸門。俟孝子入。孝眷撕告天紙一角。抱於襟。呼死者。哭而入。至靈幃前。孝子置告天紙於柩上。伏地哭。孝眷以所撕紙一角焚化之。坐哭於柩旁。此皆不知其義何取也。同時於死者生前所住屋。設茶食煙酒。供養死者。如死者係女性。則另備梳洗器焉。接三前。每晚必報廟。孝子等哭而往。接三日。有以紙紮輿馬人物焚化之者。視貧富有差。曰過七。謂死者死後。每經七日。則祭而哭。七滿四十九日止。如七日適與月之七日相值。如初七十七二十七等。謂之重返七。則必加重奠祭。且有邀僧道誦經放焰口者。謂之



超度。並行家祭。親友亦有來弔者。俗以此等日爲死者之魂受苦難日也。故致祭而以僧道超度之。過此則或謀葬。或殯其柩於室。或厝於地以待葬。然亦有不待七滿而葬者。此亦視貧富不同。或死者爲年少。其上尙有長親。則葬速而禮簡。此邊省與內地相同者也。曰安葬。安葬無定期。古者天子七月葬。諸侯五月。大夫三月。士逾月。而庶民無定。或不逾月。然孔子少孤。父死而殯於五父之衢。及母死。乃合葬於防。前人有辨。是殯可以長久。古無限期也。殯亦得埋於土。但殯淺而葬深。此前人說也。今之安葬。俗曰出殯。蓋啓殯也。先期訃於親友。葬之前一二日開弔。或有在當日者。親友贈以紙錢。錫箔。香蠟。酒席。以致奠。及輓聯。輓幛。誄文。金錢不等。視親疏遠近交誼淺深。亦有不同。亦以貧富繁簡有別。喪家或延僧道奏鼓樂。誦經放焰口。宴賓客。行家祭禮。曰



成主。成主者將葬而成木主。留於家。備奉祀。或延名望品位素重者爲點主。官謂之大賓。以儻相數人佐之。禮極隆重。與內地同。此多行於富家。貧者則簡。或不行。曰下葬。葬日舉柩。多以槨抬。上覆罩。或用三十二人。或二十四人。舉之。柩重而家富者。用槨夫多。不限於三十二人也。柩前繫白布。孝子魚貫牽引。長子或承重者。負引魂幡。哭而行。導以鼓樂僧道儀仗。沿路鳴礮。親友步行相送。孝眷乘車轎。哭而隨。有設路祭者。暫停柩於路。孝子伏地謝。路遠則中途焚紙紮。賓客僧道鼓樂。隨神主而返於喪家。候行安主禮。或孝子至塋迎柩先返。行安主禮。或以他孝子先返而行之。或葬而後行之。或點主畢。即行安主禮。大賓儻相親友詣神主前行禮。謂之榮主。亦有不同。其葬而後行安主禮者。即古者虞祭之遺意。俗謂之安主耳。虞祭不哭。既葬。堆餘土於



窆地。三日後。孝子等赴墓。手培之。謂之圓墳。而喪事畢。其大要如此。他瑣事各不同。不備紀。要其俗尚厚葬。自初喪至殯。至葬。親友致弔時。孝子皆哭於柩旁。以致哀。猶有古者喪致其哀之義。既葬。百日不出門。不剃髮。三年不從仕。今則減輕焉。

祭祀。祭祀亦古者五禮中之吉禮。於風俗中言之。察省各縣相習者。大別有

二。曰祭祖先。曰祭諸神。祖先之祭。除喪制外。爲其祖先或父母生日。死日。

即忌

日舉行。其祭也。多以食品果品。焚香奠酒行之。此外則按時節致祭。或掃墓行之。亦以貧富分豐嗇。與繁簡。祭諸神。如除夕。元旦。元宵。端午。中秋。重陽。夏歷十二月二十三祭竈。以及各神之聖誕。皆於神前設祭。然物品少。祇略爲供饌。焚香叩首而已。此出於遠年之相習。不盡有義可取也。



習慣。風俗由古禮相衍。及人民習慣而成。然有出於性情者。有出於歲時者。其出於性情者。以歷代史書所載。或先民著述所稱。見於各縣志書者。擇要紀之。以見梗概。

出於性情者

史記貨殖傳。上谷地踔遠。人民稀。大與趙代俗相似。又曰。人民矜懃。好氣任俠。不事農商。魏書。上谷廣寧南北。人民錯居。風俗淳厚。近列郊坻。可資以守。隋書。地理志。涿郡雁門上谷等郡。習尚與太原同俗。故自古言勇俠者。皆推幽并。然亦多文雅之士。宋夏竦曰。山後諸州人。性勁悍。嫻於戎馬。純上氣節。可以義動。元上都志。習尚樸茂。人好禮義。元耶律楚材曰。山後人質樸。緩急可用。又曰。文武士率持重。不肯毀名節。又曰。文士自待



甚高。不輕下人。不伸其說不止。元劉因曰。宣德習尚樸茂。人好禮義。傅  
懷麟明書方域志曰。萬全人驚悍。不憚戰陣。喜立功業。勤儉力穡。無浮末之  
習。明一統志。人性驍悍。不憚戰陣。服食儉嗇。勤力耕藝。宣鎮志。西路氣  
岸相高。不尙含容。喜則傾心。怒則思鬥。懷安縣志。土著之人。習於禮閑。不  
慣遠商。農家邨居。情甚親睦。有無相通。老少相愛。耕穫以力相助。有上世遺  
風。直隸風土調查錄曰。宣化地瘠民貧。風俗樸素。人民多務農業。營工商  
業者少。

出於歲時者

正月元旦。夜半起。放爆竹。設庭燎。酒醴牲饌。禮神祀祖先。親友互相拜賀。天  
未明。不得啓箱櫃。謂啓之招鼠耗。初四日晚。掃室中臥席下土。室女翦紙。



縛糶作婦人狀。手握小帚。肩負紙袋。內盛餽糧。置箕內。曰掃晴娘。俗謂之五窮娘。味爽有沿門呼則啓門送出之。人拾得則焚灰於播種時。和籽內。謂可免鳥雀彈食。或逢淫雨。懸之簷端。謂可掃翳祈晴。上元張燈三夜。演戲祭

三官神。有燈廠。插秫糶小把。置燈於上。作九街十八巷形。宛轉貫串入者。往往迷焉。婦女剖尺長之秫糶爲二。中作數小孔。置大豆。縛緊浸水缸。一晝

夜啓而驗豆之乾濕。卜一歲旱澇焉。初八夜。用小磁燈十二盞祭星。遇閏則加

一盞。二十日名小添倉。二十五日名老添倉。人家以各物增其所積。婦女自

元日忌鍼齋。至此各勤所事。親戚之酬酢流連者。各歸其家。二月二日。謂

之龍抬頭日。以近驚蟄也。各家晨起汲井華水。有祓禊之意。三月三日。折

柳枝插門。謂可避蛇蝎。清明節。人家上墓祭掃。增培塚土。先一日。城隍神



出城監祭厲壇。夜回時，人家有新喪者，婦女於門外哭奠，蓋沿明時兵燹之遺俗耳。中元初冬同。四月十八日，多爲泰山廟會。五月五日，飲雄黃藥酒，作角黍，相餽遺。婦女戴艾符艾虎，門上貼各式艾符。孩童繫長命縷。六月六日，人家曝衣曬書。七月七日，婦女穿鍼乞巧，市上蒸賣麵人，與孩童分食，謂遇凶年，不至人相食，以此厭之。中秋，以月餅瓜果相餽遺，月上供月，獻瓜果，聚飲賞月。重陽，登高飲菊酒，蒸黍米糕。十月朔，城隍神主祭回，婦女門外哭奠，焚各色箋紙，謂之送寒衣。冬至拜節，或以羊酒相餽遺，謂之肥冬，昔之學校重此。十二月八日，人家作臘八粥，互相餽遺，僧家尤重之。是日，鑿冰河內，以備年終裝饌之用，官役亦是日鑿冰入窖。二十三日，以黍米糖祭竈，又爲交年，掃除舍宇，自是日至除日，民間乘時嫁娶，又於數



日內。作糜黍饌。饌入缸。雜冰封之。以供度歲之用。又多備米飯。謂之隔年飯。至明正初八日。方炊新米。除夕。祀祖先各神。長幼跪拜辭歲。或坐以待旦。謂之守歲。好事者。俟夜靜。禱於竈神。抱鏡出聽人語。以下一歲吉凶。歲前互相餽遺。謂之餽歲。換桃符門神。以符萬象更新之意。歲值旱。人戴柳枝。用幡幢笙鼓迎龍神像。置壇場祈禱。得雨乃止。菽麥禾稻熟。作食饋親友。納稼畢。又釀酒設席。待親友之來勞者。曰慶場。歲春秋。祈報里社。則長者歛資。少者趨事。備牲醴祀神。召優人作戲劇。家邀親友來觀。以爲樂。

衣服。平民春夏及秋。無論單袷棉衣。多用棉織大布。純屬國產。其色男尙青。白藍。女喜紅綠紫。衣多短裝。褲均紮腿。喜窄不喜寬。冬時。氣候寒。皮革又較便。凡中資之家。均着皮裘。惟粗細不等耳。粗者至無布面。即以原白皮作面。



極貧之戶。則仍大布棉衣。在城市方面。平時多服線呢洋布。著長袍。然普通能常服絨呢綢緞者。仍占少數。惟在外遊學諸生。半屬中產以上之家。交際既廣。處境亦異。所著衣裝。較華好。男有洋裝革履。女多翦髮旗袍。鄉人視之。此則爲一縣一市之特殊階級。未可以普通人視之也。農民多以巾罩頭。夏則冠草帽。冬以氈帽皮帽爲主。工商士子。與他處略同。婦女終年不冠。農忙工作。罩以藍布巾。老嫗之頭。四季常著。富者或戴以縐帕。然非婚喪年節。不肯輕用。近來著用洋襪者漸多。但僅限於終年在外之少數學子。或商工等人。普通農家。不輕購用也。

飲食。本省飯食。農家多一日三餐。舊宣屬以小米爲大宗。莜麥麪次之。黍米又次之。口外則以莜麥麪爲大宗。小米次之。其能常食白麪大米者。殆不多。



靚。小米黍米。均產自本地。莜麥小麥。惟口外各縣有之。食法。小米多蒸乾飯。或稀粥。黍米以麩作糕。或用油炸。莜麩作法。先將莜麥炒熟。磨成細麩。仍須開水和好。搓成圓形麩條。或作片捲。蒸於籠。另調菜蔬。或蒸肉黃醬拌食。此宜屬較豐之縣爲然。口外各縣無菜蔬。但調鹽水拌食之。至於食蔬之縣。以馬鈴薯。白菜。豆腐。菠菜。韭菜。爲普通。鄉下或以黃豆搗麩點漿作熟。不另去滓。俗謂之懶豆腐。再和以馬鈴薯。雜鹹白菜。共融一鍋。此爲尋常待遇。工人最普通之飯菜。至豬羊牛肉。必住城市方面方能享用。且須富裕之家。日常動用。至於魚蝦。則有終身不知味者。飲料。大多數取之井。亦有山岡村落泉井俱無者。夏用雨後潦水。冬則鑿冰化雪。或赴鄰村馱水。此等地方亦多有之。城鎮人民。多每日兩餐。一米一麩。有小麥麩。莜麩。蕎麩。豆麩。各



種而食菽麩之時爲多。他類較少。米如小米、黍、糯、稻米各種。而食小米之時爲多。他類較少。客至或遇時節則稍豐。蓋儉嗇之風無間城鄉也。除穀類蔬菜外尚有雜食。如糗米糕、豆粉條之屬。以供小餐。至鷄鴨魚豚則非大宴不辦。至於歲時令節則各有一種食物。例如元月十五之元宵。三月三日之壽桃。五月端午之糉子。六月六日之羊肉。八月十五之月餅等。則在北方各省。幾於一道同風也。

居住。察省人民居住。大抵舊宣屬各縣略相同。口外各縣略相同。即一多甄造。一多土造也。甄造者或謂之瓦房。四壁包以甄。頂起脊。而覆以瓦。故曰民房。規模以北爲主房。東西爲廂房。南則北向。謂之倒房。此即四合式。若宅在街之路南。則有以南爲主房者。亦取四合式。庭院中有鋪甄者。有甄土雜鋪



者。有仍用土者。屋內地。或鋪氈。或鋪木。或仍用土。要以貧富爲分。眠不用牀。而砌炕。以北方氣寒。炕用火燒。易取煖也。尋常竈。即在住屋之內。亦爲煖耳。富者或建樓房。然甚少。要之瓦房在城市多。而鄉村少。城市亦有土房。土房之構造。要分二種。一爲頂起脊。如瓦房而漫其頂以草泥。一爲平房。頂皆草泥。不拘四合式。亦多取南向。避北風也。較土房略精潔。而次於瓦房者。爲灰房。牆壁屋頂。皆以石灰泥之。或石灰與土相和泥之。其眠處。仍用炕。次於土房則窰房。卽因山鑿進而居也。古所謂陶穴者近似。此房不論方向。但因山而成。然在少數。至同一土房也。口外各縣。又陋於口北各縣。其地少木料。而北風勁。故房多低而簡略。不但鄉間少氈房。卽城內亦不多見。此可以知塞民之貧苦。所恃戶口少而土地多。收糧較內地易。飲食不至大困耳。



行走。衣食往行四者爲人民所必需。察省於此大端。已見交通節內。此則略紀其行具。如行長途。除火車汽車外。則有轎車。有帷有簾。冬夏皆便。有以此載旅客爲業者。又有所謂大車。多用以載物。亦可乘載。以騾馬曳之。或三套或四套。車既大而堅固。多出於富家。其次則爲牛車。此車較小而簡樸。以牛曳之。載重四五百斤。人亦可乘坐。其次則騎馬。富者鞍韉鞭轡皆具。或飾以華美。貧者或並鞍而無之。然塞民多能騎馬。其次則爲驢。價廉而食量小。最便貧民。亦可馱物。或曳車磨。或曳犁耬。以種田。莫便於此。此外則爲駱駝。體大而任重。然價貴。貧者不能購用。或專用以馱貨。有時人乘之。每夏脫毛。則須休養三個月方能用。此亦不便耳。其餘察省雖有河道。以地高水急。不便行舟。故人民行遠。於此缺焉。



交際。邊地人民樸直而少詐。通有無。共甘苦。守望相助。疾病相扶持。排難解紛。於橋梁堡塞。肯出資力以趨公益。皆有古風。慶弔雖不尙華美。而情誼厚。爭訟少。而尙信用。此皆風俗之美者。

娛樂。古者化民以禮樂。禮主敬。樂主和。和者所以謀娛樂也。詩曰。鼓瑟鼓琴。以宴樂嘉賓之心。又曰。式歌且舞。則皆謀娛樂之道。惟樂而不淫。乃爲正則。今之社會學者。每以一民族娛樂程度之高下。測知其文野之淺深。但能與民同樂。則風俗和平。故孟子以今之樂猶古之樂。邊地人民共同娛樂之機會甚少。惟元宵張燈。則有種種戲裝。爲高躋秧歌。爲一年中最樂之舉。其他節候。但得美食。以酬稼穡劬勞而已。此外則廟會演劇。然不多有。若省垣張家口。常時有劇園。然道遠者不得與聞也。此外有散班戲。與民家戲。散班戲。



以營業獲利爲主。周流全省。臨時架台演之。或三日。或四日。期滿。又移於他處。民衆戲。或謂之子弟班。每歲冬季農暇時。延聘能戲者爲之師。於本鄉中招人學習。不收費。演時。亦不取資。但謀公共娛樂而已。其演期多在歲正月間。謂之社夥。亦不妨農事也。雖各縣習尙不同。大致近似此類。

集市。集市爲古者日中爲市。交易而退之遺義。各縣城鎮集市。每於月之三六九等日爲定期。俗謂之趕集。百貨集於一處。需要與供給者皆便。且畫地分類。如某地段爲某市場。予購者以種種便利。此善良風俗也。

廟會。廟會百貨自遠而至。湊於一處。又大於集市。或有酬神演戲之舉。雖不免有迷信之譏。然足以繁榮市面。便民需。各縣有廟會者。大約以四五月。三月中爲最多。且夏歷四月十八日。各地多有廟會。因此有種種娛樂場。平



時民間需用物品。憚於遠途購求。皆待廟會取辦。尤便於小本營生。惟自戰事頻生。農村破產。購買力弱。頓呈蕭索。有不能舉行者。此宜力謀恢復者也。

### 人物

察雖邊省。人物可稱者甚夥。惜因特別情形。不能廣爲採集。詳加釐定。致潛德幽光。英賢盛軌。無由徧著。實引爲內咎。深望後之君子。有以補正焉。則邊省之幸。卽余良心上可稍減譴責也。然僅觀乎此。亦足以覘地雖偏僻。而人物之盛美。視內地無與讓。何地無才。何時無才。詩所謂民之秉彝。好是懿德者。固不因古今內外而有間也。若夫秉筆而忝操一省志乘之權。所關於當時與後世者甚鉅。固應心地光明。從事勤慎。以求允公。有所不足。不敢不勉。如此而已。彼人之無良。敢於自欺欺人。



苟且圖一時之便者。則固不足以語此。然歷代自愛之君子。莫不於茲

致凜凜焉。

總纂梁  
建章誌

鄉賢

萬全縣鄉賢

石抹明安。桓州人。性厚寬。不拘小節。爲童子時。嘗騎杖爲馬。令羣兒前導。行列整肅。無敢喧嘩者。父老見而異之。旣長。歎曰。士生於世。當立功名。書竹帛。以傳無窮。寧肯碌碌無聞。與草木同腐邪。歲壬申。太祖率師攻破金之撫州。將遂南向。金主命招討紇石烈九斤來援。時明安在其麾下。臨陣策馬來降。帝命領蒙古軍。撫定雲中東西兩路。旣而帝欲休兵於北。明安諫曰。金有天下一十七路。今我所得。惟雲中東西兩路而已。若置不問。待彼成謀。併力而



來。則難敵矣。且山前民庶久不知兵。今以重兵臨之。傳檄可定。兵貴神速。豈宜猶豫。帝從之。即命明安引兵南進。所至民皆箠食壺漿以迎。盡有河北諸郡而還。帝復命明安即三合拔都將兵。由古北口徇景蕪檀順諸州。諸將議欲屠之。明安奏曰。此輩當死。今若生之。則彼之未附者。皆聞風而至矣。帝從之。乙亥春正月。取道州進。至永清。獲其御史中丞李英。得糧千餘車。遂招諭永清不降。拔而屠之。未幾金將完顏合住監軍。阿興鬆哥復以步兵萬二千人。糧車五百輛。援中都。明安復將三千騎往擊之。遇於涿州。宣封寨。獲鬆哥。合住遁去。盡得其輜重。四月。攻萬寧宮。克之。取富昌豐宜二關。攻拔固安縣。初。順州之破。兵士縛密雲主簿完顏壽孫以獻。明安釋而用之。不久逸去。復來。問其故。對曰。有老父在城中。恐不能存。謀歸。欲得侍養。今已歿。故復來。明



安義而釋之。五月，明安將攻中都。金相完顏復興欲藥死。城中官屬父老，緇素開門請降。明安悉諭令安業，仍以粟賑之。衆皆感悅。明安早從軍旅，料敵制勝，算無遺策。雖祁寒盛暑，未嘗不與士卒均勞逸，同甘苦。其得金府庫珠玉錦綺，明安悉具其數上進。未嘗以纖毫爲己有。中都既下，加太傅、邵國公。

兼管蒙古漢軍兵馬都元帥。丙子，以疾卒於燕城。

金史本傳

李蘭，奚雍吉烈氏。世居應昌。祖忙哥，以后族備太祖宿衛。父律實，魁偉有謀。從睿宗伐金有功。李蘭，奚英邁有父風。幼孤，刻厲如成人。暇日習弓馬，夜則讀書。其母嘗訓之曰：汝父忠勇絕人，天不假年，汝能自立，則汝父歿無憾矣。李蘭奚由是感激，期以成父之志。從軍有功，襲父官。世祖親征，乃顏兵始交，李蘭躍馬陷陣，所向披靡。世祖遙望壯之，勞之曰：無忝汝父矣。授宣威將軍。



信州路達魯花赤。時江南初附。布宣上意。與民更始。期年。郡中大治。部使者以聞。帝獎歎久之。卽遣使賜以上尊。俄以疾卒。追封范陽郡侯。

元史本傳

侯大節。萬全右衛人。天啓三年。由武舉任李信屯操守。再任新河口守備。勇略過人。禦敵有方。以功加都司。堡民賴之。立祠祀焉。歷陞陝西固原副總兵。賀瑤光。號隱菴。爲衛諸生。有名於時。性骨鯁。居鄉時。以登長吏之庭爲辱。崇禎中。由拔貢生銓授山西馬邑縣知縣。精察廉幹。吏胥不敢售其奸。後以忤巡撫。被劾落職。就訊時。懷安張翰林士範。故瑤光戚也。讞獄者與有舊。因欲庇瑤光。庭訊時。問曰。若與張某親乎。曰。否。讞獄者怒。擊之獄。張聞。亟函書白出之。人具以告。瑤光夷然曰。彼知我無罪耳。我豈乞憐於人。以求苟免者耶。迨歸。竟不往謝。家居杜門謝客。惟以經史自娛。素諳天文家言。嘗夜觀乾象。



見彗星出。決其所臨分野。當有兵兇。後其言竟驗。子巍功。順治甲午舉人。任湖廣新田縣知縣。

李質。萬全右衛人。崇禎十三年。任北路雲州守備。寇屢犯邊。質力戰卻之。蒐軍簡士。境賴以安。民立祠祀之。今尙存。

羅綸。字大經。居家以孝友稱。髫年補本衛博士弟子員。由歲貢。選授密雲教諭。課士有法。見聖廟頽圯。詳請修葺。煥然改觀。地方人士健訟。綸以禮義開諭。終其任無違犯告訐者。大計卓異。薦陞雲南元謀縣知縣。甫蒞任。見田邑荒蕪。民戶流散。請于上官。給牛種。招墾植。間歲遂有起色。逆藩莊產。奉檄變價。端緒紛紜。綸悉心勾稽。並請減價召買。民樂其不擾。咸爭趨焉。尋陞奉天督糧通判。政務多與旗莊交涉。在事者率皆翫敲。綸方直精廉。豪強斂跡。無



虧職守。秩滿。遷戶部湖廣司員外郎。轉本部江南司郎中。康熙三十六年。例陞雲南永昌府知府。在任八年。正己率人。惠愛周聞。百廢俱舉。士民勒石尸祝。竟以勞瘁卒於官。歿之日。閭閻罷市巷哭。立祠以誌愛焉。

羅得彥。字虞門。號敬齋。雲南永昌府知府羅綸子。彥少倜儻。循例廣東潮州府通判。瀕海有叛案。既獲賊首。及同黨八十三人。應獻俘。餘黨揚言。將於道劫之。州守知彥有膽力。令督解。訖以無事。比至都。召見。叙功。授江西袁州府捕盜同知。引憂。改授雲南蒙化廳。蒙化故彝地。俗荒陋。彥起學宮。化獠狃。雍正丁未。相國鄂文端公。總制西南。首薦之。擢鶴慶府知府。時天戈西指。羽書旁午。彥總治餉運。人不擾而事濟。凱奏以功。兼署麗江府事。旋調東川。東川新附於滇。連亘蜀境。密箐叢錯。猾彝出沒。彥到官。招集流亡。噉鴻安輯。無何。



烏蒙蠢動。陷昭通鄰郡。劫殺官吏。彥聞警。經畫戰守。慮東川彝與賊合。召其酋賜酒食。曉以大義。彝皆感激。終無一人從逆者。時以東川土城難恃。人心皇然。彥選城中健丁。具版鍤。授械器。且築且守。賊大至。圍譟彌月。彥出奇募敢死士。夜斫賊營。會官軍援至。夾擊賊。悉遁。功爲諸守最。以與上官忤。挂彈章。旋得白。應還職。而彥以積勞盡瘁。決意歸休。去之日。琴鶴蕭然。庶黎攀轅臥轍。夾道數十里泣送。歸卒。年六十有三。

羅繼先。字衍源。雲南東川守得彥孫。父瑣齡。州丞。早卒。以孫本立官。贈中憲大夫。繼先少曠達。讀書通曉大意。事懋遷。輒致千金。旋散去。曰。此不足盡吾能也。適婚戚有爲海寧監司者。屬主會計。先是海寧鎮海關。歲額鉅萬。厲禁甚嚴。商販疑沮。額嘗缺。繼先與監司約。弛去一切苛政。與之更始。商人大悅。



繞道而至者。歲數千艘。額大足。凡五六年。以祖母老病歸。監司出萬金爲治裝。辭不受。監司曰。此特贏餘之半耳。非公無所得。何多讓。乃受。及歸。賙恤親族無不至。間携酒榼。偕故舊。遊名勝。以自娛。不數年。萬金盡。復往來營買燕雲平朔間。遇舅馮氏郁。以黔宰報最。擢貞豐牧。貞豐故瘠土。惟產水銀。歲賴外資以辦公。時廠敗工散。屬繼先經理。廠旺。例有抽分。數年間。本廠復大旺。繼先曰。此可以有爲矣。迺修道路。成橋梁。設鄉塾。資醫藥。捐棉衣。施棺木。復散去數十萬。戊申歲大饑。流亡鳩集。爲設粥廠。男女存活者無算。嘉慶二年春。狃苗蠢動。圍貞豐。繼先思集義勇以應。繼而道塞不果。及賊焚燒。漸逼廠地。繼先曰。是不可留。亟衛男女數千至花江。先集者已萬餘人。叫囂號泣。舟人不爲渡。賊衆且至。繼先謂舟子曰。若不過多索錢耳。遂解囊付之。乃得共



濟時人衆船小。爭舟至不可禁。繼先曉之曰。若無慮不濟。俟汝曹盡濟。吾乃濟。譁始止。凡三晝夜。以次渡。全活者二萬餘人。歲八月。貞豐平。復詣州廠。沿途積骸暴露。墳墓發掘者。悉掩蓋之。是時廠民盡歸。歸而無食。繼先爲煮粥以濟。又以工代賑。已未。廠復大旺如舊。因籌歸計。行有日而疾甚。謂其僕曰。吾之不得歸命也。異日骸骨返故里。魂魄猶戀此。復可恨。遂卒。明年子本立扶襯歸。千百里內外。識與不識。咸爲之出涕云。

楊濟字巨卿。張家口人。幼而穎異。讀書一覽即成誦。方十歲。作詩見志。父師甚異之。年十六入泮。試輒冠軍。未弱冠。鄉薦獲雋。益肆力於學。博極羣書。於易理尤邃。爲文力厚思沉。浸淫而及於古。居家孝友。兄弟無間言。父明經伯仲。常以濟之恂恂。誇示鄉里。嘉慶戊辰。赴禮闈。後大挑一等。擢知縣。以父年



近八旬。告終養。壬申服闋。赴闕試用。攝篆大田。案有累任未結者。悉結之。縣故多訟棍。意濟初入宦途。未諳吏治。各欲逞其伎倆。及聞風。皆屏息焉。濟在任僅四十日。措置井井。卓然有古人風。解任之日。被澤者無計挽留。臥轍攀轅。不絕於道。所過鄉村。皆跪拜稱神君。至有泣下者。濟至省。因不合於大吏。遂稱疾旋里。後就教職。任元氏訓導。元氏爲正定僻邑。士不登鄉薦者。十九年矣。濟泣學二年。已卯即中式。二人皆其門下生。其後每科不絕。元氏積習。素尙氣矜。因錢糧事。合學公呈。幾成大獄。濟出而譬喻之。事遂寢。邑中有義學一。每年租穀二十餘石。爲教讀修脯。向係副學管理。遂侵蝕之。濟廉得實。即延邑中品學廉優者。司其事。

劉廷棟。字景山。邑庠生。本生父夢熊。嗣父夢瑞。早世。嗣母郭氏孀居。廷棟事



之。能得歡心。即姊妹姪女。出嫁來歸。亦不許言夫家是非長短。待子姪輩。不尙嚴厲。而皆凜然循規矩。家庭間。恒靜肅。不聞語聲。性直好義。言不輕發。尤惡巫覡邪說。有言及。必正色直辭。開示之。生產本不裕。族黨鄰姻。以急難告者。無不量爲之助。平生果於爲善。公慎自矢。其經修縣治。西北隅關帝廟。事半功倍。備載廟碑。亦足見其概矣。親族中有爲不善者。恐爲所知。鄉里多敬憚之。卒年六十有四。子奕翰。庠生。恩賜八品頂戴。

李英俊。舊城人。字步瀛。附貢生。性誠篤。善文學。勇於任事。有通節。應變才。嘗偕賈文齡。任書院董事。凡地方公益事務。多賴擘助。適楊暹中翰。補山東惠民縣缺。被聘偕往。主政數年。頗著政績。當時有賢主嘉賓之譽。及楊交卸。李歸里。復任書院董事。因擴充書院。洋河地畝。經營阜陵壩。爲生童膏火資。致



爲清王府莊頭所忌。涉訟經年。李親詣省垣。訴之制軍。乃得直。萬全書院。得享阜陵壩地租利。多賴其力也。至今縣立第一高小學校。猶利賴焉。卒於光緒二十一年。壽七十二歲。

許泌。南區周家河人。字璞玉。邑庠生。性慷慨。好施與。堡西原有沙河水渠一道。年久淤塞。無人修理。嗣因連年荒旱。村人多議濬治。以資灌溉。泌慨然贊助。輸制錢三百餘千。疏通開鑿。完其功。至今闔堡受其惠。在村設帳授徒。遇貧家子弟。不受修金。故貧乏者。亦得求學於此。卒於光緒三十年。壽六十九。其後裔頗稱繁庶云。

羅毓芬。舊城人。字挹清。號誦含。性謹學純。篤於孝友。善詩詞。工書楷。五品銜。附貢生。早遇多艱。弱冠失恃。侍親撫弟。克盡厥職。服闋入泮。文名著一鄉。時



帥君松齡主講萬全書院。獎許尤甚。以親老多病。頻年躬侍醫藥。未得致力於學。父歿。哀毀逾恒。撫八齡庶弟。治家嚴而有法。悉本朱柏廬先生格言。兄弟友恭。家族和睦。凡親友中有告貸者。不責償。亦不示諸子孫。往往有還多年舊債者。子孫請示。始告顛末。忠厚聞於鄉。光緒十八年。關北大饑。縣尤甚。羅聯絡諸紳。請辦賑捐以濟之。二年。活人無算。嗣舉爲萬全書院董事。純以育才崇德爲職志。二十二年。舊城水浸河壩。城垣瀕於危。又兼充壩工董事。分擔督工核款之責。不辭勞瘁。清政維新。遣子姪肄業於津保各校。宣統間。編修鄉土志。民國元年。爲女校教員。女子教育。賴以振興。於十五年卒。壽七十有五。

蔚縣鄉賢



馮唐。祖父趙人也。父徙代。漢興徙安陵。唐以孝著。爲郎中署長。事文帝。帝輦過。問唐曰。父老何自爲郎。家安在。俱以實言。文帝曰。吾居代時。吾尙食監高祛。數爲我言趙將李齊之賢。戰於鉅鹿下。吾每飲食。意未嘗不在鉅鹿也。父老知之乎。唐對曰。齊尙不如廉頗李牧之爲將也。上曰。何已。唐曰。臣大父在趙時。爲官帥將。善李牧。臣父故爲代相。善李齊。知其爲人也。上旣聞廉頗李牧之爲人良說。迺拊髀曰。嗟乎。吾獨不得廉頗李牧爲將。豈憂匈奴哉。唐曰。主臣。陛下雖有廉頗李牧。不能用也。上怒起入禁中。良久召唐讓曰。公衆辱我。獨亾閒處乎。唐謝曰。鄙人不知忌諱。當是時。匈奴新大入朝。那殺北地都尉卬。上以胡寇爲意。迺卒復問唐曰。公何以言吾不能用頗牧也。唐對曰。臣聞上古王者遣將也。跪而推轂曰。闡以內。寡人制之。闡以外。將軍制之。軍功



爵賞皆決於外。歸而奏之。此非空言也。臣大父言李牧之爲趙將。居邊軍市之租。皆自用饗士。賞賜決於外。不從中覆也。委任而責成功。故李牧迺得盡其能。選車千三百乘。設騎萬三千匹。百金之士十萬。是以北逐單于。破東胡。滅澹林。西抑疆秦。南支韓魏。當是時。趙幾霸。後會趙王遷立。其母倡也。用郭開讒而誅李牧。令顏聚代之。是以爲秦所滅。今臣竊聞魏尙爲雲中守。軍市租盡以給士卒。出私養錢。五日壹殺牛。以饗賓客軍吏舍人。是以匈奴遠避。不近雲中之塞。虜嘗一入。尙帥車騎擊之。所殺甚衆。夫士卒盡家人子。起田中從軍。安知尺籍五符。終日力戰。斬首捕虜。上功莫府。一言不相應。文吏以法繩之。其賞不行。吏奉法必用。愚以爲陛下法太明。賞太輕。罰太重。且雲中守尙。坐上功首虜差六級。陛下下之吏。削其爵。罰作之。繇此言之。陛下雖得



李牧不能用也。臣誠愚觸忌諱死罪。文帝說。是日令唐持節赦魏尙。復以爲雲中守。而拜唐爲車騎都尉。主中尉。及郡國車士。十年。景帝立。以唐爲楚相。武帝即位。求賢良。舉唐。唐時年九十餘。不能爲官。迺以子遂爲郎。遂字王孫。亦奇士。

馬芳。字德馨。蔚州人。周尙文鎮大同。奇之。署爲隊長。數禦寇有功。當得官。以家貧。僅受賞以養父。嘉靖二十九年秋。寇犯懷柔順義。芳馳斬其將。授陽和衛總旗。寇嘗入威遠。伏驍騎鹽場。而以二十騎挑戰。芳知其詐。用百騎薄伏所。三分其軍銳。以次擊之。奮勇跳盪。敵騎辟易十里。斬首凡九十級。復禦之新平。寇營野馬川。尅日戰。芳度寇且遁。急乘之。斬擊益多。衆方駕。芳策馬曰。賊至矣。趣守險。而身斷後。頃之。寇果麕至。戰益力。寇乃去。又戰泥河。大破之。



屢功進左都督。賜蟒服。偏裨加都督。自芳始。二十六年。遷薊鎮總兵。分守建昌。土蠻十萬騎。薄界嶺口。芳與總兵官歐陽安斬首數十。獲驍騎猛克兔等六人。寇不知芳在。芳免胄示之。驚曰。馬太師也。遂遁。辛愛把都兒大入。芳追擊之。尋移守宣府。寇大入山西。芳一日夜馳五百里及之。七戰皆捷。四十五年七月。辛愛以十萬騎入西路。芳迎之馬蓮堡。堡圯。衆請塞之。不可。請登臺。亦不可。開堡四門。偃旗。寂若無人。比暮野燒燭天。鷄呼達旦。芳臥日中不起。窺者相屬。莫測所爲。明日芳蹶然起。乘城指示衆曰。彼軍多反顧。且走。勒兵追擊。大破之。隆慶初。或爲辛愛謀。以五萬騎寇蔚州。誘芳出。而以五萬騎襲宣府。可得志。芳豫伐木環城。寇至不可上。遂解去。頃之。率參將劉澤等出獨石塞外二百里。襲其帳于長水海。還至塞。追者及鞍子山。迎戰。又大敗之。芳



有膽智。諳戰守。所至先士卒。一歲數出師。搗巢。或躬督戰。或遣裨將。家蓄健兒。得其死力。嘗命三十人出塞四百里。多所斬獲。寇大震。芳乃帥師至大松林。頓舊輿和衛。登高四望。耀兵而還。後芳復移鎮大同。又鎮宣府。以病乞歸。又二年卒。芳起行伍。十餘年爲大帥。大小百十戰。身被十餘創。以少擊衆。未嘗不大捷。擒部長數十人。斬馘無算。名震邊陲。爲一時名將冠。二子棟。林。棟

官至都督。林有傳。

明史本傳。蔚州志。棟字慎齋。由指揮同知。歷寧武。蔚鎮總兵。嫻韜略。多文雅。工徑尺大書。

尹耕。字子莘。少穎異。七歲能屬文。讀書日數行下。日誦千餘言。不忘。嘉靖辛卯。年十七。舉於鄉。明年成進士。授藁城知縣。入爲禮部儀制司主事。遷員外郎。出爲河間知府。自負經濟才。而偃蹇常調。不獲大展於時。每懷憤懣。又數以言事觸忤權貴。故所至多齟齬。既罷官。築九宮山房。讀書其中。遇地方利



害。輒身爲擘畫。不以退廢自解。著鄉約塞語各一卷。及兩鎮三關志。言邊事甚悉。又著有九宮私記。朔野集。皆自成一家言。舊志。

馬棟。字慎齋。由指揮同知。守備蔚州。累官甯武總兵。調薊鎮三屯營總兵。棟故世將家。素嫻韜略。尤能澤以爾雅。與弟都督林。並以大將馳文壇。無愧色。今蔚祠廟寺觀。經尺大字。林所書。棟所題也。舊志。

郝杰。字彥輔。蔚州人。父名御史。杰舉嘉靖三十五年進士。授行人。擢御史。隆慶元年。巡撫畿輔。冬寇大入永平。疏請蠲被掠地徭賦。且言比年罰行於文臣。而弛於武弁。及於主師。而略於偏裨。請飭法以振國威。俱報可。已劾薊督劉燾。巡撫耿隨卿觀望。寇退則斷死者報首功。又奪遼東將士棒槌厓戰績。並論副使沈應乾。遊擊李信周冕罪。帝爲黜應乾。下信冕獄。赦燾隨卿還籍。



聽勸。詔遣中官李祐督蘇杭織造。工部執奏不從。杰言登極詔書罷織造。甫一年。敕使復遣非畫一之政。且內臣專恣。有司剝下奉之。損聖德非小。帝終不聽。駕幸南海子。命京營諸軍盡從。徐階楊博等諫不聽。杰復爭之。卒不從。刑部侍郎洪朝選以拾遺罷。上疏自辨。杰等劾其違制。遂削職。以嘗論高拱非宰輔器。爲所嫉。及拱再召。杰遂請急去。拱罷。起故官。旋以私議張居正逐拱非是。出爲陝西副使。再遷山東左布政使。被劾。降遼東苑馬寺卿。兼海道兵備。加山東按察使。十七年。擢右僉都御史。巡撫遼東。以督諸將擊敵。錄一子官。時李成梁爲總兵官。威望甚著。然上功不無抵欺。寇入塞。或歛兵避。旣退。始尾襲老弱。或乘虛搗零部。誘殺附塞者。充首功。習以爲常。督撫諸臣庇之。杰獨不與比。十九年春。成梁用參將郭夢徵策。使副將李甯襲板升於鎮。



夷堡獲老弱二百八十餘級。師旋爲別部所遮。甯先走。將士數千人。失亡大半。成梁飾功邀叙。杰具奏草。直言其故。要總督蹇達共奏。達匿其草。自爲奏論功。巡按御史胡克儉。馳疏劾甯。詞連成梁。亦詆杰。兵部置甯罪不議。克儉大憤。盡發成梁達隱蔽狀。先是十八年冬。海州被掠十三日。副將孫守謙不戰。成梁亦弗救。克儉旣劾守謙。申時行。許國庇之。止令聽勘。克儉乃言臣初劾守謙。時行以書沮臣。及劾甯。又與國諭臣寬其罪。徇私背公。將壞邊事。並歷詆一鶚。達及兵科給事中張應登。朋奸欺罔。達置杰會藁功罪疏不奏。遂追數成梁前數年冒功狀。帝謂成梁前功。皆由巡按勘報。克儉懸度妄議。卒置成梁等不問。而心以杰爲不欺。旋就進右副都御史。日本陷朝鮮。達遣裨將祖承訓。以三千人往。皆沒。事聞。杰亦被劾。帝特免之。朝鮮王避難。將入遼。



杰請擇境外善地處之。且周給其從官衛士。報可。尋遷兵部右侍郎。總督薊遼保定軍務。召理戎政。進右都御史。日本封貢議起。杰曰。平秀吉罪不勝誅。顧加以爵命。荒外聞之。謂中朝無人。議不合。徙南京戶部尙書。移疾歸。起南京工部尙書。就改兵部。參贊機務。卒於官。贈太子太保。明史。

魏卿。字輔明。生有至性。十歲喪母。號痛至流血。葬日。哀衣盡赤。父疾。籲天願減己齡。益父算。後果瘥。又十餘年始卒。人稱孝感。由太學謁選。授江西新城主簿。奉檄催漕。力清宿弊。至爲代償逋負。職滿。遷懷慶衛經歷。去之日。橐無贏物。課督二子象懸象樞。探古聖賢嘉言懿行。時舉爲訓。年八十卒。及見象樞舉於鄉也。居恒不事生產。與物無競。在太學時。有鄰豪侵其田畝。竟聽之。不與較。僮掃門徑塵。誤颺某生舍。某當門呼詬。卿飲食自若。俟其去。徐投刺。



往謝其雅量若此。白允謙表其墓。

志慶引舊志鄉賢。

魏象樞。字環溪。一字庸齋。蔚州人。順治三年進士。選庶吉士。明年改授刑部給事中。以明季大弊未禁革者。督撫按聽用之官舍太雜。道府州縣之胥隸太濫。疏請清理。報可。五年。轉工科右給事中。尋轉刑部左給事中。劾安徽巡撫王懷徇庇受賄。罷之。八年。世祖皇帝初親政。詔免天下額賦。罷城工。除加派。其時有以私征侵幣坐罪者。因上疏極陳其弊。請飭州縣各依易知單。造格眼冊。注明人戶姓名。糧銀款目。及蠲振各清數。呈大吏覈驗。印發開征。又請定藩司會計之法。以杜欺隱。立內外各官治事之限。以清稽滯。皆報可。九年。轉吏科給事中。十年。會大計。連上四疏。皆言計典。其一言糾拾之舊制宜復。言官不宜反坐。下所司議。著爲令。因奏白順治四年。糾拾被譴吏科給事



中劉樾冤。得旨復職。是年。以九卿科道會議。總兵官任珍落職。怨望罪。大學士陳名夏等漢官二十八人爲一議。議上。科臣坐徇黨負恩罪。應流。有旨釋免。各予降罰。留原任。象樞供職如故。明年大學士甯完我疏列陳名夏罪狀。詞連象樞。初象樞誤劾司官錢受祺。擅委中軍。下部議。降級。名夏票改罰俸。自是謂象樞與名夏子婦家山西牛射斗爲姻親。名夏用是黨護。及逮問。象樞素不識射斗。遂免議。旋以名夏父子濟惡。言官不先事發舉。六科之長。皆鐫秩一級。象樞降補詹事府主簿。累遷光祿寺丞。十六年。以母老請終養。康熙十一年。丁母憂。服除。用大學士馮溥薦。授貴州道監察御史。滿歲。晉四品卿銜。仍掌御史事。屢有陳奏。大要謂先教化則宜。崇臣僚之家教。治河工則宜。蓄任使之人才。正人心則宜。戒淫巧。勵天下則宜。輯禮書。聖祖皆是其言。



是年冬擢都察院左僉都御史。明年三月遷順天府尹。四月轉大理寺卿。七月擢戶部右侍郎。十二月轉左侍郎。西南用兵。上籌餉三疏。其略曰。確估價值。以清浮冒。嚴核關稅。以防侵漁。慎用藩司。以清錢糧。從之。尋命同侍郎班廸清理戶部。十七年。授都察院左都御史。首疏申明憲章十事。聖祖嘉其切中時弊。時嘉定知縣陸隴其有清名。以盜案開報職名。遲延革職。象樞疏舉之。鎮江府知府劉鼎。溺職已極。而報升糧道。絳州知州曹廷俞。劣跡顯著。而不被糾察。象樞疏劾之。又以磨勘順天試卷。陳科場八弊。請設內簾監試御史。以重關防。陳學政十弊。請據爲三年考覈之實。廷議並著爲令。明年遷刑部尙書。疏請留御史臺。爲朝廷整肅紀綱。上可其奏。以刑部尙書銜留任。遵諭舉廉吏。薦原任侍郎高珩。達哈塔雷虎班廸。大理寺卿瑚密色。侍讀蕭維



豫郎中宋文運。布政使畢振姬。知縣陸隴其。張沐。十人。皆得旨錄用。十九年。任刑部尙書。尋命與吏部侍郎。科爾坤。巡察畿輔。稱旨。二十三年。以病乞休。許之。賜御書寒松堂額。以寵其歸。著有寒松堂集。二十五年。卒於家。年七十。一。賜祭葬如典禮。諡敏果。雍正八年。入祀賢良祠。清史。

魏學誠。字無偽。敏果公象樞子也。康熙壬戌進士。官內閣中書。乞養歸。癸未。聖祖西巡。謁於行在。命侍入都。特賜翰林院修撰。遷洗馬。再遷諭德。仍兼修撰。乙酉典貴州試。明年分校禮闈。尋命督江南學政。遭母憂。遂不復出。學誠少承父教。文行純粹。澹於仕進。敏果公卒後。家居七年。不謁選。遇聖祖眷念舊臣。恩寵優渥。遂感激思報稱。歷職清慎。自矢有父風。當西巡時。謁見。蒙賜風規宏遠額。令撫臣噶禮懸之里第。南巡時。方爲學臣。以母劉氏年八十。陳



奏。賜頤壽沾榮額。劉故敏果側室也。時尤以爲異數。舊志。

李雲華。字叶孕。一字恒嶽。衛人。幼穎異。工文。沈毅有大略。年十九補諸生。尋入太學。明季。蔚東盜起。官軍集勦。調鄉兵爲應。雲華慷慨持牛酒犒師。指陳機宜。嘗手殲礮山巨寇。城邑獲安。家故裕。兄呈華早逝。撫其子肇甲如己出。割產之半予之。無少私。從弟文華。以事蕩產。爲出資復其業。平居儉約自奉。至於扶獎人倫。振興名教。利濟鄉閭。必竭力爲之不辭。蔚學宮將圯。捐金葺之。設學田以贍寒士。貞女宋氏。烈婦張氏。爲之助建坊表。徵刻詩集。以表揚之。應州左光宸。太原傅青主。一時碩儒高士也。卒時。貧不克葬。皆遣使厚賻。庚申歲大饑。出粟五百石以賑饑。已而復饑。賑如前。先後全活以萬計。魏敏果公之詔起也。貧不能束裝。將辭以疾。雲華促之行。曰。不可虛聖祖側席之



求也。厚贖之。且約歲奉三百金爲常。敏果用是益刻勵。雖其清介天植。亦雲華有以成其美也。年八十五卒。以子振藻貴。封朝議大夫。

李振藻。字天葩。康熙丁巳選貢。授中書舍人。遷戶部主事。督理右翼興平倉。轉廣東司員外郎。攝四川司事。進刑部郎中。未幾擢貢州知府。以裁缺候補歸。遂不復出。振藻少從魏敏果公講學。故其平生操履。動以古人爲師。官戶部時。雲南撫臣請免夏稅。以蘇民困。羣議不決。振藻力爭於庭。得如議。宣府順聖東西城懷安諸衛。頻年被水衝沒民田。有司以豁賦請。衆復格之。振藻爲白於當局。其事亦行。興平倉舊多巨蠹。振藻至。力剔積弊。一時猾胥皆屏迹。無何議增蜀課。以佐軍需。振藻曰。民不堪也。亟請罷。及遷刑曹。會亢旱。清刑獄。加意矜恤。多所全活。大同饑。奸徒多掠賣人子女。察其僞券。立斷還。故



有神君之稱。鄉居樂善不倦。與敏果並以學行崛起一時。世稱約齋先生。有子六人。多貴顯。

賈聯堂。字槐三。號萼亭。蔚之蘇。賈堡人。寄居廣靈。永煊子也。性聰穎。篤孝友。工詩善書。清同治十二年登賢書。報捐刑部員外郎。光緒二年成進士。選庶常。授四川德陽縣知縣。未至官。改選河南汲縣之任之初。值地方甫經災燹。市商凋敝。饑民遍野。乃請賑。捐廉購衣食。全活以萬計。減政輕刑。訟獄不興。然遇上棍惡豪。則必盡法以懲。嘗曰。百姓與賊匪不同。養恥爲重。薄責示警而已。尤善鈎距術。有山東趙某。絜子及媳。與同鄉某甲。結伴逃荒。行至汲之比干廟。天已昏黑。遂同宿於廟外。某甲戀趙某之媳。趁曠野無人。乃將趙某父子殺死。拐婦以逃。翌晨。地保查覺。報案緝兇。某甲及婦。遁未遠而被獲。訊



之曰。汝非山東趙某之媳乎。婦人猝聞。驚惶失色。問某甲曰。殺人者汝也。冤鬼昨已見夢。伸訴綦詳。不速供。尙待刑乎。某甲見已抉其隱。諒難遁飾。乃盡吐其實。讞定。置之法。人皆驚服其折獄之奇。皆稱之曰白臉包公。考滿大計卓異。遷武陟。去之日。攀轅餞道。綿亘數里。路爲之塞。武陟素稱豐缺。但漏規雜徭。擾民頗甚。於是酌爲蠲除。計減萬餘金。家人問之。謂曰。此民之脂膏也。吾居官爲民。原不爲錢。吾家雖非大富。亦屬小康。只可賺德遺汝等。用錢何爲。家人悅服。執法不憚權貴。紳衿不敢以私謁。武陟役吏刁頑。縣官時爲其挾弄。下車甫越月。即將蠹役劣吏。擇尤禁錮之。餘則革去之。人心大快。親訪邑之爲民害者。曰盜曰水。乃嚴緝盜匪。境內帖然。陳治河事宜於河帥。謂河水之決。由於淤沙太高。宜疏而去之。使河身低下。患自息矣。河帥許公納之。



委爲南岸總辦。日夜指畫不少懈。不再月而河流順軌矣。工竣。河帥嘉其能。越次保升知府。護理黃沁廳同知。時獲嘉有味金案。久不決。大吏耳汲宰折獄之能。隔省調之。先是有啞者之父。私蓄三百金。分而二之。藏於櫃。父歿。其弟欺其兄啞。逐之而昧其金。啞者控之。官以其啞不能訊。故案久懸。聯堂至。研訊數次。漸得其隱。惟無左證。不能決。正執筆凝思間。啞者遽前執筆。書其始末。並金之件數。及櫃形色甚詳。詰其弟。初不承認。遣吏取之果符。判罰其弟二十金。並杖之事乃解。會有民人悞撞毛尙書旭熙孫某之車者。某撻之。怒猶不息。送之縣。訊之。得其情。責毛某。並稟知毛公。旋得毛公函云。事之曲直。宜認真判斷。不可因我而枉法。劣孫滋事。責之甚當。結案時。祈再責一百。以警其後。時人以毛公之能守法。而令之能執法。兩賢之。而其剛介之氣尤



所難能。有詠玉簪花詩云。雖無冰霜操。炎熱不能侵。其操守可見矣。嗣因母病告歸。足跡不入公門。惟與故舊留連詩酒以終。子宇熙。凝熙。穆熙。靜熙。皆有聲庠序。知名當時。

劉錫之。字宰廷。號樗生。歲貢生。世居蔚縣。父煥章。有子四人。錫之其季也。少聰悟。有雋才。游泮後。乃專攻經史古文。不規規於舉子業。學者咸奉爲泰斗。清光緒二年。知州慶之金。輯修蔚州志。聘爲校對。於州志體例。多所參訂。稱精核焉。知州蕭世本。文學士也。抵任之初。即耳其名。清晨造其廬。晤談良久。輒曰。我來無他事。特恐足下晏起不勤讀耳。足下天姿明敏。宜早起作業。成就不可限量。嗣後歷任邑宰。均以品學兼優許之。旋被推爲紳董。凡書院課士。地方要政。均得與聞。而錫之亦持議正大。言不及私。人益欽服。故采風來



蔚者。於接談之頃。莫不一詢劉宰廷。然性方嚴。嗜古學。嘗慨邑人尹耕所著  
兩鎮三關志。散佚無傳。求之十年不可得。忽於故紙擔頭。得尹著鄉約塞語  
一本。喜極。如獲至珍。而刊之復行於世。工詩文。善草隸。著有課子詩草。未梓。  
藏於家。又集錄歷代文藝事略。彙成三冊。名曰猶賢乎。蓋勤學自勵。取猶賢  
乎已之意。惜散佚不全。僅存一冊而已。清光緒十七年。直督李少荃題其門  
曰。廉正可風。卒年七十四。子二。沆。淇。均謹厚勵學。

杜檀。字樹香。號樂園。晚號遇安老人。蔚之西合營鎮人。性直爽。無虛僞。輕財  
仗義。不事浮夸。遇族人。有喪婚大事。必解囊飲助。雖耗千金。亦無吝色。故人  
感德之。然教子嚴。持家勤。子弟之有怠惰者。必繩以家法。以故家人兢兢然。  
不敢稍有違忤。鄉人言家教者。皆取法焉。檀少遊泮宮。聰穎絕倫。清光緒年



間選貢。設帳授徒。以文名著數十人。皆一時之秀異。宣統二年卒。子四人。文譜。文詔。文訓。文誥。

薛春舫。名潭。字花嶼。春舫其號也。蔚之東鄉甘莊子村人。家世業儒。春舫生而穎異。不苟言笑。家貧親老。無以爲養。乃課蒙養親。兼治舉子業。清光緒二十三年。由廩膳生選拔入貢。朝考二等。以教諭候選。庚子變後。國家籌備憲政。飭州縣有司。選薦紳衿。赴東洋考察教育。春舫以學行俱優與選。遊瀛歸。總董本縣勸學事宜。不一年。村校之成立者百餘處。而縣城之警察師範工業等教育機關。悉經其策畫。逐次開辦。光緒末。直省設諮議局。預備立憲。當選爲議員。於直省興革大政。多所建白。正論侃侃。不曲不撓。於是薛春舫之名。騰播於直隸全省矣。然性端嚴。精神內斂。望之巖然。如不可及。一經接談。



則和藹之氣溢於言表。故人莫不服其學而欽其範焉。常有縣官涖蔚之初。於延見時。覩其質樸少華。私以拙愚易視之。及交一二事。乃知其不偏不倚。措置悉當。嘗歎曰。春舫不愚。鹽山楊淑。沉守潛宰蔚。辟爲縣府科長。地方事必諮之。而後行。於去任時。贈以長歌。有朔野距今三百年。華表一去鶴不還。環溪魏子繼絕學。薛公晚出躋前賢之句。非虛譽也。春舫歷辦教育十餘年。善政至多。如籌創第二高小學校於西合營。以廣造就。力主裁撤全縣官價採買。以除民累。此其犖犖大者。其他造福地方。不一而足。故老者愛而多助。少者願學。未能以服官政之年。遽捐館舍。各界人士。莫不悼惜。事聞。黎大總統。給予五等嘉禾章。教育部獎給匾額。題曰菁莪遺澤云。

賈宇熙。字少槐。號仁甫。性篤厚。沉靜寡言笑。天姿明敏。少有才名。清光緒三



十二年舉優貢。歷任山西萬泉黎城靈石趙城等縣。政尙寬簡。不事嚴酷。所至興教育。倡工業。治平人和。頌聲載道。其任萬泉時。會天大旱。農民憂泣。乃齋戒徒跣。於烈日中走二十里。往禱於靈泉。返未抵署。而大雨至。四野霑足。人以爲精誠所感云。惟不善趨附。故所在得乎民。而不合乎上。旋去官歸里。徜徉林泉。絕口不言政事。卒年六十。子維蘇。維共。維蘇易名曰榘。字里軒。任贊皇縣縣長。

彭友梅。字萼仙。號小春。蔚西將官莊人。品端學優。年十三喪父。事母以孝聞。既冠遊庠。人皆目爲大品。彭則厭薄舉子業。不求進取。專心兵農法律諸書。尤酷嗜樹藝生產學。常於所居植杞柳。栽桑養蠶。不數年。枝條暢達。桑葉沃若。而蠶以蕃滋。邑里景從。瘠壤變爲膏腴。又嘗披覽醫書。具臻妙理。遠近求



者踵相接。無不應手奏效。貧富皆不取值。樂善好施。蓋天性也。將官莊爲蔚之極西境。毗連山西之廣靈縣界。所有田畝。均係插花。彭之種植既蕃。兩縣農民轉相倣效。獲益頗豐。故廣靈劉縣長。覩其成效。委爲縣區長。商會會長。農會會長。農桑局局長。農林試驗場總理。彭任職數年。罔不殫盡心慮。興學校。倡蠶桑。修道路。開水利。栽樹株。禁罌粟。勸放足。戒賭博。凡有關於民生及裨益社會者。莫不竭力提倡。著成效。廣靈扈縣主稱之曰。熱心種植。閻督辦百川。獎以匾額。文曰澤被鄉閭。徐大總統菊人。頒賜急公好義四字。准其建坊。至其他褒章寵譽。屢承獎賜。可爲實至名歸。民國十年四月。以疾卒。年七十有六。弟有蘭。字同心。亦善醫。捨藥施診。全活無算。子四。善士。良士。均前清附生。鴻臚寺序班。吉士。法政學校畢業。貴士。直隸第十六中學畢業。山西渾



源縣區長。孫十人。均供職軍政界。曾孫九人。亦皆知名。

### 宣化縣鄉賢

盧孝儉。宣德府人也。天眷二年進士。累官太原少尹。大定二年。陝西用兵。尙書省發本路稅粟。赴平涼充軍實。期甚嚴迫。孝儉輒易以金帛。馳至平涼。用省而不失期。并人稱之。官二階。遷同知廣寧尹。廣寧大饑。民多流亡失業。乃借僧粟。留其一歲之用。使平其價。市與貧民。既以救民。僧亦獲利。累遷山東轉運使。所至有德政云。

金史  
本傳

劉敏。字有功。宣德府人。元太祖駐師山後。敏時年十二。從父母避地德興禪房山。兵至。父母棄走。大將憐而收養之。一日。帝宴諸將於行營。敏隨之入。帝見其貌偉。問知所自。俾留宿衛。習國語。聰慧。遂得帝心。帝征遼西。及回回諸



國悉收其地。敏皆從行。授安撫使。便宜行事。兼燕京路稅課漕運鹽場僧道司天等事。初耶律楚材總裁都邑契丹人居多。其徒往往中夜挾弓矢掠民財。官不能禁。敏戮其渠魁。令諸市。又豪民冒籍良民爲奴者衆。敏悉歸之。選民習星歷者爲司天太史氏。興學校。薦名士爲之師。太宗即位。授行尙書省治漢民。憲宗即位。請以子世亨自代。帝許之。賜世亨銀章佩金虎符。仍諭世亨以不從命者黜之。又賜其次子世濟入宿衛。帝伐宋。幸陝右。敏輿疾請見。帝曰。卿有疾。不召而來。將有言乎。敏曰。臣聞天子出巡。義當扈從。何敢言疾。但中原土曠民貧。勞師遠伐。恐非計也。帝弗納。敏還退居年豐。世祖南征。過年豐。敏入見。諭之曰。我太祖勵精圖治。見而知者惟卿爾。汝春秋高。其彙次以爲後法。未幾歸。疾卒。

元史  
本傳



武恪字伯威。宣德府人。初以神童遊學江南。吳澄爲江西儒學副提舉。薦入國學肄業。明宗在潛邸。選恪爲說書秀才。及出鎮雲南。恪在行。明宗欲起兵陝西。恪諫曰。太子北行。于國有君命。于家有叔父之命。今若向京師發一箭。史官必書太子反。左右惡恪言。乃曰。武秀才有母在京。合遣其回。恪遂還京師。居陋巷。教訓子弟。文宗知其名。除祕書監典簿。秩滿。丁內艱。再除中瑞司典簿。改汾西縣尹。皆不赴。人或勸之仕。恪曰。向爲親屈。今親已棄養。不復仕矣。居數歲。會朝廷選守令。秦不華舉恪爲平陽沁水縣尹。亦不赴。近臣又薦爲授經郎。恪遂陽爲瘖瘵。若不能應命也。恪好讀周易。每日堅坐。或問之曰。先生之學。以何爲本。恪曰。以敬爲本。所著有水雲集若干卷。其從學諸生。多所成就。凡居要官以賢名者。蓋十數人云。

元史本傳



張濂。字景周。宣府人。正德進士。歷河南鹿邑。浙江海鹽知縣。百姓謂之行取。山西道御史。清理江北諸衛班軍。會歲祲。濂計廩先給。軍樂于行。尋往監陝右。瀕行。權要人示意。某可舉。某可劾。至則廉之。歎曰。吾能枉是非。媚人取大官耶。卒以實狀上。因憾之。以事改大理寺評事。尋出爲山西按察使。襄民周朝者。妖人也。率黨破縣城。殺令。濂雨夜馳至捕之。事平。權要人復指爲罪。落職歸。徜徉林壑。訓子課農。置時事不問。士大夫高之。年七十六卒。

宣鎮志

潘澤。字澤民。宣德府人。初從許魯齋學。歷仕課最。擢知宏州。兼諸軍奧魯。始有土民。以行所學。郡旱。徧禱不應。乃詣郭西泉。投文祝之。明日大雨。乃爲屋祠龍泉上。先是州南大風爲災。又禱之以文。風災遂息。州民德之。州向繫疑盜八人。求迹無所。澤明其非辜。皆出之。未幾真盜盡獲。太原民有從貴家奴



得僞鈔獲罪者。待命他郡。過治。號于市曰。神明如公。獨不能相活耶。公訊得其情。上之。事遂息。列職中外。善政聿多。終于浙西道肅政廉訪副使。

餘詳  
藝文

江福。宣鎮人。正統中。都督同知。土木之變。中官喜寧。隨英廟北狩。兩引衆寇邊。索金帛無厭。中外苦之。景泰改元。福爲萬全右衛守備。寧遣腹心高璽來邊。佯言議和。實欲誘我軍出而襲之。福覺。因與璽結歡。動以忠義。璽頗洩其情。福遂以圖寧事密告璽。璽應諾。福慮賊情譎詐。請總兵朱謙。楊俊。各率兵伏野狐嶺左。至期。甯果遣璽先來會盟。福令壯士十餘人。皆衷甲。外飾常服。各執饌具。出關迎寧。邀寧奉酌。寧初有難色。璽從旁贊勸。遂下馬相勞苦如平生。酒行。福目壯士。就擒之。關內伏兵。疾馳而出。喊聲動地。敵見墮計。皆遁去。並擒其酋。火力火孫。英廟旋得回鑾。福之功也。時有攘其功者。福不與爭。



人以爲難。

宣鎮志。時宣府總兵楊俊冒其功。後事露。帝宥俊。別賞福。

黃明臣。字國瑞。先世彭澤人。明初調戍。占籍宣府。由千戶歷永寧參將。永寧爲寇出入孔道。民居星散。有警。倉卒逃避。黃度道里遠近。築堡置戍。隨地守禦。人以爲堅城。北部嘗渝盟。由四海治入寇。預偵知之。身先士卒。獲寇哨騎。歸其半而質其半。諭以禍福。皆噬指骸散。相戒勿敢犯。內地史車二部驕黠。時引外寇。乃與約法。賞罰必行。共輸服焉。會邑令趙欲興學。造士而阻於無費。明臣乃引爲己責。延學官。率子弟講業。經費不煩有司。是科寧遠遂獲售一人。盛備燕飲供帳。并厚給之。以勸來者。擢昌平總兵。去任。邑人思之。爲立祠。明臣幼孤。事孀母孝。嘗拾金百兩。迹其人還之。

續鎮志

張光烈。字覲揚。號芝田。順治戊子舉人。乙未進士。知夏邑。邑多狡獪。概置之。



法羣奸屏息。其夙逋難征者。立限期。勤勸諭。得無終逋。又煮粥活饑。禁民鬻子。邑紳梁方伯卒于秦。家有六觀。子幼難舉。光烈爲代塋。馬鬣纍纍。人咸義之。擢同和平陽府。肅紀綱。絕饋遺。時滎河臨晉。上官械逋糧者。付公治之。公盡去其械。勅縣緩比。次第報完。蓋民不忍負之也。臨汾缺令。撫軍以光烈才。委署其篆。爲革火耗。禁雜派。除衙蠹。懲幫帖。省民財約萬有餘金。典史丁某歿。代補解餉所折銀百有餘兩。脫其內弟於械。又資遣其輻以歸。皆義舉也。比謝事。病卒。吏民咸痛之。

續宣  
鎮志

胡以温。字公嶠。號東甌。一號書巢。其先忻州人。洪武中。占籍宣府。父達可。本衛茂才。以友愛稱。以温年二十三。舉順治丙戌進士。除江西樂安縣。邑有巨豪殺人。前令不敢問。至是持千金爲賂。卻不受。竟抵其罪。有不善者。其族請



置於死。召至。反覆曉譬。因叩首乞改。後竟自新。會總兵金聲桓叛。所在多殺長吏。應之。樂安數十人。操刃擁以溫出。有兩人左右護持。因得免難。問之一。爲被豪殺者之親。一即釋罪以勵其改者也。後部議罷職。年方二十有八。家居四十餘年。絕意仕進。所著有辨學編。洙泗言仁錄。補道因集。蠡測編。文章具體。山堂清玩。騷體。讀書論世管見。見山堂文稿詩稿等集。又有續宣鎮志。前明嘉隆後。邊事賴以考云。

舊縣志

黃鼎楫。字巨公。號闊儒。死事參將黃洲長子也。洲亡。鼎楫年甫十二。居貧力學。中康熙乙丑進士。癸酉。授陝西漢陰知縣。值丁丑戊寅。境內連歲荒旱。倉中舊積穀數千石。以備軍需。鼎楫度請於上官。必不允行。竟率意分貸之。邑民賴以存活。立像祀焉。庚辰。行取戶部曹。閱八月。擢工科給事中。壬午。副江



南省主試。榜發。輿論帖然。旋轉吏科掌印。歷六年餘。以言責自任。嘗疏請更

定大計卓異事例。

大略謂各省大計卓異官字樣多與例不符。皆由胥吏舞弊所致。嗣後請責成督撫。並請隨本引見云云。及東

省被災。州縣懇祈緩征。

凡二疏。

俱獲俞允。又嘗參奏某巡撫匿災不報狀。奉旨

着某明白回奏。竟易其任。時論韙之。在任時。賜御書五言絕句詩一幅。御製

詩一部。人獲一觔。乙酉。覃恩勅授文林郎。戊子歲。罷官歸。鼎楫性孝友。父洲

歿後。家中落。日繕冊十餘頁。獲錢數十文養母。夜則篝燈讀書。夜分始就寢。

以父死於寇難。不獲申表。既入諫垣。屢欲面陳。不果。侍直歸。每涕泣終日。謝

政後。適其弟鼎。

官陝西漳縣令。

以虧空被揭。鼎楫悉捐己貲產。得二千餘金。爲之代

償。以故晚景益復貧困。怡然處之。弗屑也。年七十卒。子二人。錦圖。錦雲。孫大

本。康熙庚子舉人。有文品。兼工書畫。

家傳。



黑天池。字南溟。號鵬飛。赤城籍。宣化縣人。前明殉節都督雲龍之曾孫也。幼敦行好學。有聲膠庠。中康熙己丑科進士。辛丑。選授廣西義寧知縣。邑有積盜秦某。窩竊逞奸。前任官俱莫能制。天池甫下車。即設法緝捕。並餘黨就擒。境內賴以寧息。居官清慎自矢。而尤善拊循士民。應試生童。有資斧不給者。出餘俸飲助之。又嘗請發倉儲之粟。賑貸窮黎。以給農事。上官嘉其才。會疏保薦。特擢南寧知府。洎任六年。興利除弊。威惠所至。漢土官民羣帖服。庚戌。陞任桂平。梧鬱驛鹽道。以疾卒於官。

府志

姚之愷。字子和。宣人也。祖熙吾。以明經歷任陝西興安牧。父永燾偕鄰邑郇陽。被流寇失守。父老奔興安托命。燾代爲訓練。保障鄉民。後總鎮康。廉其才。題授興安中營都司。越十日。丁外艱。未幾。竹山劉二虎圍興安。嚴裝往援。中



礮而死。母杜。矢節訓子。延師課讀。之愷性嗜學。自幼即博覽羣書。尤精時藝。屢試冠軍。人以名士稱之。數上公車。不售。乃閉門著書。講德論業。執經問字者甚夥。其領鄉薦捷南宮。而以爵顯者。都諫黃鼎楫。中翰褚絨。他皆多所建樹。咸愷之流澤也。其課子尤力。卒得名。邑人張喬年。錄成語贈之曰。有子已成天下士。無人不羨地中仙之句。及子除翰林庶常。得賜封。堅卻不受。曰。吾掇青紫。直分內事。焉用是爲耶。姻婭勸慰再四。方領之。

舊縣志

鄭魁士。字鼇峯。宣化縣城人。清嘉慶二十五年。入宣化鎮標。道光初。由行伍積功。奏補湖南守備。歷陞廣西都司。時洪秀全倡亂金田村。世稱髮匪。公奉調帶兵勦之。以功陞遊擊。咸豐初。長江各省。匪益猖獗。廬州失守。詔赴皖北會勦。提督和春。巡撫福濟壯公猷。廬州遂克復。補授壽春鎮總兵。並奉詔會



辦皖北軍務。未幾。擒復熾。皖北郡縣多淪陷。公以寡敵衆。每戰身先士卒。所向有功。後敵軍見公幟。輒風靡。清文宗恩眷有加。賞給頭品頂戴。沙拉瑪該勇號。黃馬褂。玉搬指。翎管藥品等物。旋調赴金陵。以會剿有功。授浙江提督。復詔督辦甯國軍務。暨幫辦東壩各處軍務。公親提一旅。屢挫敵鋒。值餉源絕續之交。當羣賊縱橫之地。每臨大陣。首陷兇鋒。創傷鱗積。同寅勸公靜攝。公不謂然。且益自奮。裹創力疾。仍日在血戰中。大江南北。兵民愛戴。所至皆額手頌生佛。嗣因傷益劇。奏請開缺回籍調養。同治初。擒匪北竄。震動畿輔。復奉詔調赴直隸一帶。督隊協剿。賊匪奔潰。遂署直隸提督。力疾從公。不辭勞瘁。仍以傷痕復發。回籍調養。竟至不起。溯自粵西用兵以來。轉戰江皖湘鄂直隸數省。治軍四十餘年。勛勞卓著。至今江皖士庶。猶樂道之。合肥李文



忠公稱其堅苦剛毅。驍勇絕倫。馭衆恤兵。嚴整寬厚。無負國家干城之選者。蓋曾與共患難。知之最深也。公在籍尤多義舉。築永固壩以興水利。修四牌樓以壯觀瞻。起鎮朔樓以司昏曉。開火石坡以利交通。其他瑣事。不勝枚舉。同治癸酉卒於家。年已七十有三矣。賜諡忠烈。廕一子。生平事績。宣付國史館立傳。長子永祥。任浙江遊擊。先公歿於廬州營次。次孫萬成。由廕生。選授山西汾州府積口通判。

宗自明。字立誠。宣化本城人。貌清奇而智勇絕倫。家素業商。君幼具大志。因棄商投軍。隸宣化練軍。清光緒十年。多倫白岔土匪起。勢張甚。總兵王公可陞。剿撫莫決。時君已拔陞中營馬隊前哨督隊官。因進言曰。賊雖衆。剿之易耳。若誘之於平原。出奇兵以擊之。一鼓可殲也。王公聽之。率軍前進。行至畢



流溝。君請充哨探。夜帶數卒入賊巢。賊不及防。擒之歸。溫語以詰之。盡吐其情。於是賊之虛實盡悉。始戰於畢流溝。君恐匪之負隅也。請誘之於三義泉。再誘之於坤兌川。更誘之於青龍背。遂聚而盡殲。終如君議奏功。後從軍勦匪於克什克騰旗。於經棚。於多倫。於劉家營。戰績屢著。積功賞戴藍翎。拔補龍門路葛峪堡把總。以千總儘先補用。十七年十一月。隨營赴熱河勦匪。匪首李懶珍者。悍賊也。精妖術而善督戰。匪衆萬餘。我軍僅五百人。遂駐紮於合成公商號內。十一日午間。匪從合成公對面山中。大股來撲。離營約六里許。我軍從圍牆上槍擊之。賊伏不動。當時槍皆舊式。彈難擊遠。屢擊不中。賊乃大笑。自謂避彈有法也。遂率衆猛進。勢如潮湧。君揚言於衆曰。事危矣。非拚死力戰。絕無生理。我軍遂奮勇猛擊。戰半日許。賊斃於牆下者。三千餘人。



李憫珍裹紅巾。坐車上。切指持咒。左右指揮衆匪圍攻。不稍退。君思捉賊不擒。王終不能取勝也。持槍向匪首猛發一彈。中其左手。李匪負痛而逃。賊乃驚潰。君率軍追勦。殲其類。惟營官某。早驚悸成病。因止。君曰。此圍幸解。望勿窮追。是役也。賊衆我寡。危如累卵。非君激勵勇氣。槍擊賊衆。幾有全軍覆沒之虞。乃卒轉敗爲勝。當時若從君議。乘勝追勦。自不難一舉滅賊。乃竟爲營官所阻。惜哉。後此功竟爲他軍所攘。君因此鬱鬱不得志。不談戰事。教子讀書力學。戒毋再投身軍界。後調防科布多。防滿。奏准都司補用。仍回葛峪堡原任。年五十。卒於任。

張北縣鄉賢

斛律金。字阿六。敦敕勒部人。性敦直。善騎射。行兵用匈奴法。望塵知馬步多



少。嗅地知軍度遠近。初爲軍主。魏除爲第二領人酋長。秋朝京師。春還部落。號曰雁臣。神武密懷匡復。金贊成大謀。沙苑之役。神武軍爲西師所乘。遂亂。金請急向河東。神武未動。金以鞭拂馬。神武乃還。是役也。無金先請還。幾至殆矣。金性質直。不識文字。封咸陽郡王。累遷左丞相。金長子光大將軍。次子羨及孫武都。竝開府儀同三司。出鎮方兵。其餘子孫皆封侯貴達。一門一皇后。二太子妃。三公主。尊寵當時莫比。嘗謂光曰。我雖不讀書。聞古來外戚梁冀等。無不傾滅。女若有寵。諸貴人妬之。女若無寵。天子嫌之。我家直以立勳抱忠致富貴。豈藉女也。辭不獲免。常以爲憂。薨年八十。贈假黃鉞相國太尉公。諡曰武。

耶律伯堅。字壽之。桓州人。氣豪俠。喜與名士游。因薦舉入官。爲工部主事。至



元九年。轉保定路清苑縣尹。初安肅州。苦徐水之害。訴于大司農司。大司農司欲奪水故道。導水使東。東則清苑境也。地勢不利。果導之。則清苑被其害。而水亦必反故道爲災。伯堅陳其形勢。圖其利害。要大司農司官及郡守。行視可否。事遂得已。縣西有唐水。溉民田甚廣。勢家據以爲磴。民以失利來訴。伯堅命毀磴。決水而注之田。許以溉田之餘月。乃得堰水置磴。仍以其事聞於省部。著爲定制。縣居南北之衝。歲爲親王大官。治供帳於縣西。限以十月。成。至明年復撤而新之。吏得因緣侵漁。其費不貲。伯堅命築公館。以代供帳。其弊遂絕。凡郡府賦役於縣。有重於他縣者。輒曰。寧得罪於上。不可得罪於下。必詣府力爭之。在清苑四年。民親戴之如父母。比去而猶思之。立石頌其德焉。擢爲恩州同知。

三廳志載元  
史良吏傳



阿沙不花。康里國王族。年十四。入侍世祖。賜土田。給奴隸。使居興和之天城。世祖親征。乃顏命以千戶帥昔寶赤之衆從行。及乃顏平。阿沙不花以大同興和兩郡。當車駕所經。有帷臺嶺者。數十里無居民。請詔有司。作室嶺中。徙邑民百戶居之。割境內昔寶赤牧地。使耕種以自養。從之。阿沙不花既領昔寶赤。帝復欲盡徙興和桃山數十村之民。以其地爲昔寶赤牧地。阿沙不花固請存三千戶。以給鷹食。帝皆聽納。民德之。至今飲食必祭。成宗崩。安西王阿難答。乘間謀繼大統。阿沙不花與丞相哈孫定策。立武宗。召安西王至。執送上都。盡誅丞相阿忽台諸姦臣等。累拜平章政事。錄軍國重事。特進太尉。封康國公。薨。贈中書右丞。上柱國。追封順寧王。諡忠烈。其繼室別哥倫氏。亦有至行。寡居三十年。未嘗妄言笑。身不服華采。詔旌其門。

三廳志載  
元史本傳



張萬糧。本縣第五區滿克圖人。享年七十有八。性仁厚。生平好施。見義勇爲。當時外三廳。尙無考試。張爲作育人才計。於清光緒九年。聯名上稟。力爭准與試。嘉惠士林。其功匪淺。及光緒十八年。口外大饑。放糧千餘石賑災。活人數千。平素調濟貧民。或糧或錢。不可勝計。遇窮苦無力營葬者。代爲購棺謀葬。同知鄒振岳。賜予急公向善。地方民衆送以公爾忘私等匾額。故至今人多稱誦不置云。

楊時雨。本縣人。壽至八旬。平生好善喜文。舉辦地方公益。不遺餘力。光緒五年。首先倡辦興和城文武義學。聯合士紳劉楚才。王廷輔。李運仁。趙金鰲等。經營擘畫。至六年成立。七年開學。造就文武人才甚夥。因義學之地。與無賴爭。幾瀕於危。卒得救。至創修大佛寺。含辛茹苦。猶其餘事。



張漢字雲卿。張北縣第一區永泰村人也。性和平仁厚。清光緒十八年間旱。魃爲虐。赤地千里。哀鴻遍野。不特羅雀掘鼠。挖掘草根。且人相食。日有所聞。張君關懷桑梓。向友告貸。由張垣購紅糧小穀百十餘石。賑濟村民。得以保全。上官聞其事。賜給九品頂戴。初居五區羊官窰。因移遷時。將所有田畝二頃。樹木千棵。盡行分給鄰居親族。至今猶感念不置。又嘗以內地人滿爲患。邊外空虛無人。欲實邊救民。非墾殖不可。故在哈拉汗一帶。提倡墾荒。嗣後藉以謀生者。何止數千家。卒年六十有八。

### 延慶縣鄉賢

胡忠字蓋臣。永寧人。以世次應襲父官。讓弗嗣。登宏治壬午賢書。尋判常州。地多盜。捕得輒杖斃之。餘盜悉遁他境。舉政績卓異。進階奉訓大夫。引疾歸。



祀永寧鄉賢。

蘇乾。字體健。少遊庠序有名。宏治辛酉登賢書。明年對策擬元。因邊人改傳臚。拜兵部武庫主事。遷職方員外郎。旋遷郎中。時尙書華容劉大夏。靈寶許進。每朝回。問乾兵機。乾對俱中機宜。即奏行之。逆瑾黨孫司務者。勢傾公卿。每誘致乾。乾不爲動。參議陝西時。流寇猖肆。乾躬環甲冑。率官兵擒殲之。賊爲解散。歲饑。設法賑濟。多所全活。年四十三。乞致仕歸。七十七乃卒。乾博識經史。騷雅詩賦。篆籀楷隸。以及陰陽星歷諸書。無不精妙。鄉人呼爲小東坡云。

黃鍾。字伯魁。幼能文。爲羣庠弟子員。舉進士。入諫垣。時詔修乾清坤寧二宮。當事計值甚鉅。鍾計之。可減十之五。奏准行。土木之變。帥臣神周恃逆彬黨。



擁衆不出。鍾劾其罪。因置於理。兵部尙書彭澤。節制川陝有功。權臣忌之。誣以法。鍾白其誣。澤得免。擢順天府丞。勳戚巨璫。素多恣橫。凌虐人至死。鍾緝其兇斃之。遷都察院右副都御史。嘉靖辛卯。巡撫山右。未久。稱治焉。年未六十。遂引退。杜門謝客。人罕得面。其端慤渾含。外晦中通。直不忤物。廉不要名。鄉評多之。

胡紹齡。字介年。永寧人。以拔萃選昌邑縣丞。邑故彫剝。賦常不及額。坐是左遷河南照磨。數月。上官才其爲。復原秩。補山西繁峙縣丞。上計最。擢五臺知縣。旋引疾歸。祀永寧鄉賢。

胡克廣。以貢倅裕州。治行超卓。陞苑馬丞。在裕時。均田清賦。以廉能稱。兩視縣篆。所去見思。任遼東不靡時。修學築城。驅蝗感雨。屢爲當道所薦揚。以乞



終養歸。家居事母孝。色養溫清。必親。醇厚以處鄉黨。爲一邑表率焉。祀永寧鄉賢。

胡先達。號彝軒。永寧人。由廩貢任東光訓導。道光壬午。第進士。歷署江蘇溧陽。武進知縣。聽斷明決。案無留牘。尋補吳江。兩月引疾歸。嗣遵例捐升知府。分發貴州。署松桃同知。創建書院。義舉頗多。復引疾歸。家居。購本鎮巡政廢署。創立書院。地在縉雲山陽。顏曰縉雲。延師課士。一時俊秀誦讀其中。文風丕振。又捐置義塚。以待外來之無葬地者。出其緒餘惠鄉里。以供草差車差之用。先達剛毅自矢。事無留難。然不稍自貶折。以降其志。故再官而再歸。年六旬卒。著有縉山草堂制藝試帖。刊刻行世。子三人。俱以科名顯。

懷來縣鄉賢



張詢。袞弟。字洪讓。隨兄北歸。參代王軍事。皇始初。賜爵平臯子。出爲廣平太守。招集離散。勸課農桑。流人歸者數千戶。遷常山太守。建學校。禮師儒。時喪亂之後。罕有能克勵者。惟詢當官清白。仁恕臨下。百姓親愛之。政爲當時第一。卒之曰。家無餘財。贈并州刺史平臯侯。諡曰宣。孫蓂。年少有孝行。爲汝南太守。有惠政。

張本。字鍾葵。獻文賜名白澤。少以孝聞。高宗初。除給事中。參預機密。蠕蠕犯塞。請顯祖親征。大破之。出行雍州刺史。清心寡欲。吏民安之。獻文詔諸監臨官。私取羊一口。酒一斛者死。白澤請仍依舊律。從之。太和時。懷州伊祁苟初。三十餘人謀反。文明皇太后欲盡誅一城人。白澤諫乃止。誅其首。遷殿中丞。卒。贈廣平公。諡曰簡。長子倫。爲燕州大中正。多所建白。卒於大司農卿。

以上俱摘



錄北史  
本傳

寇讚字奉國。上谷人。少以清潔知名。姚宏滅秦。雍人千餘家。推讚爲主。歸魏。拜河南郡太守。其後秦雍人來奔河南者。戶至萬數。拜南雍州刺史。軹縣侯。於洛陽僑立郡縣以撫之。其後流人襁負自遠而至者。三倍於前。進爵河南公。仍刺史。分洛豫二州之僑郡以益之。讚雖貴。接待不倦。在州十七年。公私

賴之。卒。遺令薄葬。殮以時服。子元寶襲。

北史本傳

潭澄字彥清。懷來人。父資榮。爲金交城令。以歸元。賜虎符。行元帥府事。仍兼交城令。從攻汴有功。移病歸。澄年十九。襲職爲令。有文陽郭帥。堰文谷水以專利。豪民有持吏短長爲奸者。澄悉治以法。又有司多以浮客占籍征賦。悉遁去。官爲稱貸。積息數倍。澄入覲。面陳其害。太宗爲免其逋。積息取倍而止。



公私便之。世祖留之藩邸。多所裨益。及即位。歷懷孟河南平灤三路總管。鑿唐溫渠。引沁水以溉田。教民種植無遺利。改川陝按察使。建言。民年四十無子。取妾爲宗祀計。從之。著爲令。代嚴忠範守城都。嚴方爲宋將所敗。澄至。葬暴骸。修焚室。賑饑貧。集逋亡。民心乃安。會羅羅斯內附。帝命澄爲副都元帥。同知宣慰司事。以撫之。比至。以疾卒。當游顯爲諸總管。求虎符宣麻。澄至。中書辭曰。皇上不識澄耶。乃爲顯所舉。其介如此。

元史本傳。

王質。懷來衛人。應襲指揮。不就。好讀書。中成化甲辰進士。授吏垣。有直聲。劾六部九卿貪鄙奔競。罷斥者八人。又疏請黜異端。罷進獻。汰冗員。禁傳奉。陞陝西行太僕少卿。設法招募兵丁。爲之娶妻給田。以贍其家。寇入。人心奮勇。追剿之。捷聞。陞正卿。以都御史巡撫貴州。條奏鄉試不宜遠赴雲南。士林德



之。  
舊志

徐可成。懷來衛人。始祖寶。於洪武三年。從軍有功。授世襲懷來衛正千戶。九世至可成。性抗爽。補衛庠學生。崇禎十七年。流寇入城。即憤不欲生。數謀狙擊賊首。以友人諫而止。清定都燕京。率師西征。至懷來城下。闖賊僞官解某。據城抗拒。人情惶惑。莫知所向。可成厲聲責衆曰。流賊兇逆。義不與之俱生。夜縋城出見。並請大兵退十里。許之。可成率城中義勇。斬賊衆殆盡。手縛解某至縣。全城得免糜爛。卒年八十有二。崇祀鄉賢。

徐元佐。字伯純。性爽豁。孝友。讀書十行俱下。世本將家子。元佐獨以文名。弱冠入延慶學。食餼於庠。爲督學王吳廬所賞識。因鄉試不售。即閉門讀書。教子。雍正間。選授武強訓導。不赴。以明經終老。註有文昌衍義三卷行世。懷來



舊食蘆鹽。民苦之。康熙間。商民訴訟。釀成巨案。經直撫于成龍奏明。聽民包課。永食彝鹽。民至今便之。元佐拮据調護。與有力焉。卒祀鄉賢。

席介麟。字瑞符。縣城人。清道光己亥舉人。性寬和。喜怒不形於色。家貧好學。爲文不阿時好。讀其文者。雖愛之而弗能學。即學焉亦弗肖。然好誘掖後生。與人言。勤懇無倦。得其指授者。已翹然自異於人。子二。長樹馨。登進士第。歷任四川長甯峨眉南溪等縣知縣。著有政績。次子樹芳。邑庠生。孫曾林立。皆能世其業。卒年六十三歲。學者稱之曰石貞先生。

李鴻川。本縣人。增貢生。清光緒十八年。幫辦採購皇糧。救濟災黎。刑部主事錢開佑。請授五品頂戴。二十六年。拳匪蠶起。擾害地方。縣令特請出爲彈壓。八國聯軍。迫進北京。兩宮西幸。縣城成爲殘兵潰勇蹂躪。鴻川奮不顧身。跪



請毅中堂留兵數營。地方得免蹂躪。嗣因辦理洋差。結束教案。縣令保請獎授藍翎五品頂戴。三十年。任縣城高等學堂學董。籌款興學。不遺餘力。宣統三年。充勸業所所長。於城南開三里渠一道。灌田十餘頃。村民公送「水利福民」匾額一方。以表感戴。

趙世和。字賡唐。世居懷來縣之新保安鎮。剛毅負氣。童時入塾。卽不喜帖括。獨以節義自持。樂賑貧困。意豁如也。稍長。服務梓里。善排解。是是非非。無所諱忌。里中權豪。皆敬憚之。清光緒十四年春。山洪暴發。鎮東北棗兒口村壩口。及護城各壩。俱遭冲圯。地方受患最烈。因慨然捐資募修。以倡翌年。督工築壩。堅牢倍往昔。里人至今稱頌。鎮西有恩民渠。溉田數百頃。因渠身近宣化縣屬之水泉村。頗生糾紛。十七年秋。獨捐貲八百貫。相地勢高下。移渠身



於南。墊渠爲路。鑿路爲渠。水性於是大順。糾紛亦絕。二十三年。以掌理渠務。爲人誣陷。家貲毀其大半。蒙冤不辯。輿論惜之。三十一年。縣署提用潔陽書院學款。本鎮士紳力爭不得。世和出私財六百貫。求某紳始免提。後本鎮大興學校。皆潔陽書院款也。翌年。復質地得四百餘貫。捐創三教寺女校。自任教師。時口北尙無女校。女子讀書。世俗目爲怪異。苦口勸導。始有學生六七名。朝夕由校買車迎送。書籍雜費。亦由家貲挹助之。時宣化王守堃太守。頗知提倡教育。聞世和名。力聘任宣府十屬視學。辭不獲已。以勢難兼顧。乃移交女校。歸地方接辦。今本鎮女子教育。譽馳遐邇。思源溯本。君之力也。清末政治日壞。毅然加入同盟會。往來晉魯間。聯絡志士。以謀光復。鼎革後。與李六更等。組共和講演團於舊都。任總隊長。自號醒鐸。深觸時忌。民國二年。臥



病故里。竟至不起。年六十有四。平生絕意仕進。急急以造福梓里。復興中華。爲職志。鬻家產。遭憂患。未嘗有憾於心。奇節偉行。蓋有至性存焉。

### 陽原縣鄉賢

范升。字辨卿。代郡人也。少孤。依外家居。九歲通論語孝經。及長。習梁邱易。老子。教授後生。莽大司空王邑。辟爲議曹史。升奏記不用。稱病乞身。邑不聽。令乘傳使上黨。遂與漢兵會。因留不還。建武二年。光武徵詣懷臺。拜議郎。遷博士。上疏讓曰。臣與博士梁恭。山陽太守呂羌。俱修梁邱易。二臣並耆艾。經學深明。而臣不以時退。與恭並立。深知羌學。又不能達。慚負二老。無顏於世。願推博士。以讓恭羌。帝不許。然由是重之。數詔引見。每有大議。輒見訪問。時以尙書韓歆上疏。欲爲費氏易。左氏春秋。立博士。詔下其議。四年正月。朝公卿。



大夫博士見於靈臺。帝曰：范博士可前平說。升起對曰：左氏不祖孔子，而出於邱明，師徒相傳，又無其人，且非先帝所存，無因得立。遂與韓歆及中大夫許淑互相辨難。退而奏左氏之失，凡十四事。時難者以太史公多引左氏，升又上太史公違戾五經，謬孔子言，及左氏春秋不可錄者三十一事。詔以下博士，後升爲出妻所告，坐繫得出，還鄉里。永平中爲聊城令，坐事免，卒於家。

後漢書  
本傳

魏子平，字仲均，宏州人。

牧菴文集  
作順聖人

登進士第，調五臺簿，累除爲尙書省令

史。歷左司都事，同知中都轉運使事，太府監。正隆三年，爲賀宋生日副使。是時海陵謀伐宋，子平使還入見，海陵問江左事，且曰：蘇州與大名孰優？子平對言：江湖地卑濕，夏服蕉葛，猶不堪暑，安得與大名比也。海陵不悅。世宗即



位。除戶部侍郎。大定二年。丞相僕散忠伐宋。置元帥府於南京。子平掌饋運。糧道給辦。進戶部尙書。六年。復爲賀宋生日使。上曰。使宋無再往者。卿昔年供河南軍儲有勞。用此優卿耳。久之。拜參知政事。上問子平曰。古者稅什一而民足。今百一而民不足。何也。子平對曰。什一取其公田之入。今無公田而稅其私田。爲法不同。古者有一易再易之田。中田一年荒而不種。下田二年荒而不種。今乃一切與上田均稅之。此民之所以困也。上又問。戍卒逋亡。物故。今按物力高者補之。可乎。對曰。富家子弟。驂懦。不可用。戍守。歲時求索無厭。家產隨壞。若按物力多寡賦之。募材勇騎射之士。不足則調兵家子弟補之。庶幾官收實用。人無失職之患。上從之。上令內任官六品以上。外任五品以上。並舉所知。未有舉之者。子平請令當舉之官。每任須舉一人。澤州刺史



劉休裕。祁州刺史斜哥。滄州同知訛里也。易州同知訛里刺。楚邱縣令劉春哥。以賊汗抵罪。上欲詔示中外。丞相守道以爲不可。上以問子平。子平曰。臣聞懲一戒百。陛下固宜行之。上曰然。遂降詔焉。宋人於襄陽漢江上。造舟爲浮梁三。南京統軍司聞而奏之。上問宰相曰。卿等度之。以爲何如。子平曰。臣聞襄陽薪芻。皆於江北取之。殆爲此也。時河南統軍使宗叙入見。奏邊事。上使修起居注黏哥幹特刺問狀。宗叙言得邊報。及宋來歸者。言宋調兵募民。運糧餉。完城郭。造戰船浮橋。兵馬移屯江北。不可不備。幹特刺召凡言邊事者詰問。皆無實狀。行至境上。問知襄陽浮橋。乃樵采之路。如子平策還奏。詔凡妄言邊關兵者。徒二年。告人得實。賞錢五百貫。十一年罷爲南京留守。未幾致仕。十五年起爲平陽尹。復致仕。二十六年。薨於家。

金史本傳。



楊惟中。字彥誠。宏州人。金末以孤童子事太宗。知讀書。有膽略。太宗器之。年二十。奉命使西域三十餘國。宣暢國威。俾皆籍戶口屬吏。乃歸。帝於是有大用意。皇子闢出伐宋。命惟中於軍前行中書省事。凡得名士數十人。收伊洛諸書送燕都。立宋大儒周敦頤祠。建太極書院。延儒士趙復王粹等。講授其間。遂通聖賢學。慨然欲以道濟天下。拜中書令。定宗即位。平陽道斷事官斜徹。橫恣不法。詔惟中宣慰。惟中按誅之。大明川賊。用亡金年號。聚衆數萬。剽掠數千里。詔會諸道兵討之。不克。惟中仗節開諭。降其渠帥。餘黨悉平。憲宗時。世祖以太弟鎮金蓮川。專封拜。立河南道經略使於汴梁。以惟中爲使。總管劉福。貪殘鄙酷。虐害遺民。二十餘年。惟中至。詔福聽約束。福稱病不至。惟中設大梃於座。復召之。使謂曰。汝不奉命。吾以軍法從事。福不得已。以數千



人擁衛見。惟中即握大梃擊仆之。數日福死。河南大治。遷陝右四川宣撫使。時諸軍帥橫侈病民。郭千戶者尤甚。殺人夫而奪其妻。惟中戮之。關中肅然。語人曰。吾非好殺。國家綱紀不立。致此輩賊害良民。雖欲不去。得乎。歲己未。世祖總統東師。奏惟中爲江淮京湖南北宣撫使。俾建行臺。以先啓行。宣布恩信。蒙古漢軍諸帥。並聽節制。師還。卒於蔡州。中統二年。追諡忠肅。元史本傳。魏初。字太初。金翰林修撰璠之從孫也。璠無子。以初爲後。初好讀書。尤長於春秋。比冠有聲。中元元年。始立中書省。辟爲掾史。兼掌書記。未幾以母老辭。隱居教授。會詔左丞許衡。學士竇默。及京師諸儒。各陳經史所載前代帝王嘉言善政。選進讀之士。有司以初應詔。帝雅重璠名。方之古直。詢知初爲璠子。嘆獎久之。即授國史院編修官。尋拜監察御史。首言法者持天下之具。御



史臺則守法之司也。方今法有未定，百司無所持循，宜參酌考定，頒行天下。帝宴羣臣於上都行宮，有不能齏大卮者，免其冠服。初，上疏曰：臣聞君猶天也，臣猶地也。尊卑之禮，不可不肅。今內有太常有史官，有起居注，以講典禮，記言動。外有高麗安南使者入貢，以觀中國之儀。昨聞錫宴大臣，威儀弗謹，非所以尊朝廷正上下也。疏入，帝欣納之。仍諭侍臣：自今毋復爲此舉。時襄樊未下，將括民爲兵，或請自大興始。初言京師天下之本，要在殷盛，建邦之初，詎宜騷動，遂免括大興兵。初，又言舊制常參官、諸州刺史，上任三日，舉一人自代，况風紀之職，與常員異，請自今監察御史、按察司官，在任一歲，各舉一人自代。所舉不當，有罰。不惟砥礪風節，亦可爲國得人。遂舉勸農副使劉宣自代。出僉陝西四川按察司事。歷陝西河東按察副使，入爲治書侍御史。



又以侍御史行御史臺事於揚州。擢江西按察使。尋拜侍御史。行臺移建康。出爲中丞。卒年六十五。子必復。集賢侍講學士。

元史本傳。

崔彧。字文卿。宏州人。負才氣。剛直敢言。世祖器重之。至元十六年。奉詔訪求江南藝術。明年除集賢侍讀學士。阿合馬伏誅。彧言其黨阿里宜治罪。郝禎宜剖棺戮尸。從之。二十年。由刑部尙書。御史中丞。上疏言時政十八事。一曰。開廣言路。多選正人。番直上前。以司喉舌。庶免黨附壅塞之患。二曰。當阿合馬擅權。臺臣莫敢糾其非。迨其事敗。然後接踵隨聲。徒取譏笑。宜別加選用。其舊人除蒙古人取聖斷外。餘皆當問罪。三曰。樞密院定奪軍官。賞罰不當。多聽阿合馬風旨。宜擇有望聲者爲長貳。庶幾號令明而賞罰當。四曰。翰苑亦頌阿合馬功德。宜博訪江南耆儒碩望。以重此選。五曰。郝禎耿仁等。雖正



典刑。若此者尙多。罪同罰異。公論未伸。合次第屏除。六曰。貴游子弟。用卽顯官。幼不講學。何以從政。得如左丞許衡。教國子學。則人才輩出矣。七曰。今起居注不過奏事檢目而已。宜擇蒙古人有聲望。漢人之厚重者。居其任。帝王言動。必書之以垂法。無窮。八曰。憲曹無法可守。是以奸人無所顧忌。宜定律令以爲一代之法。九曰。官冗若徒省一官員。併一衙門。亦非經久之策。宜參衆議而立成規。十曰。官僚無以養廉。責其貪則苛。乞將諸路大小官。有俸者量增。無俸者特給。然不取之於官。惟賦之於民。蓋官吏既有所養。不致病民。少增歲賦。亦將樂從。十一曰。內地百姓。流移江南。避賦役者。已十五萬戶。去家就旅。豈人之情。賦重政繁。驅之致此。乞特降詔。招集復業。免其復來五年科役。其餘積欠並蠲。事產卽日給還。官滿替以戶口增耗爲黜陟。其徙江南



不歸者與土著一例當役。十二曰。凡丞相安童遷轉良臣。悉爲阿合馬所擯。或居散地。或在遠方。並宜拔擢。十三曰。簿錄奸黨財物。本國家之物。不可視爲橫得。遂致濫用。宜以之實帑藏。供歲計。十四曰。大都非上都。止備巡幸。不宜立留守司。此阿合馬以之位置私黨。今宜易總管府。十五曰。中書省有右丞。而左丞缺。宜改所增右丞。置諸左。十六曰。在外行省。不必置丞相平章。止設左右丞以下。庶幾內重。不致勢均。十七曰。阿刺海牙掌兵民之權。子侄姻黨。分列權要。官吏出其門者。十之六七。宜罷職理算。十八曰。銓選類奏。賢否莫知。自今三品以上。必引見而後授官。疏奏。卽日命中書行其數事。餘命與御史大夫帖木兒。議行之。時議再征日本。或言江南盜賊相挺而起。皆由拘刷水手。與造海船。民不聊生。激而成變。日本之役。宜姑止之。江西四省軍需。



宜量民力。凡給物價與民者必以實。召募水手。當從其所欲。伺民氣稍蘇。我力麤備。東征未晚也。又言度量大都州縣地畝。本以革權勢兼并之弊。而近者浮言胥動。恐失農時。宜省諭。各路歲選取室女。宜詔罷。宋思文院小口斛。出入官糧。無所容隱。宜頒行。自阿合馬奸狀敗露後。廷臣諱言利。而盧世榮桑哥復希旨進。世榮居中書未十日。或即劾其姦邪。不可爲相。忤旨罷職。踰年世榮誅。復召爲集賢學士。已而桑哥當國。乃出或爲甘肅行省右丞。二十八年三月。召拜中書右丞。尋遷御史中丞。奏言近者桑哥當國四年。中外諸官。鮮不以賄而得者。其昆弟故舊妻族。皆授要官美地。宜令兩省嚴加考核。桑哥所設衙門。其閒冗不急之官。宜令有司集議汰罷。大都高貲戶。多爲桑哥等所容庇。徭役皆貧民爲之。宜令今後徭役皆均輸。行臺御史周祚。嘗劾



行尙書省官奸貪。桑哥誣以他罪。流祚於愍答孫。家籍沒。揚州學正李淦。劾右丞葉李安舉桑哥誤國。乞斬之以謝天下。召淦詣京師。及是以彧言還祚妻子。除江陰路教授。以旌其直。先後論奏建甯總管馬謀。河間鹽運使張裔。宣慰使薛閣干。集賢詹玉。諸人不法事。皆逮治論罪。臺綱肅然。中書省請彧爲右丞。世祖曰。崔彧不愛其言。可使獨任言責也。世祖崩。彧得玉璽於故臣之家。文曰。受命於天。既壽永昌。卽上之徽仁裕聖后。后手授成宗卽帝位。於是彧居御史臺久。守正不阿。人多嫉之。乞遷他職。不許。已而御史奏彧任中丞且十年。非所宜。彧遂以病力辭。成宗諭之曰。卿之辭退誠是矣。然勉爲朕少留之。大德二年。加榮祿大夫。平章政事。命與翰林集賢議。特降詔條備選舉。是歲九月卒。至大元年。贈推誠履正功臣。太傅。開府儀同三司。追封鄭國。



公諡忠肅。

元史本傳。

王沂字思魯。金監察御史國綱曾孫也。祖振。元初徙真定。父元父。監黃池稅務。行事具馬祖常碣銘。沂登延祐二年進士。授臨淮令。同知嵩州。擢國史院編修。累官禮部尙書。有古學。精鑑識。由外吏歷躋館閣。總裁宋遼金三史。職文字者幾二十年。廟堂著作。多出其手。工詩。與傅若金。周伯琦。許有壬。陳旅。相頡頏。嘗以國子博士分校。得余闕卷。奇之。識其必爲名臣。後如所言。至正末。中原盜起。沂既老。乃北還鄉里。僑居山陰應州間。遇亂復携家南渡。不知所終。著有伊濱集。

劉伏玘。東城水地堡人。勇健敢爲。先是大同有王三者。犯罪逃出塞。以中國虛實告。爲其鄉導。嘉靖庚子辛丑。連犯晉陽。又聲言入寇。真保臨清。皆其謀。



也。甲辰冬，引寇衆犯蔚州。過順聖東城，王三以數十騎叩水地堡門，自稱曰：我大同王三也。其速飲我酒。衆欲擒之，不能。時伏玘老矣，私謂其子曰：即擒是，乃具酒匍匐以獻。三痛飲至醉，玘猶頓首示怖。三麾騎令卻，玘復懇曰：畏刀，三見其誠且老，易之。解所佩刀擲遠地。玘佯酌酒，遂拉以入堡。堡人皆鼓譟登陴舉礮，餘寇遁去。械三至京，伏誅。

李齊松，字永吾，父鈺以資起家。齊松由貢生，萬歷中同知宿州。煤井妖賊作亂，練義勇千人，躬督戰，敗之。築呂梁洪遙隄百里，論功遷東川通判。署建武同知，所至有政績。以母老辭歸。母歿，廬墓三年。崇禎甲戌，大兵入塞，援師集西城者數萬，餉不繼，勢洶洶。與弟齊梅出粟二千石以濟，民賴以安。卒祀鄉賢。



田秀字升三家世農所居牛蹠莊地斥鹵人病耕秀始鑿渠桑乾上流引水溉田四十餘頃孫浩諸生也與弟禧益廣其利濱河諸村多踵行之因號其渠曰通田迄今利賴禧孫持字執中以耆德稱子守成族子緯並有義行

李學沆字靖公乾隆己亥舉人選盧氏令盧氏大滑卞士奇嘗殺人滅跡歷數載無覺者學沆以他事鈎得之遂伏辜一縣稱爲神明職未滿調陳留甫入境颺風驟起揭輿簾去蹤之至一塋乃士人某新葬其父者父老病死無他異學沆終疑不釋一日忽蹶然曰吾得之矣立拘土工至喝曰爾何殺人而瘞諸某氏墳乎內三人猝失色刑訊稱其日方畚鍤有孤商過衆利其財殺之埋隧中者啓土果得尸其斂決如此汴人嘗作明冤錄記其決疑獄七子孫式微不能備舉故老僅傳二事云



張夔典。字友龍。陽原縣城人。光緒丁酉科拔貢。爲人一生敦品勵名。正心修身。初仕直隸清河縣教諭。民國初年。任山西和順縣知事。在官三載。成績卓著。其縣志云。張公品端學粹。廉潔自持。當張宰縣時。正值過渡時代。與自治員紳協力同心。共濟時艱。擬之漢循良。非過也。等語。本縣縣令嚴以盛褒。以品學兼優匾額。直隸教育廳。獎給二等獎章。卒年五十六。鄉人至今稱德不衰。

### 涿鹿縣鄉賢

孟應登。新城歲貢。萬歷丁酉。授河南盧氏知縣。剛果端介。性篤孝友。家貧。典衣葬父。動遵禮法。師教嚴正。誨兩弟諸生。前後遊庠者至衆。寡交遊。衣冠潔齊。人望而敬之。居官有惠政。優游林下。施藥濟人。口不言人過。衛庠有鄉賢。



自應登始。

馬德良字完秉。父鎧生。其弟德變多勇力。爲明武生。德良聰穎絕倫。讀書過目不忘。總角探芹。治舉子業。博涉藝文。性高明。多義氣。有不可一世之概。崇禎癸酉舉於鄉。爲文特苦。每日脯始成一藝。或睨而笑。恚曰。余如肯爲若所爲之辭。斯時百數十就矣。其不苟如此。崇禎甲戌。清兵入保安。馬以家行。居遼十二年。不仕。僦居校書。躬耕負薪。雖食於田。宿於野。未嘗忘纂掇。茹粗糲。衣藍縷。無希世意。癸未秋卒。妻朱氏殉焉。弟德變及婦王氏。是日亦組頸死。狀上。賜棺殮。詔褒獎之。

朱啓字霽亭。鸞之孫。益暉之子。光其高祖也。世宦清貧。啓遊庠後。以筆代耕。尤力學。乾隆壬午舉人。後試用河南。資斧乏缺。撫院嘗給薪米。時值浙川漕



沒。差委賑濟。巾車往。日夜竭力辦理。補內鄉縣任。以仁慈著。庚子任浙江鄉試同考官。丁憂解綬。獄囚不忍其去。泣聲震耳。服闋。部選海豐縣令。任三冬。海寇爲患。啓召募壯丁。日給花邊錢文。捕緝羣盜。三月始平。明年大旱。八月霜降。民饑饉。啓爲請賑。活民無數。壬子乙卯。同考試官。又明年告歸。家無私積。仍守清貧。年七十七而卒。著愛翎集。

王正養。字粹然。恩貢生。自少知名。誠懇孝親。生事塋祭。衆咸羨其孺慕。外祖朱家中落。墳墓祭掃。正養親理之。性明銳。不詭隨。惟遇有裨政教者。即勇爲。恐後。同治元年。州牧李作堂。倡修城垣。聘爲督理。義不敢辭。然年逾六十。過勤則喘。計工堅節靡費。怨勞胥任。歷年餘弗衰。先是新州書院。城關義學。州牧李素亭。以膏火之素廉。酌捐經費。正養賢之。遂先任捐以爲倡。凡豫其事。



者。養復加獎勵。因是經費充裕焉。八年應禮賢館之聘。初謁曾文正公。即以維名教。伸正氣相囑。其爲器重如是。卒年七十八。

楊福五。字介堂。欽加道銜。父源懿。行載前志。母范恭人。享年俱八十。孝養之篤。於君稱最。昆仲五人。敬愛無不備至。家初貧。設館授徒。不專以帖括爲務。六經性理。及古今名臣言行錄。日夜研窮誦習。如不及。道光乙亥。由選拔登賢書。庚子成進士。任山東莘縣縣令。旋丁內外艱。讀禮家居。服食不異寒素。嘗謂相知曰。文章經濟。吾輩不能與古人爭一二。但功崇惟志。業廣惟勤。亦當以刻勵庶幾之。服闋後。赴原掣福建省。歷任羅源長泰詔安等縣。薦陞知府。歷任漳州延平府事。以巡獲海寇。計擒竄匪。賞戴花翎。君有守有爲。無論任何府縣。類能以簡廉強毅之心。靖邊方。安黎庶。年六十一。積勞成疾。卒於



任所事聞。賜卹。恩廕一子。詔安士民。不忘其德。合辭籲懇。恩准入祀名宦祠。同治十一年。州紳耆公列君孝友十數事。請祀鄉賢。光緒元年六月入祠。

劉緯。字鎮九。貢生文玉之長子也。天資高明。凡經史子集。無不淹貫。而尤邃於四子書。與生徒講解時。講畢。即執筆另作解義。以開啓其思想。一時遊其門者甚衆。遠方子弟。皆負笈接踵而來。樂育賢豪。如遇寒儒。則不受修脯。並給衣食。以成全之。工制藝。詞賦。書法。清同治庚午。學政賀壽慈。案臨宣化。古場試賦題。學以愈愚。揮筆成詞。多用古語成句。賀閱畢。於宣化十屬古場貼榜外。另貼獨榜。以示優異。且謂十屬教官曰。我輩試古場。若遇此等題目。恐未必如劉生之熟練引古也。不意塞北竟有如此卓越人才。試文場。詞亦古雅相稱。遂專函送赴保定蓮池書院肄業。性孝友。先是與弟縉同考優貢。君



獲中弟落第。是歲與弟又同入秋闈。對弟課。力加勉勗。及放榜。君竟連中。而  
縉又落選。緯深惜之。鄉里不第仰君之學。尤服君之德厚焉。享壽六十而終。  
王振鐸。字高軒。世居涿鹿城裏倉西。清歲貢生。智勇深沉。任俠尙義。光緒二  
十六年。拳匪肇亂。威逼州牧。全縣鼎沸。如臨大敵。君知不可理喻。奮不顧身。  
以槍擊之。有勇士安德麟。寵有功者。重公之義。悉奮臂而前。擒匪首數名。餘  
衆奔竄。全城得安。時鄰縣雙樹村。避難者苦乏食。君速籌鉅款。親往慰撫。教  
民賴之以安。嗣聞各國聯軍西來。人民驚惶失措。君陳州牧。函聯軍。詳述涿  
邑擊散拳匪。撫卹教民各情。聯軍入境。復親身往。以實告。遂秋毫無犯。闔邑  
保安。自光緒二十五年至三十年。籌辦練勇。保衛地方。躬冒矢石。屢破要案。  
已詳於江收續修縣志。茲不再贅。君廣具興學之功。在科舉時。力籌鉅款。作



賓興文會之費。清末庚子辛丑等科。鄉試中式多名。與有力焉。及停科舉。興學校。即先籌款興學。任小學校校董。兼任警董之職。光緒二十九年。往鄰縣水谷村剿匪。獲賊銀。陳明州牧。悉入高小校。計銀千兩。前因教案賠款至鉅。陳州牧轉詳大吏。准減免。以其餘入高小校。計五千兩。三十一年。復籌資選送學子赴日本留學。成就者八九人。涿邑之新教育。遂勃然興。繼充勸學總董。勸學所長。前後興學。計高小一。初級師範一。兩等女校一。各鄉校三十餘。輕財重義。不計報。凡戚族有貧乏者。每解囊助。有族叔母胡氏。子振鏞。振銓。家酷貧。乃衣食之。月供給十餘年無間。母子相繼以歿。代理喪葬。悉如禮。有祝某者。徐州人。工養蠶。厚給工資。令司蠶職。祝忽染暴疾死。醫藥衣衾棺葬等費。慨然任之。無吝色。次年祝某子。迎父柩。更助以旅資。遣回籍。邑人有張



某者。陷於繯絀。家人深夜懷金遺君。意託緩頰。君引楊震四知事。婉言謝。其慎獨行。重操守。有如此者。君孝友性成。事父母先意承志。教授胞弟振鈞。勤懇善誘。甫入泮而歿。遺兩姪。撫養教訓。如己子。君壯年。設帳授徒。講學以先器識。後文藝爲宗旨。晚年鑒於實業爲強國基。輒研究工商格致之學。著興辦工商業專書。宣統元年。種桑養蠶。提倡農業。光緒二十八年。因剿匪出力。總督袁。賞給五品頂戴。三十一年。又奏請獎給縣丞。歸部候選。民國十年十月。大總統黎。褒給以永令譽匾額一方。褒狀一軸。積勞成疾。卒於民國九年八月。壽六十有八。

呂相周。字望卿。世居本城南關正郎巷。恩貢生。生平守正不阿。家有祖遺祭田。由闔族輪流管理。供每年祭掃需。至光緒二十年。族有倡按股分售之議。



者。公力持正誼。反覆抗爭。卒乃他支所分得者。聽其自由。惟長門應得欸。仍由長門一支。輪流經理。不移作他用。迄今四十餘年。祭田良法。猶有一部分。保存勿替。公之力也。公求學以躬行爲主。在鄉設帳授徒。嘗曰。士先器識。而後文藝。本原不足。徒肆力於詞章。直浮薄士耳。夫何足取。故義方之訓。六子皆有所樹立。光緒二十六年。義和團起。鄉里震驚。雖士大夫。亦多爲感。公謂諸子曰。此左道也。爾等勿多言。嘗引司馬光儉訓以教其子曰。衆人皆以奢靡爲榮。吾獨以儉素爲美。衣取蔽寒。食取充腹。亦不敢垢敝以矯俗干名。但順吾性而已。長子震字竹塘。長高小學校有年。造就殊宏。及子復字健秋者。任教育次長。適當先生與太夫人七旬。晉一晉五之辰。公子輩謹序言行。徵文海內。公禁之弗及。謂戚友曰。兒輩太事鋪張矣。公之方補弟子員也。家貧。



惟藉館金資事畜。入不抵出。債日積。罄館穀所入。但償負息。度用無出。典鬻而已。然不怨不尤。泰然自得。及健秋被選議員。繼任次長。六子咸字著善。先後充任工商財政廳長。族戚賀者盈門。公答謝而喜色不形於面。蓋公宅心無私。常安於理。雖外物有窮通得失之變。公則始終如一。氣數莫得而囿。所謂有松柏之操者也。宣統乙酉。徵辟孝廉方正。民國二十年卒。年七十有七。

四川傳增湘。爲撰墓誌銘。甚詳。夫人全氏。見列女傳。

薛世美。字濟堂。恩貢生。名孝廉。朱公元黼之高第弟子也。性至孝。侍雙親。定省奉養。無不曲意承歡。親歿喪葬盡禮。遇忌辰。茹素設祭。終身奉行不懈。設帳授徒。遊於門者甚衆。其教人以躬行實踐爲主。並示以讀書人要學得一忍字。去丟一矜字之箴言。遇寒士可造者。不受修脯。一時多士濟濟。入庠食



餼者。先後百餘人。其子姪及姪孫輩。亦秉庭訓。克自樹立。君出則優遊田畝。入則執筆著作。有耕畬堂詩集。歷代疆域河渠考略等書。藏於家。性不信佛。嘗曰。因果由人自種。種瓜得瓜。種豆得豆。此即因果之實證也。輕財重義。商號瑞成明。因賠累歇業。執事曹步青。被控押追。時欠君錢三千餘吊。或以乘機控追相勸。答曰。落井下石。義士不爲。阿堵物不過儻來。作指困之贈可也。遂銷其券。宅巷口。有水渠一。夏間常淹大路。乃獨力修石橋。以便行人。遇貧病者。常施藥救濟。年八十三。精神矍鑠。手不釋卷。閱報章。有關經世者。手自抄錄。可謂耄年勤學。有子五。長葆蒼。務農。次葆華。廩貢生。三葆茹。領鄉薦。四葆芬。食廩餼。五葆芸。入邑庠。均恪守家訓。能自成立。孫輩培晟。培曦。培暄等。均先後畢業於大學。人皆以爲食善之報焉。卒於民國十一年。壽八十六歲。



王際隆。字興文。歲貢生。任薊州訓導。保陽法政畢業。性孝友。事父母。服勞奉養。無不周至。父歿。寢苦枕塊。水漿不入口者三日。茹素百日。母晚年患癱症。家故貧。醫藥不惜參茸品。母卒。君年已六十。仍欲行古禮。經子縝泣諫以六十不毀之言。始進飲食。仍茹素百日。胞妹適溫某。夫無賴。積債鉅。棄妻遠颺。十餘載無耗。君供其柴米無缺。一日溫忽歸。貧困依然。君仍周給之。已而溫卒。遺子體春。君教養如己子。及長。就警察職。而溫氏之祀以存。君重義氣。喜扶危定傾。沙城李某因爲商票擠兌。將倒閉。君爲之奔走告貸。典衣飾以救之。鄰人閻玉。死無棺木。慨助以資。得殮葬。鄉里戚友。有求於公者。多慷慨應之。往往轉貸以救其乏。學問淹貫。精於易。文章詞賦。亦各擅長。壯歲設帳沙城。誨人無倦。遊其門者多高弟。任宣化中學校長。教員等職。講經史。旁徵博



引義理精詳。遇授左傳時。太守高君。每列席虔聽。課畢。喜謂諸生曰。爾輩得師如是。當如坐春風而沾化雨。枝榮葉茂。不難勃然鬯發。願善事之。又精岐黃術。任中學師範兩校醫士十餘年。投劑卽愈。應他乞醫者。亦寒暑無間。數十年。起沉疴。不知凡幾。民國二十二年。積勞成疾。囑其子孫曰。當求學問。養技能。作社會一好人。吾死瞑目。必欲積財爲富家翁。非吾志也。及卒。家無儋石儲。而聞訃奔奠於門者。接踵至。壽七十有八。

李敬修。字濟生。縣屬三道溝村人。清光緒庚辰進士。殿試欽點翰林院庶吉士。散館。以知縣用。加同知銜。授山東平陰縣知縣。癸巳秋。淫雨兼旬。黃河陡漲。將爲民患。君親帥民夫。於洪濤巨浪前。築隄防守。四十餘日夜。得免水患。一日。冒雨督工。忽狂風駭浪。舟爲傾側。君屹立不動。民夫驚呼。使君避去。君



笑曰。苟不爲吾民患。余得死所矣。已而舟定。平肥兩縣界民爭種黃河淤田。毆訟數十年不決。君遂集兩縣紳民諭之曰。爭爲利也。多年相仇。利何在。盍如相讓而利溥乎。於是規定分種之法。民大服。勒石爲誌。事遂寢。是年保卓異。傳旨嘉獎。翌年調署費縣。民情强悍。下車月餘。命盜案三十九起。君施教化。辦保甲。恩威並用。不數月。民風丕變。盜亦肅清。翌年調充本省鄉試收卷官。八月調補章邱。十一月黃河暴漲。淹沒百餘村。一方捐廉倡賑。一方擇地遷民。全活人民萬餘。明年夏秋之交。黃水又漲。竭力防守。不安寢食者月餘。水悉平。八月充本省鄉試同考官。是年保卓異。傳旨嘉獎。冬請終養。三上乃許。君性仁孝。父母有疾。夫婦躬侍。衣不解帶。父母歿。殮葬以禮。庚子亂後。南山一帶。土匪充斥。君辦保甲。練鄉勇。命子岱爲管帶。君倡捐募勇。親爲訓練。



隨時指示勦匪機宜。不半年而土匪斂跡。事見江開泰續保安州志。光緒三十三年。任山東諸城縣知縣。下車伊始。以獄囚多。按之再四。悉非其罪。釋之。是縣多教案。膠督以袒民仇教。函請總理衙門查辦。時總理某。素悉君之爲人。曰。烏有是。李令廉直。在人耳目。遂置其事。君宦遊二十餘年。不事夤緣。不畏權勢。是以屢保卓異。蒙嘉獎。而不得升遷也。卒年七十四。

胡侗。字致堯。居涿鹿城裏。清光緒十四年歲貢。二十八年六月。因辦理教案。賠款出力。總督袁賞給五品頂戴。君爲人勤儉端方。敦孝友。重廉潔。家寒。以課徒自給。與諸生講學。恒以敦品勵行爲先。出其門者。率多氣節之士。自奉菲薄。事親必以甘旨。家雖分爨。待兄弟不分畛域。有弟名价。分居不務正業。家產蕩然。君憐之。招與同居二十餘年。价死。又爲之營葬。所遺一子。名廷玉。



君撫養成人。後亦能自樹立。有表嫂趙。夫卒無嗣。甘守節。而衣食無資。氏甚憂。君引爲己任。玉成其志。奉養四十餘年。七十壽終。衣衾葬祭。悉爲之備。鄉里義之。嘗有桃源村貧兒。十餘歲。乞食於街。君問之。父母俱亡。君收撫。而課以讀書。三年餘。始遣回村謀他業。君課徒四十餘年。貧苦生。概免費。寒士多賴以成就。歷辦地方公益。如橋梁義學書院文廟等。盡心擘畫。收入欸項。悉公開。無浪費。無侵蝕。正直廉明。爲人所敬畏。地方遇有興革事宜。歷任長官。無不禮聘諮詢。其爲官紳所倚重如此。卒於光緒三十一年二月。壽六十有九。生四子。俱入庠食餼。克自成立。而孫枝亦盛。人謂厚德之報。

閃欽辰。字紫明。保定優級師範畢業。奏獎舉人。係殉身國家武進士煜龍之後裔也。秉性剛勇。立志高遠。在保定優級師範北京國立大學肄業時。每以



馳騫空談。不重實行。爲晚近儒士一大陋習。歷充順直省議會議員。綏遠中學校校長。財政廳科長。東勝武川兩縣知事。成績斐然。民國九年。署山東掖縣知事。不留案牘。盡剔陋規。清廉自持。明勇果斷。其振興教育。改良風俗。建造林業。悉有政聲。交通部獎給一等二級獎章。農商部獎給二等獎章。司法部獎給二等金獅豸獎章。大總統獎給五等嘉禾章。君殷殷望治。急公忘私。因辦理植樹。勞頓過度。膺疾而卒。時年四十三。邑民聞耗。如失父母。聯名請卹金。復立遺愛碑。先是君之業師康君敬山。光緒丁酉舉人。官遊黔省。十二年歿。家本寒素。環堵蕭然。其母及妻等歸後。饑寒交迫。民國八年。適君咨調山東。歸省。聞之。召集同學會議。首捐數十金。學友親朋。羣捐數百金。存商生息。爲給養資。其母及妻先後歿。時君亦歿。君之胞兄撫辰。以存儲之欸。爲之



經理葬事焉。

懷安縣鄉賢

岳倫。字厚夫。號雲石。系出武閩。於書無不通。尤長毛詩。嘉靖壬午。貢入太學。是年秋。順天鄉試。入魁選。丙戌。試禮闈。試官廖桐埜。稱其文當爲命世才。登進士第。授行人。奉使河南。見道殣相望。即請蠲賦發粟。賑活饑民。庚寅。轉司副。抗疏論閣臣專擅。謫判齊東。已而攝宰蒲臺。章邱。淄川三縣事。再遷曲沃。所至飭僚佐。肅胥吏。贍貧窮。誨子弟。政績燦然。大同兵變。倫在曲沃。具疏陳。征討大計。剴切詳明。朝論韙之。召拜工部主事。尋陞員外郎。郎中。時城鞏華。往監役。節廩省財。課工勿繁。己亥。世廟巡江漢。戒行。倫上疏極諫。廷杖下詔獄。未幾放還爲民。廷臣交章薦爲權臣抑。竟不果起。倫居家。著詩文自娛。又



以陽明學術誘啓後進。每聞寇警。彈劍抵掌。志在封狼居胥。縉紳大夫過談邊務。卽終日亶亶不倦。惜未竟大用。年五十二歲卒。隆慶初。子魯疏請卹錄。詔贈太常寺少卿。崇祀鄉賢祠。平生著有奏疏及應試諸篇什。號雲石集。傳於世。

張士第。字兩樂。教授善之三子也。博學多才。由萬歷年間選貢。任陝西米脂縣。時米脂四載奇荒。寇盜充斥。疲癯載道。甫下車。卽力爲民請蠲賑。給牛種。申議督剿。懸賞撫禦。諸大計。日夜拊循。不遑假寐。有賊衆圍城。登陴礮以順逆。皆感泣散去。城獲全。縣素有點吏。羅織無辜。爲地方害。廉得其實。卽日置諸法。涖任數月。小民恃爲保障。漸以甦息。病作告歸。邑人遮道攀留。如失父母。崇禎末。闖賊寇懷安。詢知士第里居。稱爲好官。插箭門首。相戒勿入。邑賴



以不擾鼎革後黃冠野服閉戶著書自號無名氏年七十餘一日賦生順死安詩談笑而卒有感鳴草諸什行世。

李汝楨字疊山浙江布政綸之猶子也少聰穎十三入邑庠十五食餼二十三爲拔貢生選陝西盩厔縣縣丞不妄取一錢開釋冤獄以卓異陞夏縣知縣時探礦閹宦爲虐君骨鯁相持遂棄官歸行李蕭然宴如也既家居恪敦行誼有兄子紹芳六歲而孤其父遺金四百九十四兩爲貯之一切殮葬大事皆身任不以取動分毫逮紹芳長舉所遺還之封識宛然兄女適左衛指揮賈某耗官錢二百餘金坐贓當替世職力爲代措完官價獲免議天啓間賊寇境捐貲率鄉人修築城垣置辦火藥等具武備以充之懷安舊無市集貿易苦爲牙儉刁難申議立集三日一市禁贗僞平秤斗至今鄉民稱便其



他義行。未易更僕數。年七十有四卒。

郭之俊。字髦伯。柴溝堡人。登順治己丑武進士。性介直不阿。勇於愛民。初任山海衛守備。時灤州替出地畝。民未實受。俊爲民叩請。乃得清還。再遷赤城衛。會辦差。絲粒不以擾民。民德之。爲立生祠。終任江西贛州府參將。宦歸。囊空如洗。歿之日。舊轄衛民。有不憚千里而來奠輓者。

安定邦。本城人。乾隆癸卯科武舉。充兵部差官。有奇略。膂力過人。善挽強弓。馳奔馬。遇敵無衆寡。輒勇毅當之。有敢戰名。嗣逆苗倡亂。奉旨征剿。自乾隆六十年起。至嘉慶十年止。大小百餘戰。劫賊營無算。擒獲首逆王囊仙等十數人。軍功列最。賞戴花翎。歷任瑪納斯協副將。署巴里申鎮總兵。因病致仕。尋卒。



宗光烈字灼亭。道光乙酉拔貢。湖南候補直隸州州判。歷署綏寧縣城步縣知縣。辰州府通判。乙未丁酉。充湖南鄉試收卷官。任城步時。縣多盜。烈下車。捐俸庀材。按巷口設柵。詰禁加嚴。盜遂斂迹。士民歌之曰。先生風度誠高古。先生德教超寰宇。循良績著蒲之陽。期月政成欣樂土。後補永州府經歷。卒於官。

張好生字樂軒。光緒己丑科舉人。戊戌大挑一等。以知縣用。喜翻閱清律。善折獄。光緒二十四年。在晉。先充發審局帮審官。定讞成績特優。以卓異記名。特委榆太坐賈委員。尋代理太谷縣知事。民皆愛戴。爲懸甘棠遺愛匾額。未及三月。尋卒。年五十有二。

龍關縣鄉賢



李遵度字式玉。父業農。命以耕。力弗能任。見鄰館讀書。甚喜。請於父。欲就學。因送之黨塾中。穎悟過人。家貧。紙筆乏貲。試破筆以窗紙寫之。塾師與同儕講說。即爲傾聽。不數年。學問大進。補邑庠生。復拔貢成均。方其下帷蕭寺。朝夕飯一盂。有古人畫粥之風。奮志揣摩。讀餘學草書。能以左手揮灑。曲折盡致。歲乙酉。值清定鼎之年。年甫三十。欲赴順天應試。缺資斧。躊躇未決。夜夢伽藍神告曰。汝今科必售。盍亟往。醒以告妻。妻脫簪珥資之。榜發。果領鄉薦。丙戌成進士。授浙江德清令。時寇盜充斥。乃練義勇。繕甲兵。擒其渠魁。餘黨悉散。視事五載。訟簡刑清。地方寧謐。爲忌者所中。落職家居。惟日以詩文自娛。至其孝友性成。一堂雍睦。尤足爲後學師表云。

竇文。字質夫。燕山禹鈞。其遠祖也。元順帝時。從軍籍定遠。明永樂間。以軍功



調龍門。遂籍焉。至八世名綱。經歷浙江布政。陞潞安通判。政績甚懋。文之高祖也。文生而穎敏。博涉經史。多著述。寺廟碑文。皆其手撰。龍關八景。乃其創也。殆藝壇之錚錚者歟。以歲貢任循輝同知。致仕歸里。修家譜一卷。繪風木遺史十餘幅。以寓思親之意。孝行篤摯。略見一斑。崇祀鄉賢。

倪尙忠。宋肖泉凱五世孫也。世襲指揮僉事。萬曆六年。充左參將。分守宣府中路。駐紮葛峪堡。十三年。又分守宣府西路。十九年。充副總兵。協守大同。旋陞總兵官。鎮保定。並管大寧都司。定州衛所。及紫荆倒馬等關。先是防守金家等莊。適兵備巡邊。詢一切險阻要害墩台事務。主將不能對。忠對如指掌。兵備奇之。後遇寇警。忠子身探虛實。適寇率衆掠民間。忠至叱之。射死一人。餘皆逃散。生擒一人而歸。主將壯之。反爲參將。寇入口甚衆。麾下偏裨。屢請



禦之。君忠堅壁不動。將佐咸曰。不禦失機。咎將誰歸。請身率衆先禦之。忠亦弗許。會日暮。下令秣馬飽食。遂奮擊寇。寇驚怖退走。遂大破之。奪其輜重無算。後寇畏懼。不敢復入口。忠性孝友。念祖父舊勳。不可湮沒。故矢忠報國。獨任邊疆。數十年始終不怠。又素愛賢禮士。樂與名士交。即如侯官翁正南。充黃輝等。皆至好。所修家譜。皆三人手筆。派系詳明。詠題璀璨。士大夫以爲楷模。至於素嫻韜略。軍政嚴明。特其餘事耳。

赤城縣鄉賢

楊洪。字宗道。開平百戶。善騎射。成祖北征。至幹南河。獲人馬還。帝曰。將才也。令識其名。進千戶。宣德時。命城西貓兒峪。留兵戍之。敗寇於紅山。英宗立。累功進都指揮僉事。時先朝宿將都盡。洪後起敢戰。善出奇搗虛。未嘗小挫。中



朝大臣。并知其能。有毀之者。輒爲回護。洪由是得展其才。李謙守赤城獨石。老而怯。御史劾罷謙。以洪代。洪益自奮。屢有擒獲。進左都督。嘗建議加築開平城。拓龍門所。自獨石至潮河川。增置墩臺六十。十二年。充總兵官。鎮宣府。自宣德以來。迤北未嘗大舉。他將率異懦。洪獨敢戰。諸部憚之。稱爲楊王。帝北狩。道宣府。也。先傳帝命。趣開門。城上人對曰。所守者主上城池。天已暮。門不敢開。且洪已他往也。先乃擁帝去。景帝監國。封昌平伯。也。先逼京師。詔洪將兵入衛。比至。寇已退。追擊餘寇。至霸州。破之。還所掠人畜萬計。以功進侯。命留京師。督軍營訓練。掌左衛事。朝廷以洪宿將。所言無不納。嘗陳禦寇三策。又奏簡汰三千諸營將校。景泰元年。上皇還。予世券。明年夏。佩鎮朔大將軍印。還鎮宣府。居數月。以疾召還京。卒。賜祭葬。贈潁國公。諡武襄。妾葛氏自



經以殉。洪久居宣府。御兵嚴肅。士馬精強。爲一時邊將冠。頗好文學。親儒者。常請建學宣府。教諸將子弟。子傑嗣。早歿。無子。庶兄俊嗣。以罪奪爵。命其子珍襲。初俊守永寧。聞上皇還。密戒將士勿輕納。及還。又言是將爲禍本。上皇復位。張軛言于朝。坐誅。奪珍爵。戍廣西。憲宗立。授龍虎衛指揮使。洪兄子能信。能字文敬。沈毅善騎射。從洪立功。爲開平衛指揮使。累進左副總兵。協守宣府。天順初。以左都督爲宣府總兵。與石彪破敵磨兒山。封武強伯。信字文實。景泰中。累進都督僉事。代兄能協鎮宣府。上言每陣宜置鹿角十具。臨陣可捍敵馬。結營可衛士卒。遇敵團牌拒前。鹿角列後。神銃弓矢。相繼迭發。則守無不固。戰無不利。從之。天順初。移鎮延綏。累功封彰武伯。信在邊三十年。鎮以安靜。人樂爲用。卒贈侯。諡武毅。

明史  
本傳。



周璽字廷玉。襲職開平指揮。負氣習兵書。善騎射。以征北功充右叅將。分守陽和。成化十八年。寇分道入掠。璽與遊擊董昇戰黑石崖。劉寧戰峪兒山。皆有功。明年秋。亦思馬因大入。大同總兵官許寧分遣璽守懷仁。劉寧與董昇守山西。寇至寧被圍數里。亟發巨礮擊賊多死。璽兵來援。夜遇敵。厲將士曰。今日有進無退。大呼陷陣。敵少卻。久之。短兵接。臂中流矢。拔鏃。戰益急。時璽子鵬亦從。會寧亦潰圍出。兵合。寇乃退。無何復入掠。寧將兵三千。連追擊敗之。二人並著功北邊。稱名將。璽後佩征西印。鎮寧夏。臨卒召諸子曰。吾佩印分閫。分已定。獨未嘗大破敵。抱恨入地矣。連呼殺賊而暝。子鵬累官錦衣衛指揮僉事。

王軌。開平衛人。宏治十二年進士。嘉靖初。官順天府尹。房山地震。軌言召災



有由。語多指斥。忤旨。切責。尋遷右副都御史。巡撫四川。討芒部土官隴政擒之。招降四十九砦。璽書獎勞。時將營仁壽宮。就拜軹工部右侍郎。督採大木。工罷召還。改戶部。覈九門苜蓿地。以餘地歸之民。勘御馬監草場。釐地二萬餘頃。募民以佃。房山民以牧馬地。獻中官韋恒。軹釐歸官。奸人馮賢等。復獻中官李秀。秀爲請于帝。軹抗疏劾之。帝雖宥秀。竟置賢等如律。出覈勳戚莊田。請如周制。計品親疏。以定多寡。非詔賜而隱占者。俱追斷。戶部尙書梁材。採其言。併兼者悉歸官。軹居身儉素。爲縉紳儀表。累遷兵部尙書。叅贊機務。詔舉將材。薦鄭卿。沈希賢等二十一人。帝皆擢用焉。

饒承德。字伯祚。赤城人。明世襲指揮。順治元年。署口北道標中軍。五年。赤城兵變。承德冒死守城。擒獲叛首。巡撫馮聖兆疏薦。累任至浙江定海鎮標遊



擊康熙甲寅耿逆叛貝勒王調遣出洋攻取小涼山耿逆於沿海地方造船承德領兵出其不意火焚戰艦賊勢大潰後以功陞山西利民中路叅將敏練勤勞有廉將風

劉國興字振宇赤城人父漢鼎任叅將國興長入閩爲福協張所知補軍職勦滅古田山寇復隨提督段平漳州累功陞守備又以解海澄之圍進遊擊漳州東金廈二門爲賊淵藪國興由山後出奇兵擊之射斃僞都督生擒僞總兵乘勝招安反側悉平已乃撫流離招墾種瘞暴骼捐贖所掠女子人咸德稱之擢都督同知陝西西安副將又以平夏逆功陞河北總兵己亥隨征噶爾旦管理事務有功調廣東碣石衛總兵以疾卒於官

紀肇修赤城人順治戊子舉人由學正於康熙十一年陞授浙江龍泉縣知



縣。涖任年餘。值耿逆亂閩。肇修招集義兵。爲防守計。十三年五月內。逆兵驟至。衆寡不敵。被擒至閩。誓死不屈。以大義論之。逆怒。復差僞弁王三。勒兵圍龍泉。擒修家人。繫之獄。會清師破閩得釋。統兵康親王憐之。賜以忠憤日堅額。改授沙縣知縣。

宋之屏。字維都。赤城人。父奎。力田養母。以孝稱。屏舉順治丙戌進士。授山東高密縣令。有政聲。行取。歷禮兵二部曹。甲午典試山東。歷任荊州蕪湖道。終陝西參議。其爲兵部郎中時。多所建白。嘗以畿地驛馬。疲于供應。疏請酌定勘額。嚴禁濫差。隨准發部詳議。居家躬盡孝友。父母前。終身未嘗有忤色。與諸弟同己財。不分爾我。鄉人稱之。卒祀鄉賢。

景士秀。字可堂。龍門所人。幼與姪際泰。敏行力學。乾隆己卯庚辰聯捷進士。



庚寅授浙江衢州西安知縣。西安商民以供徭役纏訟。歷任藉以啗利。延不爲理。士秀判明是非。剔其積弊。並釐定徭役事類。商民稱便焉。尋病卒於官。際泰字融莊。癸酉拔貢。甲午舉人。任安平縣學教諭。兼設帳授徒。講貫不懈。罷歸。淡於仕進。力耕自給。敦族睦婣。邑人稱鄉先生焉。

### 康保縣鄉賢

宋廷福。山西天鎮人。貧而立志。年十六爲人傭工。業農口外。性勤儉。艱苦備嘗。先時同兄操席業。未久事敗。復傭工於中表。常以依人作嫁。終非長策。於是租田耕種。稍有積蓄。即領康屬托羅蓋荒地五頃。躬耕數載。家漸裕。遇鄉里中貧者濟之。少者教之。排難解紛。見義勇爲。雖屢遭變。終未罹害。年八十有四。精神強健。猶若壯年。本縣前財政局長宋復初。即其長子也。



孟士仁。字壽峯。原籍萬全。幼從塾師讀書。性聰穎。早歲年十九入泮。父母早歿。爲祖母養育成人。在祖母前。尤能曲盡孝道。事無或違。祖母歿。則課子訓姪。不分畛域。兄弟姊妹六人。相處和睦。遇戚族之貧苦者。量力周恤。靡不備至。清庚子年。義和拳起。君以爲邪術。勸人勿爲所惑。惟逐日練勇自衛。以故他處有受其害者。獨張北西區土木路一帶。未遭此劫。君之賜也。光緒二十七年。君赴豐鎮七八蘇木。領地千餘頃。將謀墾。嗣以意有所不洽。毅然棄之去。又往領東地招民墾殖。自始創至事成。經營三四年。租領地千數百頃。親戚故舊。貧民佃戶。悉從君徙居哈拉罕地方。即康保現在第三區也。領租後。君爲總辦。畫地爲段。各八十大畝。南北長數十里。子午作壕。東西寬約百里。一取平直。現已歷有年所。未聞有因田地糾葛。發生詞訟者。皆君當日劈畫。



周詳。立法良善之所致也。晚年在義合堂成義塾。一使貧家子弟皆得入學受教。又設有乾坎良震巽離坤兌八卦莊。使相聯絡。防匪患。是以地面獲平靜。宣統元二年間。遭歲歉。君措資運購籽粟。給各戶播種。至三年秋。始有收穫。人民得免餓寒。民國十三年卒。年七十有三。姪廣州。字登瀛。性耿直。有伯父風。在縣辦理清鄉保衛事。頗著成效。篤於孝友。待繼母所出諸弟。與同母弟同。現爲騎兵第一師副官長。







察哈爾省通志卷十六上

戶籍編

孝義

萬全縣孝義

陳顯祖。晉寧城人。幼失恃。每晨起。必詣靈筵饋常食。泣呼再三。比長。無一日間。父仁。性最嚴。顯祖事之。曲盡誠悃。久之。遂得歡心。繼母于氏。生四子。父命析居。顯祖泣諫不從。乃取家資。讓四弟自擇。而以其弊餘者當之。父死。廬墓側三年。歸謂母曰。母知析居非顯祖意乎。母曰然。第爾父命之矣。顯祖曰。母今在。諸弟所分資。已竭十四五。兒何忍獨安飽。眎諸弟他日窮困也。于泣而從之。自是復合。數十年。雍穆無乖忤。四弟亦感悟。俱克自樹立云。



劉宇。其先山西孟縣人。洪武初徙戶實邊。遂隸尺籍。家於張家口堡。堡南有清水河。性湍悍。人病徒涉。宇父圮。積已及族人軍錢。謀建橋。未興工而卒。宇旦夕思成父志。會宣府總兵梁公秀亦謀建橋。而貲未有所措。宇聞慨然曰。茲先人志也。隨捐千金成之。今之通橋是也。子巍科。順治二年拔貢。任教諭。孫其淵。武進士。任都司。時橋又傾圯。其淵捐貲續修。人以爲世濟其德。

楊成。字定宇。其先山西平定州人。父進孝。遷張家口堡。成和平正直。忠信不欺。以名德化其鄉里。人有爲不善者。常懼爲楊公所知。有望廬悔過之風。本縣太師莊艱於利涉。捐貲建長橋。行者便之。至今猶循其制。又創立義學。延名宿。具膳餼。孤寒子弟多所造就。仁粟義火。徧於親疎。以子貴。封文林郎。晉贈通議大夫。康熙三十四年。崇祀鄉賢。子芳聲。歷浙江紹興府知府。國聲。歷



刑部湖廣司郎中英聲。功加左都督。國聲有傳。

席三聘。萬全右衛人。弟三公。順治年同補衛學生。家門雍睦。事母孝。兄弟同爨。友愛無間言。鄉鄰稱重。後三聘無嗣。三公以子敬繼之。時敬已遊庠生子矣。請於督學使。改冊承祀。學使嘉歎。蔚州敏果魏公。時方林居。聞其義。贈之以詩。

袁嘉盛。字憲宜。萬全右衛人。其先自山西洪洞移居張家口。嘉盛富而能仁。人有以急難告者。無問親疎。率傾囊以濟。常以邊地苦寒。歲製皮衣數百領。給無衣者。又每年治棹置空所。遇無力殯葬者與之。有亡賴子誑之去。易錢於市。家人以告。嘉盛夷然曰。彼非萬不得已。孰肯以父母親屬死。誑吾物乎。竟弗與較。里中翕然稱爲長者。彝商某來口貿易。擁貲鉅萬。嘉盛與之相識。



康熙中用兵厄魯特道阻商欲亟歸乃以貲十萬寄嘉盛所且約曰儻公欲營運者啓此無妨後三年我來但以原數歸我可也嘉盛諾之後十許年其人不至訪之則已死其家亦不知前有寄金事也嘉盛即召其子至還之子涕泣欲以半爲酬不納開扁封識宛然康熙十年聖祖皇帝自口外回鑾道經其里特賜召對給二品頂帶及詩扇綾匾鄉黨榮之以孫立相貴贈光祿大夫。

王振睿字思菴萬全縣武舉張家口人見義勇爲以善行聞於鄉康熙四十二年大府檄毀三教堂張家口堡有當毀者振睿以先師像在焉請於當事改建聖廟首捐五十金並地一區以倡又募得一千三百餘金振睿姪若綸時在山西亦以百金爲助廟成大吏給匾以旌其義



郝士雍。張家口文庠生。幼失恃。繼母待之殊嚴。士雍克修子職。久而無間。繼母亦爲之感泣曰。吾兒眞孝子也。繼母終。哀毀骨立。一如喪父時。士雍之堂兄曰士恭。乾隆壬午科舉人。年老失明。賴士雍寬慰調護。得怡怡以終。先是士雍之父。與堂兄分爨已久。及堂兄沒。而子若孫之無行者。竟將士雍之產。變賣入己。士雍教讀於外。曾不之問。或怪之曰。吾寡兄弟。吾弗忍也。一時鄉人士。翕然稱之。嘉慶年間。公舉孝廉。官給孝義可風匾。以光其閭。

霍履泰。字靜安。先世自山西孝義遷萬全。曾祖揮乾。以厚德著鄉里。祖守文。太學生。父天培。衛千總。履泰由別房繼入。事母武氏。省安視膳。惟恐不得當。母氏年過八旬。乃歿。喪葬盡禮。時人稱其孝。其於本生父母。亦瞻依戀戀。如未離膝下者然。胞兄逢泰。性嚴厲。事之能得其歡。堂姪邑庠生昌祚。以讀書



攻苦歿。家不甚裕。逢泰瀕終。屬析已產千金與之。履泰如兄命。旋以本身產業。如數償兄家。而不言其故。已復念姪婦劉氏之撫孤子楨也。依母受讀。慮有不給。更推數千金。爲置房屋。以慰矢志之苦。劉氏卒。以節孝及身請旌建坊。閭里榮之。萬全故燕代地。當中外衝。素稱富庶。然四面皆山。旱潦時有。桑梓之不足於用者。戶相望也。履泰於每月朔望次日。施放制錢。分別大小口。而量給之。又於每歲施放臘米。以餽貧乏。縣之正供糧米。每年額收七千餘石。除支放兵米及各項倉厥爲之一空。故邑無屯糧。遇荒歉。往往束手。當事者議立義倉。履泰首捐米數百石。以爲好義者勸。時錢方伯臻廉得其實。特給康樂可書匾。以旌其閭。邑城東沙河壩圯。公議改土爲石。圖經久。履泰慨輸百金。且墊用欸項。工得以早完。而水不爲害。萬邑舊多神廟。以地近於邊。



藉爲保障。歲時議築。求必應。應必多。故見於廟碑者。咸首列履泰名。年五十外。即澹於世事。凡有義舉。悉委之長子如洵。如洵字少泉。慷慨好施。一如其父。與弟如泌。俱敬念遺囑。無違先德。嘗建通街石橋。濟行人。置北郊義塚。以安死者。又以萬全文學日興。首輸三千金。創建書院。時府縣文廟。皆議增葺。又捐貲數百金。曰。是皆吾父有志未逮者也。前護院屠方伯。上其事。宸翰褒嘉。從優議叙。邑人咸謂履泰有子。抑懋乃嘉德。宜其世有令名。克享美報云。履泰貌魁梧。性剛毅。讀書通大義。不屑屑章句。爲人豪爽。入邑庠。即貢成均。捐職布政司理問。卒年五十有七。子二。如洵。優生。後補光祿寺署正。如泌。庠生。恩賞八品頂戴。

羅毓芳。字佩秋。號馨甫。附貢生。才高性敏。慷慨好施。事祖母至孝。中年營鱸



商。每赴張垣。出必告。反必面。祖母有疾。親侍湯藥。衣不解帶者月餘。卒後守棺席地臥。哀毀幾絕。胞姊適安家堡王朝輔。朝輔卒後。遺女二。無子。族人爭繼。涉訟多年。家道中落。毓芳力任養膳。二十年如一日。並爲嗣甥成婚。甥女擇嫁。姊卒。喪葬如儀。戚友中有急難。罔不週恤。告貸者。不責償。光緒十八年。本縣大饑。辦賑務二年。活人無算。二十年。倡修河壩。爲壩工董事。分任募欸督工之責。不辭勞瘁。二十六年。地方不靖。結諸紳。辦保甲。保甲局成立。規畫之力爲多。卒於宣統二年。壽五十八歲。子嘉祐。國學生。嘉言。登記學校卒業。任本縣教育事有年。孫汝愚。直隸優級師範畫圖手工專科卒業。現任本縣高級學校教員。汝誠。北洋大學修業。曾充本縣縣黨部執行委員。

喬瀚。字雪栽。高廟堡人。性豪爽。能容物。先世豪於財。逮祖蘭。慷慨好施。家漸



中落。瀚未弱冠。即奮志恢復祖業。因輟學。持身勤儉。馭下有法。商肆夥友。農家佃戶。無不致敬愛。如家人父子。中年後。業復興。行善尤力。早失怙恃。有幼弟曰淑。愛護周至。教養成人。怡怡然。老而彌篤。鄉里奉爲楷模。有子二。皆業儒。

張敬銘。字吉臣。又字極誠。別署習靜齋主。張家口人。祖籍宣化縣。清宣統己酉拔貢。天性孝弟。品學兼優。工書法。善詩賦。幼爲業師。鍾大愚。安曉峯。兩夫子所器重。家傳儒醫。昆仲皆精岐黃之術。兄愚銘。行四。懸壺問世。善治傷寒。有聖手張四之譽。兄性直善怒。每遇拂意事。輒動氣。銘柔聲下氣。婉言開勸。不聽。又敬不違。必待其色喜而後退。人謂竭誠事兄。克盡弟道。至其作事。必終必敬。交友以信以義。教子慈而不縱。遇下和而不流。一生多就文牘科長。



職務扶危濟困。晚年創辦國學專修館。新舊兼施。取長補短。冀使青年不爲流俗所移。並立培德堂施醫處。施診捨藥。不取分文。民國二十二年四月卒。年六十有一。子二。長鴻元。次鴻中。均業儒。

蔚縣孝義

馬焯。遼陽殉難總兵林之子也。順治初歲貢。授鄒平知縣。卒於官。焯在前明。嘗念父以遼疆事爲浮議所誣。心憤之。及聞父變。痛哭。列父戰守始末。以諸生抗疏闕下。並具揭投當道。一時死事之烈。不爲邪黨所蔽者。其力也。在鄒

平亦廉明有聲。

慶志

李暄亨。字澄園。由選貢舉。丁卯鄉試。甲戌。以第四人成進士。選庶吉士。久之。改內閣中書。辭歸。少讀書。研窮精奧。有志性命之學。魏敏果公深器之。嘗歎



世不乏才。而爭新鬪巧。日趨於歧。故平生踐履篤實。間爲詩文。亦不以浮豔相尙。廷對指陳當世利弊。不少梗避。略謂方今風俗之敝。莫甚於好侈。人心之壞。莫甚於貪利。宜崇尚德化。整肅官方。秉虛公以絕偏黨。廷臣咸歎以爲名言。居父憂。哀毀骨立。葬後。廬墓三年。縣令屠沂者。有剛直聲。故同年也。數年未嘗與通一札。一日以地方利害事往謁。與辯論。至面發頰。辭愈壯。屠不能堪。已乃大服。嘗輯雲中節義錄。及宣府死事中丞朱免齋文遺。范徵君彪西入垂棘編。廣理學備考以傳。其好尙如此。自著有趨庭日記。齊家格言。槐省雜記。圖南航澄園諸集。慶志

李雋望。行人昉辰子也。字時可。康熙庚子舉人。童時。方就塾讀。一日聞鄰有以官逋鬻其妻者。亟白母。資令完聚。父疾。籲天祈代。復割股以進。母馬病痿。



痺臥牀十年。偕婦侍寢席。旦夕不少離。婦亦婉聽。葭苓之費。或取母家。或出簪珥。易之不吝也。弟厚望。官高密爲署令。所誤。大致賠累。傾貲產以助之。時以爲難。所著有晚香集。初昉辰爲諸子延師課讀。榜所居曰義方軒。子五人。並有時譽。令望。字璋如。以歲貢終。祖望。字繩其。由太學生授州倅。亦不仕。雋望。與弟厚望。予望。皆以科名顯。昆季輯睦。白首無間言。一時之言孝義者歸之。

慶志引俞兆晟  
李公墓誌銘

郭明義。字時菴。父兆。喜施給。明義承之。年十七。補諸生。試輒高等。工音律學。友愛敦篤。弟妹皆以爲依歸。從兄弟某卒。遺一女。撫之不啻己出。家有積券數百。貧不能償。集其人。悉面焚之。歲辛卯。州人董揆叙。建義學。捐園地助之。暖泉資灌溉。又有水碾之利。遇沙河漲。隄輒敗。乃出錢。率村人修築。至今安



堵皆其力焉。

慶志引郭處墓表志補載人物。

陳彩字含章。諸生有至性。父廷元以獄株連。遣戍福建大田。彩侍至戍所。父力督之歸。乃奮厲於學。日夜渴苦。冀宦成贖父罪。甫隸籍學官。而父凶問遽至。大痛。徒跣萬里。負骸歸。既葬。每念父不及生還。輒長號。聞者爲感泣云。

康華國字偉英。道光乙酉舉人。事母至孝。母喬氏。故士家女。通書史。華國幼授經督課甚嚴。力學爲名諸生。值拔萃。甚爲學使所器。試之前夕。臥邸舍。適有鄉人至。語同舍生。以其母方疾者。華國微聞知。遽起。星馳而歸。抵家。則母昏臥踰日矣。聞華國聲。頓甦。疾竟愈。而窺母意。終以其不與試悒悒也。乃發憤爲文。攻苦無間晝夜。是科遂捷。人稱孝感。性靜默。無意仕進。母卒。不復就試。村居教授數十年。未嘗履城市云。

慶志



阮士雄。字超羣。少以父命與兄弟異爨。士雄以居積致富。則時佐兄。兄歿。撫其孤。令與己子同學。衣食教誨。無異視。及老。乃均析其產。爲券。命二子各取一。而以其半畀弟及兄子。聞者嗟異。居恒重然諾。遇人危困。赴之若所嗜焉。

子文成。兄子文光。並諸生。

慶志

### 宣化縣孝義

殷禮。宣德人。性至孝。鬻薪自給。猶日求甘美養親。金貞祐中。宣德陷蒙古。元帥盡驅居民出城。父盛及禮俱與焉。俄而下令。凡老者殺無留。士卒聞命。方以殺爲嬉。勢將向盛。遂潛往代死。伏其父於身下。以兩手據地。俛而延頸待之。士卒辨視未審。禮項腦。因中二刀。至夜半始甦。後二日。令再下。無老幼盡殺。時禮已以善舞劍被選。而行次蔚州矣。途聞其父死。謂同伴曰。我且逃歸。



塋父。遂歸。求父屍而得之。負以涉河。水傷脛。至血出發母塚。下屍封識之。乃還。後以從征有功。與二子俱爲顯官。

慶志

葛鷗。字子高。宣人也。勵志問學。與其弟鵬。自相師友。日研究聖賢經傳。往復辯正。必底洞徹。乃罷。正德己卯。同薦順天鄉闈。辛巳。鷗登進士。鷗不遇。旋歸書舍。奮修倍恒。鵬仕爲給事中。詒書諷以剛直任事。爲郡守。諷以恤民無任情。爲憲副。諷以持大體。不苛於正。鵬亦忻忻樂從之。曰。兄教我。嘉靖壬辰春。其業不合。有司者五。未幾病卒。鷗性好古。其學篤尙躬行。茹服不求旨麗。居家能養親。友愛弟。鷗待賓客儉素誠款。與人交。無一僞飾。人有慕者。往造。初若近迂。久之必加欽服。或歎爲眞君子焉。

舊縣志

林茂卿。宣德人。年四歲。父母俱疫死。伯父哀而育之。甫卅角。時詣塚墓前。號



慟欲絕。新有果蔬。必薦。後伯父爲商。贏于財。五十無子。委茂卿家事。日與其妻懇伯母前曰。林氏單弱。誠不忍伯父絕傳也。伯母悟。爲置二妾。未幾伯父母亡。遺孕生二子。彥卿。俊卿。夫妻保抱護視之。及壯有室。欲析居。茂卿力勸不可。乃傾囊悉歸二弟。自領田百畝。屋一區。爲生。厥後二弟交游匪人。日喪所有。茂卿仍加調給。略無憤辭。嘗曰。我無伯父。何以有今日也。二弟尋亦感化爲善人。而茂卿二子植構。並能趾美。科第顯仕於朝。

舊縣志

郭宗興。宣府右衛人。幼失怙。事其母林。備竭孝誠。朝夕侍側。必候顏色憂喜。喜則自適。憂則極意娛之。林病。宗興躬理藥粥。至不起。乃爲治喪葬具。務盡力。曰。舍此復何以用情也。旣窆。諸有服者。強之返。宗興踞泣曰。歸無母。宗興必不能生。若諸親能聽宗興。卽宗興死於此。尙復奚憾邪。諸有服者。度不能



強。皆歸。於是宗興取數椽自爲屋墓側。居之夜則悲號。晝則封殖。比及三年。林木蔚森。縱橫俱成列。指而望之。無不知爲孝塚也。有司上其事。詔旌表里閭焉。

趙弼。字良卿。宣府右衛人。嘗讀書。敦尚孝義。父昇疾。侍醫藥不違。卒。哀毀踰禮。比塋。跽其母李請守塋。母曰。爾去。我必念爾。遠或不能至。奈何。且爾知有父矣。顧不知有母耶。弼悟而止。既襄事。每日蚤暮。輒向靈筵致哀。奉養其母。比平素尤至。母卒。一如喪父。哀毀合窆之日。即結廬其旁。悲號無間。三年歸。設牀几寢幃。懸父母小像其內。如常定省。歲節。偕妻子祀之。盡誠信焉。事聞。詔旌其門曰孝行。

周延基。宣化縣人。家貧。艱於衣食。與弟延厘。日傭作。得賃資。輒易甘旨養父。



永燮及母馮。曲慰其心。順治戊戌。母馮病。基扈朝夕慟哭。焚香祝天。願以身代。竟不起。呼天搶地。聲惻鄰里。時遇荒年。貧日益甚。基扈俱未有室。躬持爨。或有勸其娶妻者。皆曰。繼祀事誠大。顧目前老父。年踰八十。非肉不飽。奉養事亦大。值此凶歉。力供菽水尙不給。奚敢他望。竭力承懽。遇父迷曠。欲加梃責。基等即伏地俛從。不敢違責。已仍曲求娛之。至父歿。亦如喪母時。康熙辛酉。里人公稟參議楊公。給銀八兩。代之娶。復賜匾曰。孝行可風。參將宋守備姜。亦匾曰。百善之先。曰。菽水承懽。丁亥。撫軍趙。又錫孝毓雙珠額以旌之。

張萬祚。宣化前衛人。行居次。幼孤。其長陞祚。已授室。父遺貲爲婚娶。遭年荒。陞祚拮据。供炊莫給。終不欲啓緘。萬祚愀然曰。肉可割。尙啖母。令饑而有室。將安忍。且年豐娶未晚也。泣請用之。終身兄弟怡怡和樂。奉母無間言。及歿。



哀毀骨立。葬之日。廬於墓側。畚土成墳。至朔望。聲號四野。終三年焉。雲州守府馬公。嘗以善孝可風。額其門。今猶待旌獎云。

舊縣志

孫錫齡。字夢祥。武舉孫枝英之長子也。中式清康熙丙子科武舉。庚辰科武進士。性孝友。寡言笑。或勸之仕。則曰。老父在堂。曷敢遠遊。願終身奉養。及父死。諸弟與其析居。則產任弟給。低昂不計。異母弟柏齡。年最幼。錫齡撫之。成爲之婚娶。並代其經營財產多年。毫無所私。其廉介有足多者。庶母弟旭齡。緣事繫於官。錫齡售己產爲開脫。致不受累。嘗語人曰。孝弟兩字。出自天性。余之愛弟。正所以孝親也。聞者敬之。惟年三十六尙無子。妻爲之購一女爲妾。抱衾之夕。女涕不已。固詰之。女曰。良家子。不忍人妾也。錫齡笑。翌日歸其父母。語之曰。區區身價。爲若女作嫁資。吾從此不復娶妾矣。越明年。妻生一



子名衍策。人皆謂天之報施善人焉。

孫世德。字配京。號敬修。貢生孫衍策之長子也。清乾隆時。以通判候選。性孝友。有父風。襲其成業。惟恐弗克負荷。能忍能讓。即有以橫逆相加者。亦處之怡然。以故鄉黨宗族。咸稱誠篤君子。與羣弟同居四十餘年。無片言相爭。胞妹適張門。貧寡不自給。世德勸合族公助之。已又出囊金。以時饋贖。二十餘年如一日。未嘗有德色。易簣時。猶留百金爲妹養老。其克敦友愛如此。壽七十。

孫厚德。字仁甫。號載資。貢生孫衍策之次子。中式清乾隆甲午科舉人。庚子恩科進士。以知縣候選。性雖稍鈍而篤於學。刻志攻苦。純靜專一。於書無所不讀。捷南宮後。尤嗜通鑑。終日不釋手。睦宗族。好施捨。課兩弟一子讀。事親



以孝。父鰥居十七年。曲意承歡。遇事非奉命不敢行。疾革時。猶曰。老父在堂。不克終養。死難瞑目也。名重當時。文足傳後。卒年僅五十也。

孫繼紱。字嗣纓。號祿泉。清道光年附貢生。進士孫厚德之次子也。七歲失怙。生母姚孺人。撫育而訓誨之。稍長。出嗣長門。兩地承歡。孝由衷出。生母苦節三十餘年。繼紱竭力盡心而事之。爲人端嚴公正。好善惡惡。人咸敬而憚之。於戚黨急難之時。資助無吝色。每年存穀若干。積之以備濟貧。而猶以不能廣施爲憾。其樂善好施。蓋出自天性云。

錢毓美。字君實。縣南鄉錢家沙窰人。幼穎敏。好讀書。因親老輟學。然有經濟才。於鄉黨戚族間。慷慨無吝色。會值歲凶。鄉人十室九空。毓美設法賑濟。全活甚衆。有以貧乏告者。無弗給。力不能償。輒還其券。村舊有恒興渠一道。爭



執連年不決。渠事且廢。毓美調解維持。羣衆皆服。水利復興。鄉人賴之。鄰邑有某孝廉。學行素著。歿後無以爲殮。毓美與有舊。卽日經紀其喪。並恤其妻孥。人咸高其義。毓美約己以廉。持家有法。姓雖繁衍。然家庭雍睦。人無間言。遇親戚故舊。尤調恤加厚。其盛德懿行。閭里至今稱道弗衰。孫福森以舉人歷官山西交城等縣知事。有政聲。羣以爲食德之報云。

劉化南。字治宇。縣南鄉深井堡人。三歲喪母。事繼母以孝聞。家道貧寒。幼嫻庭訓。而勤苦力學。孜孜不倦。入泮後肄業柳川書院。咸豐辛酉科拔貢。授內閣中書。轉吏部候補主事。以直隸州知州用。視時事日非。無意仕進。退歸鄉里。庚子拳匪肇亂。盲從者衆。斥爲邪匪。力禁之。匪衆脅迫。始終不肯苟和。亦因是致疾。光緒二十七年卒於家。



王鳳翔字曉霞。同胞三人。兄鳳儀。道光丁酉拔貢。是科卽登賢書。弟鳳威。歲貢生。候選州判。皆以詩古文詞著。鳳翔幼而失怙。母訓甚嚴。讀書日十行下。性友愛。篤於倫常。十五歲試冠童軍。學使某公。飭廣文代詢家世。意在選東床也。然已爲閹孝廉婿。特未合卷耳。由是文名藉甚。無不以遠大期。乃應鄉試者八。皆不售。咸豐元年。由恩貢生。應孝廉方正舉。時以國家多事。停止朝考。欽賜六品銜。賞蟒緞金錠數事。至是絕意進取。日以經史課兒孫。四十餘年。光緒十六年冬月。愛孫吉士。侍坐談文。忽曰。余心氣不暢。或將死乎。似此無病而終。亦一佳話。然終不忍棄余孫也。家人團聚寬慰。次日竟一笑而逝。時年七十有四。

王兆麟字子嘉。鳳翔子。聰穎絕特。性好讀書。年十三。五經卒業。惟不喜八股。



文輒曰。丈夫當讀萬卷書。瀏覽古今天下事。何必拘束於文字間乎。又鑒於  
乃父科甲無緣。立志不入場屋。嫻於中國歷史。清朝掌故。其子吉士。幼讀之。  
經史。皆受諸庭訓。每於鄉黨決大疑。排大難。數言即解。人以魯仲連呼之。酷  
愛菊。又善飲。養菊至五百餘種。必手自培植。十餘年。無間寒暑。善持家。訓子  
一以勤儉爲本。蓋力矯世俗浮華之習。卒年五十一。

張北縣孝義

葛成旺。本縣第一區雲頭壩人。性絕孝。而母年最高。每飯必親自操作。且不  
敢遠遊。即或出門。雖遇狂風大雪。亦必返家視母。故鄉人有葛孝子之稱。

曹福祿。本縣第五區小壩溝人。年三十無子。以姨弟之子爲嗣。及妻生子。曹  
頗惡之。鍾愛嗣子。終身不移。卒年九十有四。



韓印和。本縣第五區甲石河人。性和平。村中有爭鬪者。輒居間爲之排難解紛。卒各心服而罷。人皆以和事老稱之。精神矍鑠。耳目聰明。卒年八十有七。

### 延慶縣孝義

胡廷琪。號菽田。少讀書有雋才。甫冠。即補博士弟子員。試輒冠軍。旋之鄂。爲張文襄公之洞入室弟子。在鄂苦學數年。精研經史。博涉羣書。尤工行楷。精岐黃術。歷充湘鄂釐金要職者數十年。志潔行廉。一時有玉潔冰清之目。內行篤睦。兩兄以不事生產。家屢空。賴其贍恤。尤慷慨好施。僚友親戚有急難者。不吝鉅資以營救。或鬻產以濟。族黨中以寔告者。悉資借之。以故身後無餘資。由廩貢官湖北知縣。因母喪乞歸。哀毀盡禮。張文襄嘉其孝友。以施於有政四字匾額表揚之。旋以疾卒。子三人。皆雋才。



胡先瀛。號仙洲。少聰穎。博通經史。甫冠。補弟子員。道光辛巳。舉賢書。分發江蘇知縣。先是永甯文廟舊租。大半被人侵蝕。因與同志。逐加清釐。升斗皆歸核寔。公益賴以不墜。永甯雖裁縣。舊志稿猶存。擬就原本。增減刊刻。詎享年不永。未盡其志。嘗設文課。以培人才。修宗譜。以聯族姓。處鄉和睦。居家孝友。爲一方之典型焉。

胡向璣。號君政。少聰穎。勤於學。精習戰術。沈勇有謀。壯歲遊武庠。經史韜略。諸書。過目成誦。時有才兼文武之稱。事父先意承志。以博歡心。父疾。飲食藥餌。必親嘗而後進。父歿。哀毀逾恒。廬墓終制。事母李宜人。亦以孝聞。撫諸季。備盡友愛。兄弟析居。自取薄田數畝。僅資終歲之食。其餘財帛諸產。悉與異母兩弟。兩弟皆感化。相親愛。弟兄四人。怡怡雍睦。人咸稱爲厚德。且慷慨好



施里黨無力婚葬。及不能舉火者。或周濟之。急公義。自忘其貧。晚年起補衛守備。不獲寔缺。未竟施設。輿論惜之。

### 懷來縣孝義

田應枚。懷來人。家貧早孤。事母至孝。性嗜酒。大醉時。人莫敢近。一聞母呵。則屏息受教。妻事母。偶不謹。立出之。不再娶。母年耄。性反孩稚。應枚與羅列玩具。啼笑歌舞。宛然孩提。母歿哀感。路人咸推爲田孝子。

成應瑚。沙城人。國學生。事父以孝稱。父歿撫幼弟。勤卹備至。每曰。吾弟幼失怙恃。非兄奚賴。於是誼則兄弟。恩猶父子。鄉人穆姓。以貧故鬻妻子。瑚代贖。令其完聚。施不望報。有急難必周之。歲饑。捐米助賑。活人甚多。撫院旌其門。胡常武。延慶衛武學生。居懷來。生而失怙。狀魁梧。善治生。痛母幼年守志。竭



力奉養。中年得心疾。家稍替。每籲天願卻五味。求緩須臾死。以終母養。由是糲食躬樵。凡可以適母身者。無不殫力求之。時人以爲能事親矣。

楊國臣。土木堡人。渾河初無船橋。雍正間。重修普濟寺。但雇水夫四名。以濟往來。後謀造船橋。苦無資。國臣有柳數百株。捐充船橋之用。往來者咸稱利便。知縣馮獎之曰。好善樂施。礮山守備欒獎之曰。澤及河干。

王永慶。富家莊人。世雄於財。性慷慨。喜施捨。清道光十三年。倡捐修通濟橋。水災。捐糧五百餘石。分給貧民。旋又與新保安舉人張環。捐修沮陽書院。凡可以濟衆者。無不踴躍爲之。後家漸落。至同治七八年。歲薦飢。鄉人猶思之。曰。使今有王氏。吾輩斷不至飢困若此也。

劉長治。懷來衛庠生。崇禎甲申。闖賊陷懷來。酷刑索縉紳金帛。長治父英。曾



官大同被賊拷掠。長治曰：焉有子在，而使父慘酷如此者？挺身請代。榜掠幾斃。昏瞶中，夢有人飲以水，復甦。鄉人異之，共歛貲以償賊。會賊敗，長治得脫。

本朝定鼎，懷隆兵備副使，給孝哉劉子，並人子所難。二額旌其門。

舊志

賈石，保安衛人。沈忠愍謫戍保安，石徙宅居之。難方作，石力勸沈二子袞、袞避去。徐夫人不允，及沈卒於獄，石賂得屍，潛埋之。復勸二子急逃，弗從。石乃託故去之河南。既而袞、袞同被害，徐夫人携幼子袞，徙居雲州。是時與沈素識往來者，皆株連無遺。獨石以先去免，而密遣人收葬袞、袞，並經理家屬之在雲州者。嚴嵩敗，乃返故居。後沈長子襄至潞陽，石爲指示沈及二子藁葬處，因得扶櫬歸里。清乾隆間，知縣吳文正修沈祠，欲以石配享，或謂家廟不宜祀異姓，乃止。

見吳文正書  
青霞集後文



胡常武。延慶衛武學生。居懷來。生而失怙。狀魁梧。善治生。痛母幼年守志。竭力奉養。中年得心疾。家稍替。每籲天願郤五味。求緩須臾死。以終母養。由是糲食躬樵。凡可以適母身者。無不殫力求之。時人以爲能事親矣。

舊志

### 陽原縣孝義

李浚。字宣明。明東川通判齊松子也。好學篤行。嘗就其家闢儒館。延名士任講授。鄉人願學者悉入焉。多所造就。侍父疾。累月不解衣帶。父歿廬墓。哀泣不已。墓側有嘉禾生。人以爲孝感。時詔舉賢良。有司高其行。將薦之。力辭。生平勇於赴義。拯困濟危。若疾痛之在己。歲癸巳。大雪踰月。人困樵採。浚率衆羸糧入山。開徑三十里。煤運始通。由是得寒疾卒。遠近慟之。子恆光。別有傳。弟濬溥。



王作霖。字用之。進士王鈞之父也。事親以孝。闔邑盛稱。知縣盛公擬舉爲孝廉方正。公固辭。盛乃請於直督李鴻章。旌贈鄉閭坊表匾額。甲申。行鄉飲酒禮。公爲大賓。凡邑之善舉。莫不爭先創辦。辛丑。洋兵入東城。人皆走避。有勸公行者。公曰。君父蒙塵。國事靡亂。吾家仕宦。豈可先逃。卒不動。三月十四日。東城陷。賊辱公。公大罵。遂殉城。後由直督袁世凱奏聞。照把總陣亡例。從優議卹。賜祭葬銀五十兩。並崇祀直省昭忠祠。

趙雲龍。字衢翔。少失恃。事繼母得歡心。爲諸生。躬耕自給。橋有病涉。路有阻行。必悉力程其事。歲饑。出粟徧貸鄉鄰。多所全活。卒年八十三。

龔銘。字自新。性孝友。輕資財。道光十三年大災。鄉無食。公出粟賑災救活無算。道光十五年。知縣倪承弼。贈惠浹閭。匾額。旋奉省縣令。獎以孝友睦婣。



任卹等匾額。同治六年。鄉人郭嚴等。公贈聯對。詞曰。四代萃同堂。悉本居心和而忍。六行全特品。兼能處世厚與溫。

龔思注。字百川。以孝友稱於鄉。道光丙申。有蝗災。鄉人以草根樹皮果腹。思注出粟賑災。每日領糧者千百。計施放三月有餘。翌年春。由鄰縣購糧二百餘石。散放村中。以爲籽種。道光丁酉。西寧知縣竇士達。奉令獎贈好善樂施匾額。

龔兆楷。字孔林。孝事父母。敬兄愛弟。皆出至誠。經史百家。既所涉讀。且旁及農田水利內典諸書。尤精鍼灸。善書法。爲人診病。處方立愈。鄰封匾額多出公手。爲文操筆立就。不事帖括。而務經世之學。重力行。不尙虛言。某次以急親友之難。一夜徒步奔天鎮而難以免。朋輩中咸欽敬焉。設教鄉村。其教人



亦重品行。尙氣節。文藝最後。又喜讀王陽明李二曲集。嘗謂學問重在實踐。非教人盜名也。庚子。拳匪起。愚人趨之若鶩。公斥其妄。平生不與地方事。對此獨力勸阻。公素重於鄉黨。卒如其言。而地方賴以無擾。詩學少陵。多憂國憂民句。然不留稿。自謂位卑言高。無補時世。故不欲示人。著有德堂家訓一卷。以遺子孫。

張暲。字緝熙。貢生。性恭謹。與弟昉事繼母以孝聞。其學以實踐爲歸。四子爲宗。外及於掌故之學。遇事法古。充宏州書院董事。凡五十一年。以其義務。故勞瘁不辭。篤學敦行。素爲士林推重。弟昉。字景星。亦貢生。性謙和。有經略。以誠取信於人。鄉里有爭訟事。得公言則立解。而待人寬厚。持家有道。尤爲人所矜式。無少長咸敬之。與乃兄暲。併充宏州書院董事。以子夔典貴。賚封奉



政大夫。

蘇澤。增廣生。篤行好學。孝友性成。清光緒三年。爲村民減免差徭。整飭村規。鄉人感德。勒碑於南大寺。又有慕家窰村。不滿十戶。每年竟出差徭宣錢一百二十千。村人苦之。無法完納。以致流離失所。乃呈縣令盛公。悉免該村差徭。村人因得安居樂業。而盛公並贈以實心爲善匾額。凡遇地方公益。無不身先倡導。縣教諭亦贈以人材翹楚獎語。急公好義。至老不倦。壽至七旬而卒。

李葵。同治癸酉科選拔。候選教諭。李厚積之第三子也。性純孝。幼失怙。酷嗜學。及長。家道中落。菽水奉母。定省無倦。且恆親滌溺器。宗族鄉黨稱孝焉。又奉寡嫂同居。俾全髮節。撫猶子讀書成名。西寧縣令嚴以盛。褒以事母能孝。



品望克端匾額。半生教讀。生徒以舉貢成名者甚夥。亦皆孝友成風。所謂孝子不匱。永錫爾類者。公之謂歟。

陳憲。字汝望。諸生。事母孝。母嘗患癰。親吮之。弟章。幼爲所鞠。官永平訓導。憲一日思之甚。冒風雪馳數百里往視。既至。復念母。泣涕不自禁。弟爲感動。即日乞病偕歸。時就官未朞月也。世兩高之。乾隆初。舉孝友。入彰善坊。

王五車。字書林。居家以孝友稱。兄亡。事寡嫂四十年不稍懈。性仁厚。與物無忤。尤喜施給。世居東城。凡城中修文廟興義學建社倉。皆所擘畫。家有田在城西。形家言葬當富厚。卽以其地爲義冢。曰。富一家孰若富一邑爲利溥哉。年七十九。以廩貢終。子七。併諸生。長應詔。次應緯。最知名。

王遂。字謹行。增生。祖經。有傳。遂少喪母。繼母劉虐遇之。稍失意。卽予杖。遂侍



養維謹。年四十。猶不免簞。卒無怨色。妻武氏。生有子女。以小故失母歡。即日出之。親族阻解。始聽其別居。凡七年。不同寢食。母悅。乃待之如初。

劉元標。字秀升。事繼母以孝聞。母趙氏。性嚴切。怒輒累日不解。元標長跪引咎。必母悅乃敢起。母生子元慶。友愛異常。衣食必先推予。元慶不事生產。多狹斜遊。每負債。拮据爲償。不使母知也。母感悟。待之遂踰所生。家貧。隱於醫。求診者無貴賤一視之。終身謙謹。未嘗有妄語。縣令楊贊襄嘗旌其廬。

### 涿鹿縣孝義

嚴濟寬。新州人。蚤孤。育於叔父清。比長。事叔如所生。叔老無後。濟寬憂之。百計爲置妾。歲餘叔父亡。以其妾有遺腹也。令妻晝夜護視。已亦時時審察。刻不去懷。後產得一弟。甫能食。取而抱哺。且同衾裯。若是者十年。乃爲延師教。



訓之。一日弟得疾。頗劇。濟寬焚香告天曰。天不即殄滅我嚴氏。令濟寬死。濟寬已有後矣。幸存弟。毋使我叔父無嗣。失我初願也。弟亦尋愈。母張卒。廬於墓側。人以時方多盜。勸歸。濟寬曰。吾正恐盜至驚吾母耳。竟不從。居數月。果有盜至。聞林中哭聲。覓之。見濟寬方匍匐塋域之側。他無所顧也。相謂曰。母乃孝子乎。遺米脯而去。

觀音奴。金唐兀氏人。自其父官新州。因家焉。少力學。事其父母承順無不至。處兄弟遜讓和藹。里人稱其孝悌。大定四年舉進士。任戶部主事。轉歸德府知府。興文教。毀淫祠。抑豪徒。懲猾吏。廉明剛斷。遠近視之如神。凡有冤不直者。雖數十年事。皆千里奔訴。乃立爲剖決。後陞都水監官。致仕歸。惟以孝悌訓子弟。庭以內肅肅雍雍。年六十九卒。



劉雄字仲威。元奉聖州人。世居喬山。初仕金爲南京行統軍萬戶。交遊賢士大夫。德性冲粹。才略過人。居常以孝義自勗。母亡。事異母一如所生。執父喪。哀毀致目疾。時祀齋沐敬謹。嘗曰。養生有不備事。猶可復。追遠不誠。祇誣神耳。其可追罪耶。鄉人貧者親死不能殯。來貸於雄。雄予金無愆。後不能償。則裂券免之。曰。彼葬親大事。彼親安而吾心亦安矣。其孝義概如此。晚任灣潮二河運糧萬戶。以中書左丞相府總管致仕。年七十五卒。

沈桂字廷芳。原籍浙江歸安人。明成化間。父淳當戍保安。桂毅然代行。至州。忍嗜慾。甘澹泊。竭力以供王事。雖在行伍。手不釋卷。循循如儒生。居數年。積有官賜。藉爲路資。輒詣歸安定省。不憚往來勞勩。路資外有羨。更造舟建橋。埋齒掩骼。惠及生死。若曰。吾爲此。將以祈吾二親壽也。既而二親先後歿。聞



之。向天號泣曰。天何使我拘於役。遠隔二親。竟不能生養而死。葬耶。即日結廬城外。奉二親神主。朝夕哭奠。三年不進城闔。時邊方多警。人爭入城避兵。桂守廬不去。然亦竟免。人以爲孝感所致。有司上其事。詔旌表閭里云。

朱紹泮。字騰蛟。州貢生。髫齡失怙。母蕭氏。性嚴而明。教子有方。泮承事左右。曲盡子職。母子依倚數十年。及母卒。泮頗精木工藝。手自雕刻母像。朝夕供奉。飲食必祭。出入必告。必面。春秋祭饗。衰號不輟。老而彌慟。古所爲終身孺慕。事死如生。孝之至者。其庶幾乎。宜其子姓蕃昌。書香繼美。食報於無窮也。

子彩霞。州廩生。孫耀先。州貢生。曾孫元纓。州庠生。

王國楨。州民人。乾隆四十六年。父庠生明。伴友遠遊。流寓伊犁。楨甫弱冠。習木工藝。養母董氏至孝。撫幼弟國賓。國治。極友愛。每以家貧。母老。不獲尋父。



跡爲憾。母卒。殯。塋甫畢。國楨曰。前此之不及省事吾父者。以有我母在。不忍舍而遠去也。今母逝矣。可以遂吾尋父之志矣。或有止之者曰。州去伊犁。萬有餘里。路遙費重。汝資斧不濟。將何以行。楨曰。吾自有隨身資斧在。售藝得錢。便可給費。必待腰纏十萬而後出門。吾恐終身無見吾父之日矣。且木尙有根。人豈無本。今諸公阻吾之行。將重吾不孝之罪乎。遂於五十九年春。背負斧鑿繩尺。沿途傭工。且行且止。歷十六月而至伊犁。既至。父已物故。楨雖胸悔恨。輒欲捐生以殉。承父執董大連。委曲勸慰。指以父靈寄厝之所。製囊歛骨。嘉慶元年春。負骸轉程。二年旋里。合塋於祖塋。道光元年。州貢生夏昭德等。以事聞於官。知州周起瑤。請旨旌表。

沈襄。字霞。忠愍公鍊子。隨父戍保安。遂入籍。補州庠生。鍊被難後。楊順復逮。



襄繫獄。絕食幾死。嵩敗。襄出獄。刺血作疏。奏白父冤。因得贈卹。襄承廕。歷官刑部郎中。出知姚安府。陳情養母。以廕讓弟裘。及襄子成立。裘復具疏歸廕。其兄之子。忠孝友愛。萃于一門。見府志。

張德成。字鳳儀。家貧嗜學。事二親至孝。處兄弟極謙讓和藹。二親年逾八十。先生已六十矣。孺慕之忱。如孩提然。平生行方志潔。品學兼優。嘗以袁了凡功過格自勗。教授生徒。逢朔望日。必衣冠嚴肅。焚香頂禮。宣讀訓飭士子文。及太上感應陰騭等篇。一時生徒。多有出其門者。嘉慶三年。州紳公舉孝廉方正。著有讀書十要。經史錄要等集。後由歲貢。選授滄州訓導。廉靜自如。八十外歸梓里。年八十七而卒。

張永昌。涿鹿人。世居西關。性至孝。幼失怙。僅薄田二畝。草房兩間。自甘清苦。



事母孝。出告入面。不改其常。年十六。傭工於人。得資盡交母。每飯必奉甘旨。而自啖粗糲。性慷慨爽直。遇不平。每爲人較是非。甚則直前奮鬥。然聞母喚斥。雖盛氣之下。俯首馳返。無敢稍延。嗣家境康裕。凡修橋築路。種種公益事務。恒解囊慨助。間亦身任經理。寒暑無間。心懷坦白。公家一粟一絲。不苟取。族弟其昌采昌。胥年近六旬。衣食無着。昌常給衣付米。及逝世。棺衾葬祭。如禮無缺。又置義地數畝。凡族人浮厝靈柩者。均得移埋於此。母守節至八十年。八十有一。無疾而終。

薛葆芳。字仲聯。邑庠生。性孝友。事雙親。定省奉養。無不周至。事祖母郝氏尤恭順。及卒。公哭泣至哀。喪葬盡禮。公二十四歲。失怙。弟萼方十齡。使之讀書。



慈愛如子。至十五歲。尊稟公欲舍學歸農。爲兄分勞。公不許。已乃披星戴月。獨任勞苦。迨弟遊泮而後。始許其從事田畝。鄉里咸義之。每飯必與弟對食。設弟不在前。必呼之。遇有佳肴。必讓弟舉箸而後食。弟不舉箸。決不先食。公年六十七。捐館舍。弟亦五十餘歲矣。同處四十餘年。兄讓弟恭。未嘗一日稍失和氣。洵孝友僅見之人也。

閻敏。民人。性孝友。喜談忠義。幼失怙。事母孝。後因販書遇竊。中途囊罄。二日未食。遂沿途索食。館友察其囊有細糕數塊。問何不食。曰歸以遺母。長兄超。州庠生。遊學病故。不知其處。敏遍歷兗冀等地以尋。不憚勞遠。竟以遇盜。驚成癩疾。其事母孝行維謹。蓋天性然也。厥後家益窮。母失明。凡扶持抑搔。及污穢浣濯之役。皆親身理之。母歿後。事孀嫂尤委曲盡道。邑人矜其孝友。爲



其嫂唐氏請旌。嫂歿三年。敏亦終。至今士大夫咸仰慕焉。

趙大本。字致中。其父儀式。鄉里中之忠直人也。本守父規。不敢易。母吳氏。嚴而有禮。本曲爲承順。凡百言動。務得其喜色。胞弟二。均以教養成立。一隸國學。一入武庠。家初貧。作商賈。後因疾。學書吏。遇鄉曲有構訟者。必苦言勸止之。越二年。遽辭去。嘗謂相知曰。吾輩學好人。作好事。大半以勤苦得之。宴安酖毒。豈虛語哉。性磊落。矜孤恤寡。排難解紛。皆視爲分內事。子姪輩均令讀書。卒年六十歲。有二子。長惇睦。咸豐辛酉拔貢。攷授八旗漢教習。授任大名府長垣縣訓導。次惇惠。廩貢生。

閃世美。字蔭槐。父宗溥歿時。君年方十六。身荷家庭重責。克勤儉。任勞怨。以興家立業爲職志。歷代先人俱習武。公獨樂文。勤學讀書。無倦容。其處家庭



待戚族。和敬寬厚。撫養胞弟世英成人。弟早亡。遺兩姪象辰寅辰。君教養兼施。皆得成立。名列膠庠。子輩均能自樹立。三子欽辰。歷充山東綏遠兩省知事。成績卓著。名聞遐邇。而孫枝鼎盛。亦皆才多學富。足徵君之德厚。

楊星階。字景卿。進士福五公之長子也。道光乙酉拔貢。咸豐辛酉舉人。公急公好義。曾於清光緒十一年正月。捨入涿鹿書院水地五十四畝。旱地一頃七十六畝。州牧爲公請獎。公婉辭以謝之曰。吾家本寒素。家嚴在日。業舌耕。自領鄉薦。捷南宮。以讀書興家。皆蒙書院栽培之力。今日捨此地畝。聊盡先嚴飲水思源之情。決不敢仰邀獎贈。紳董勸之再三。堅辭不允。光緒二十一年。捨入宣屬老龍背橋梁社水地八畝。充作搭浮橋之費。城中遇有善舉。公每首出巨資。以成其美。且贍宗族。濟困貧。無吝容。亦無德色。鄉里欽佩。至今



猶稱道之。

司雲龍。字汝霖。性慈善。清光緒十六年十一月。因順直水災至廣。承父命捐助銀一千兩。十九年三月。遵生母王氏繼母李氏遺命。捐入書院水地七十八畝。價銀合五百九十八兩。又另捐銀四百一十兩。洵屬善承先志。輕財仗義。紳士聯名呈請建坊。蒙督憲題奏。奉硃批着照所請辦理。並給予樂善好施字樣。由公自行建坊。並爲其生母繼母代行建坊。又遵遺命。撥入北關義學。紋銀四百一十兩。買水地三十三畝。建築瓦屋三間。不足。又捐入宣錢七百二十吊。

王銓。字允升。清九品職銜。賦性忠誠。克敦孝友。不苟言笑。尤慷慨好施。親族賴以舉火者數家。出資代購棺木者十一次。助人婚喪各費。尤指不勝屈。公



妹年十八。適邑增生張鎬爲妻。生二子。不數年。家道中落。數口嗷嗷。不能維持生活。公解衣推食。全家賴以溫飽。及鎬病歿。公又將胞妹及兩甥。接入已家。待妹如未嫁。待甥如生兒。課詩書。謀婚嫁。無一或缺。邑人文樹儀。操首飾業。貧甚。工資不能贍妻子。光緒十一年正月。擬出妻節食。聊以自全。公聞而急止之。遂向親友代爲求助。不足。公傾囊慨與。妻室賴以保全。公之墳地。爲合族祖塋。光緒二十九年。公獨出已資數百緡。將全部設備完美。修理整齊。又另設義墳一處。凡族人身故。無墳可葬者。悉得埋葬於此。合族感戴。至今稱道不置。邑人有申濂甫者。在外宦途作事。託公照顧家務。並經營財欸。適貸與王志貞宣錢五百緡。次年本利無着。申某雖不便需索。公以爲受人之託。當忠人之事。遂如數墊還。生平類此事者。不勝枚舉。其輕財重義。可以風



世矣。公於宣統元年二月卒。享壽六十有四。

懷安縣孝義

宋疆。懷安人也。素以善能養親稱。嘉靖己酉。母韓氏病。侍藥粥甚盡心。歿則廬墓三年。絕葷酒果脯不食。所司達其事於上官。上官不以申奏。久之。父虎又病卒。復廬墓。如守其母。或勸之曰。往未爾旌。何自苦如此。疆曰。吾爲此將以盡吾心也。旌不旌吾何意哉。竟不肯反。至終制乃已。

王琮。萬全左衛人也。父剛爲衛指揮官。有政聲。琮於序爲仲子。剛一旦得瘍疾。洞見骨腹。八日食不下咽。醫者環視其旁。無一敢任能療者。其問疾人無貴賤親疎。亦私相意曰。此公必死。神不能生之也。琮憂懼。默向別所焚香祝曰。天之德在好生。爾而不能生我父耶。因取刀割股肉爲湯。進父前。哭告



曰。適得少麁肉。醫以少藥入和。謂可已疾。請強食。父曰。已矣。肉其如命何。琮再泣懇之。父曰。強從爾。盡爾心耳。就食。更臥浹旬。疾愈。遂能視事如初。

李榮。萬全左衛人也。父寅年老患脾疾。眼失明。歷十餘醫不效。榮乃遍詣神廟禱之。至一廟。見焚香一道人。自云某從西嶽華山來。適覩爾驚惶狀。其何爲。榮告之。故道人曰。吾昔聞一人因其老父脾疾。割肝以飼。則其疾愈。爾能然耶。榮還。遽欲如其言爲之。忽左脇肉隱隱起。因遂取以爲羹進父。疾即愈。後月餘。榮備牲醴詣廟謝神。問西嶽華山道人。無有也。母亦孝誠所感。神默相之歟。

岳春。世襲衛鎮撫。廣額巨額。驍雄善戰。尤恪敦至行。弟興早殤。遺孤安甫七歲。躬自抱哺之。一日從外至。見安自厨出。呵其妻曰。兒不饑。曷茲出力撫膺。



慟哭。妻乃感動。自是每遠行輒隨之。雖往來京師亦不置。問婚與其子。俱擇名家納幣。迎娶亦先侄後子。其友愛如此。

岳安。號朴菴。少孤。育於伯氏。伯氏愛之。伯氏亡。厭於伯母姚。乃出就外居。躬耕無怨意。力勤所獲。若鮮衣美食。必推以遺伯氏之子。友愛勿間於初。與人謙而有容。終其身未嘗見怒色。嘗拾遺金六鎰。曰。非我所有而取之。天殃。人用急而失之。禍人。立市中。凡三閱月。遇其主而歸之。其忠厚謹愿類如此。子雄亦有孝行。孫倫嘉靖朝名宦。

孫光鼎。居邑之柴溝堡。慷慨好義。崇禎初。官鴻臚寺序班。時武備廢弛。鼎列牘條上十二款。皆切時務。獲下部議行。縣堡之北城塌。首請興修。又嘗捐貲募集義勇。爲保禦計。鄉閭賴之。年七十卒。子三。長枝華。太學生。次枝秀。官浙



江甯波巡海道。又次枝芳。官副總兵。二孫長三奇。乙未進士。次三晉。癸卯舉人。

張再良。字喬介。拔貢生。七歲喪母。父已年邁。承顏順志。倍極孝養。凡事稟命而行。遠出必安慰之。歸則周旋省問。每寢食。躬爲調視。如飲食有不適意。唾出。輒以手接。媿怨自責。更以美食進之。父八旬外逝。晝夜哭泣。如嬰兒。如此者三年。子榮祖。亦有孝行。登乙酉賢書。

高珩。好義樂施。順治三年。山西姜逆之亂。大兵往剿。駐師洪塘峪。有卒踰居民垣。擲之。誤破腦。主帥疑叛民。將擊之。堡中皇皇。珩挺身擔羊酒詣營門。跪白主帥曰。愚民無知。乞賜宥。帥乃意解。堡獲全。五年六月。洪塘十數堡霍災。稻不遺種。歲將饑。珩家有小黍種。漬而種之。約兩閱月。不遇霜。即可熟。乃以



車載黍。分鄰堡速種。是年霜遲。遂獲有秋。珮亦不責償。里中至今稱之。壽至八十二卒。孫與曾元。皆蜚聲饗序。

徐建猷。字允升。性孝謹。弱冠入邑庠。旋貢成均。任農部主政。先是兄與母相繼卒。猷佐父部署家事。內外秩然。父歿。哀禮備至。事後母以孝。奉媵嫂以敬。族黨咸無閒言。退歸後。彌謙牧好義。親鄰困乏者。輒賙之。不責償。咸豐七年。邑苦瘟。猷合藥以救。所全甚多。平居寡笑言。儉服食。遇公議。或與人排難。則便便唯謹。邑有義舉。必首倡之。倍於衆。及歿。城堡會葬者千餘人。子二。長登甲。附貢生。次名甲。優廩生。

劉永臣。本城人。素以好義聞。乾隆四十年間。初冬。偶適金字當。有以五十金易貲者。已投納矣。晚登計簿。失銀所在。永來往甚習。客作疑其戲廋也。趨叩



之。永意失此巨金。必多波累。因詭云。此無與衆事。乃余假以償逋。適匆遽未及告也。請暫署。容當璧還。事遂寢。比歲終。除舍得諸櫛下。啓視不爽銖釐。始悟前此蒙惡之故。急往媿謝。永無懟容。於是劉善人之日益熾。後歲饑。勸賑。邑宰楊。以好施樂義行。孚一鄉旌之。載彰善坊。

馬伸。字海峯。幼失怙恃。受撫於兄。且讀且耕。年二十。受室。逾年入泮。再試補增生。乾隆十八九年。柴之北小河水。連年氾溢。直冲堡城東北隅。幾至傾頽。海峯自備工料。躬率傭人。竭力堵禦。經營十數年。俾河水復歸故道。城垣既固。所全衆姓田產亦多。鄉人稱頌。遂有馬河神之號。至今猶有傳述其事者。牛來垣。清貢生。字紫卿。柴溝堡人。幼失怙。奉母以孝聞。平生好義不阿。訓育子孫獨嚴。子光耀。以得庭訓。中式戊子舉人。同治年上議廢義學。垣爲力爭。



恢復。以惠士林。光緒庚子拳匪之變。嘯聚徧全國。盲從者不識爲非。垣獨挺身直斥爲亂民。至是附和者皆退避不前。匪焰漸滅。卒得未遭聯軍塗炭。人咸佩之。其孫漢昭。漢融。尤能秉承祖訓。見義勇爲。不畏一切權貴焉。

馬萊。清庠生。字蓬山。柴溝堡人。篤孝好義。耕讀自娛。光緒初年。邑令李葆貞。因柴鎮義倉積穀霉蝕。擬爲糶舊更新。以期持久。善政也。惟以虧額。令民輸補。激動鄉愚反感。遷怒經手士紳。勢成騎虎。邑令聞知。即日駕臨彈壓。多方解釋。仍令補穀。民乃愈憤。集合三十六村民衆。蠶擁入城。包圍邑令行館。五日不散。經巡檢周守備保迭爲調解無效。萊時正在別墅課農。得耗。恐事出軌外。星夜回堡。以大義勸止。更爲邑令畫策。以虧數另由經理人商同邑令設法彌補。不累及民。事始息。迄今猶有稱頌不忘者。卒年八十有一。



王廣澤。柴溝堡農人也。年十六喪母。父續娶趙氏。不喜澤。逾年逐出。未給分文。澤仍日往省視。代父服勞。及父歿。弟尙幼。治喪無貲。乃向親友泣貸以葬。嗣奉養繼慈。撫育幼弟。精誠孝友。無不出自天真。母亦感其孝。迨繼母卒。買棺送葬。均以個人擔任。不累及弟。號泣盡禮。咸稱大孝。卒年八十有七。其孫輩。現皆肄業省師範。

李尙泰。東甘莊人。事親敬順。鄉以孝稱。且仗義好施。每年調濟親族鄉黨。不下數百金。享壽九十有二。光緒二十六年。褒以鶴算延年匾額一方。

李明德。字鏡塘。光緒辛卯舉人。天性慈祥。人稱愷悌。服務社會。大義爲先。光緒三十四年。充勸學所長。經教育會長阮渭溪。以毅力提抽廟產。強迫各鄉興辦學校。一年之際。成立小學五十餘處。然皆因陋就簡。校舍設備。均未完



全賴明德悉心籌畫。以善其後。遇有鄉村因攤歛。或爲村事來城起訴者。明德無不爲之排解無事。是以當時未聞有因村政涉訟。而至經年不罷者。皆明德以大義相責。化之也。及今鄉人猶稱頌不置。卒年六十有五。

### 龍關縣孝義

沈源。性最孝。家徒四壁。必極力營辦。務進甘旨。二親遂得優遊暮景。母偶得病。源因醫藥罔效。乃割左膊肉。爲羹進之。母病尋愈。父年七十餘矣。病時。恐源復爲此。泣謂源曰。爾母往日之疾。其獲愈者幸也。且爾亦聞身體髮膚。受之父母。不敢毀傷乎。毀傷即大不孝。爾何忍使我有大不孝兒。矧我年已古稀。爾謂爾膊肉。終能愈我疾。俾我終不死耶。源泣而從之。父卒。祭葬如禮。鄉人謂慈孝萃於一門矣。



高世旺。小白陽人。與兄世興。素相友愛。丁亥八月。兄弟同往樵採。兄遇虎。即去。世旺年僅二旬。不暇自顧。子身追之。用擔杖奮擊。虎棄其兄而去。兄昏絕。復甦。甫開眼。見弟在旁。急問曰。汝爲虎所傷否。若不自知遇害也。二子雖屬村民。天性真摯。當危迫之際。愛護心切。竟至自忘其身。稱爲二難。亦何媿歟。邢映華。字旭春。常峪口人。民國十四年春。由家起程。赴甘肅高台縣經商。至冬歸里。獲利甚豐。十五年復往。又獲奇贏而歸。至十六年春。仍欲自去。其兄映玉。不忍令獨受苦。欲代之。映華因念兄身弱。不令往。兄不從。映華邀友苦勸止。映玉泣曰。高台縣距家有五千餘里。交通難。何忍令吾弟一人受之。故吾決意去耳。映華無奈。祇得購齊貨物。聽兄前往。至高台。生意事頗順。不意十七年六月。兄得病危。友以電告映華。映華急往。至高台。時已十月中旬。兄



病稍減。則親侍飲食湯藥。晝夜不怠。次年二月。兄病又大發。因歿。時五月十二日也。及年終。映華以其兄靈柩歸里。共用運費至銀二千餘元。鄉人以難兄難弟稱之。

赤城縣孝義

楊清澄。雲州人。生週歲。父卒。母邵。爲人縫紉度日。清澄甫五歲。呼母求面。其父母泣曰。而父在。我能若是苦也。因領之葬所。清澄卽拜且泣。呱呱不絕聲。歸時而念曰。我無父矣。孝母可也。稍長。事母果備心體之奉。自絕葷肉。祈母永年。母疾。醫藥罔功。清澄默禱于天。病即愈。壽齊八旬。一旦母夢其父曰。兒孝。爾乃享遐齡。後三年。此月日。當隨我去矣。如期卒。

王國勛。開平衛指揮同知。萬歷中。累遷左軍都督僉事。生平喜讀史傳。襟度



開爽。善撫將士。有餘廩。盡散給之。父歿。疏請效文臣終制。不獲允。毀瘠不勝。喪事繼母孝。居恒澣衣淡食。以清苦風勵其子弟。

蘇枝若。字樹堂。赤城人。歲貢生。少穎悟。讀書務窮其理。設講席望雲書院。邑人僻居塞上。不知書有幾許。濂洛關閩之學。更未之聞。枝若多方購求載籍。以證講家得失。參究經史。理路旁通。每謂古人經濟。悉自理學中來。恒以致用望少年。邊陲桀驁之氣。多爲所默化。生平成人之美。扶人之危。急公好義。遇事得枝若一言。人輒爭先相赴。蓋敬服者有素也。

喬崧。字壽山。補邑武學弟子員。讀書不多。得解輒堅信。嘗讀君子無爭。與惟恐不傷人。深信射與讓反。矢與仁敵。遂輟武試。幼失怙恃。痛哀幾死。其師勸曰。禮經戒滅性。哀不解。曰。孝子重惜身。哀不解。復探其隱。誘之曰。父母惟其



疾之憂。則瞿然杖而起。適邑令籌留養費。念其母素憫寡人。曾欲輸金爲息本。遂出三百餘千。以爲邑士庶倡。令喜上聞。總督方公受疇。驛送手書額曰。倡善堪嘉。崧肩之趨墓。呼曰。此志兒竟成矣。嗣疏溢河之下游。葺泮宮之兩廡。經始必墓告如受命。落成必墓告如反命。一日語其子曰。父在子不得自專。參以祭如在之意。似不在而專。亦非也。專乎專乎。吾其免夫。子敏宗。字繼修。以文入泮。急公好義。善成父志。同治乙丑秋。河溢。其家漸落。力無能爲。人亦未嘗厚望。乃竟破產而預謀焉。

白光瑞。字輯五。鎮安堡人。早失怙恃。依兄成立。兄弟久析居。光瑞推產於兄。而兼善其弟。善居積。中年富有。兄適中落。又公其產。若未嘗析者。道光壬辰。饑饉相望。爲義賑。全活萬人。敦族睦婣。有古人風。鄉人被其盛德。從無至公。



庭者。子三。長振綸。補弟子員。次振紳。歲貢生。好善有父風。捐地九十餘畝。錢一千五百千文。建鎮安義學。資膏火。今改設鄉立小學。仍襲其惠焉。三振緯。咸豐初元。以廩膳生舉孝廉方正。孫四。長世符。同治癸酉拔貢。次世箕。世第。世箴。曾孫桂芬。桂芳。桂蔭。桂蔚。皆入邑庠。桂蔭字樾堂。桂蔚字文卿。孝友公直。遠近知聞。鄉人有涉訟者。得其兄弟一言勸解。莫不釋然。

鄭悟淦。字濟川。滴水崖人。幼穎悟。十四入邑庠。同治間歲貢生。居家授徒。延慶龍關獨理廳。士子多負笈來學。由其門補弟子員者以百數。倡修滴水崖學宮。春秋致祭。子玉林。歲貢生。玉林光緒乙酉拔貢。辛卯舉人。

孟敬業。字慎修。邑諸生。少有才名。家不中貲。而性好施。值癸巳歲。邑大饑。至易子食。請于官。倡設平糶局育嬰堂。糜金以千計。全活幾萬人。城東南河決。



籌費築堤造浮梁。俾不爲患。歲庚子。東三盟官軍南下。取道於此。役車疊出。民疲於供。且違農時。敬業亟解囊。復勸紳商。各出貲以助民勞。於是怨泯而頌聲作矣。妻古氏。每鬻釵質衣。以成其善舉。鄉里稱賢淑焉。其季子華。字實堂。道光巳酉拔貢。幼穎悟。性孝友。處世和而不同。爲鄉間所重。里有紛爭。得華一言輒解。官戶部主事。凡度支非手自握算不署諾。旣而積勞成疾。遂不起。訃至。邑人痛之。遂有筆諸誄者。依其官銜而特書曰。咸豐九年巳未春正月。戶部主事卒於官。

### 商都縣孝義

石有金。城內人。性至孝。父年老患麻木症。四肢抖擻。步履維艱。每食君必親喂。起止必親扶。便溺必親傾倒洗濯。歷十餘年如一日。



劉世昌。北門外袁家村人。君父歿後。母年五十。家道窶貧。藜藿自甘。而奉母必以甘旨。遇事母怒。譴責。君俯首笑領。毫不辨白。二十餘年。始終不渝。

### 烈士

烈士不以縣列。以其人少。無須列也。然亦各於文中見之。

江洪。萬全右衛人。沉重果毅。料事多中。正統六年。西部寇邊。洪從大帥王公驥。征進麓川。數力戰有功。陞指揮使。七年。敵至江湄。洪猝與遇。馬旋濘而止。遂棄騎疾鬪。自朝至晡。斬殺過當。日暮力竭。死焉。事聞。予褒贈。蔭其子山。爲都指揮僉事。

王鎮。萬全右衛人。通曉書傳。少時讀史。見古人死忠事。輒擊節稱歎。曰。男兒死當致命疆場。垂名竹帛。毋自汨沒。牖下足矣。他又何求。嘉靖丁亥。北部寇



邊。白葛峪。及青邊。羊房。陳騎數萬。進至小沙窰梁。時鎮以指揮使總千人往禦。身先行陣。爲勇敢倡。及與敵遇。自辰及酉。戰十餘接。斬獲無算。日既暮。敵騎益集。四面圍蹙。鎮衆寡不敵。與千戶江鉞俱死焉。敵憾鎮力鬥。致多殺傷。遂剗其腹。共出肝腑。傳視曰。是何漢兒。勇敢如是。兵既退。監司列狀上聞。詔賜鎮鉞祭。並蔭其子官。以卹死事。

韓俊五。張家口人。性誠摯。勤學業。嘗肄業於張垣高小學校。課餘之暇。每嗜閱報章雜誌。對時事多注意。辛亥武昌起義之時。曾密隨塞北諸志士。圖響應。事雖未舉。而革命之志益堅。謀畫益力。迨共和告成。袁世凱欲成帝制。殘殺革命同志。君恨之切齒。誓不共日。遂聯合洪爐毛紀堂諸志士。組織暗殺團。志在剷除袁逆。爲同志復仇。在張垣大昌茂院內。煉造炸彈。以備實行暗



殺事被政府偵探黃佛舞察覺。於三年二月初間。率同軍警。即時將君及毛紀堂何懋聲一併捕獲。連同炸彈押送北京軍政執法處。嚴加刑訊。君與毛君均判處一等有期徒刑。嗣經革命同志武小秋君。偵知黃偵探家中。截留此案查抄之造彈機器。意圖陷害黨人。君聞之。與毛君共同出首控告黃佛舞。煉造炸彈。蓄意顛覆政府。以家存造彈機器爲證。經執法處搜出證據。黃某自知不免。遂反噬君與毛君一同起意。是時執法處處長陸建章。殘酷性成。號稱屠戶。提訊之時。謂既是革命黨。同判處死刑。於二月二十八日。君遂被害。時年二十有五。毛紀堂與黃佛舞亦同時槍決。噫亦慘矣。夫君以青年學子。醉心革命。憤恨當道摧殘黨人。蓄意暗殺。其個人之生命。早置於度外。惟公所志未逮。反被黃豎子陷害。未免有玉石同沉之憾耳。幸北伐告成。黨



憲略爾省通志 卷十六 三十三  
獄平反。渠父悅長。呈請本省黨部。轉請昭恤。旋奉國民政府明令昭恤。併給恤金二百元。以示優待。君如有知。亦可以瞑目矣。

馬林。萬歷四十六年。以原任鎮守遼東總兵官。未幾移守開原。六月間。開原陷。死於城下。屍骸雜亂軍中。不復可辨。監軍御史陳王庭請卹。疏曰。刁斗能嚴。韜鈴素裕。馳塞外而摧堅。獨羨子龍之膽。守孤城以效死。誰歸先軫之元尸。沉瀚海。忠表陰山。實錄也。林豐儀。美髯。博經史。善談論。工行楷草書。得鍾王遺法。當時稱爲武翰林。及遇事變。挺身赴難。率子百戶燃。應襲熠。姪灼。婿李日莖。祁焯等。先後駢首就死。無絲毫繫戀。尤能以忠義顯。故爾時朝野。胥痛惜之。

馬爌。字元度。天啓中爲遼東遊擊。督師閣部孫承宗。以其父死王事。獎用之。



命代王楹守中右所。及巡撫袁崇煥更營制。以故官掌前鋒左營。數有功。屢遷至副總兵。守徐州。崇禎八年正月。賊陷鳳陽。大掠而去。爌及守備駱舉率兵入。以恢復告。遂留戍其地。八月。賊擾河南。總督朱大典命移駐潁亳。事定。還徐州。十年。賊犯相城。爌赴救。破之。羅唱河。尋以護陵功。增秩一級。歸德徐州間有地曰朱家廠。土寇據之。時出掠。爌勦滅之。賊犯固始。大典檄爌及遊擊張士儀等。分戍霍邱西南扼賊。縣東之賊。遂走六安。大典又移爌等。駐壽州東。兼護二陵。當是時。長淮南北。專以陵寢爲重。爌馳驅數年。幸無失事。十二年六月。擢總兵官。鎮守天津。久之。移鎮甘肅。十五年。督三協副將王世寵。王加春。魯蔭昌等。討破叛番。斬首七百餘級。撫安三十八族而還。其冬。督師孫傳庭檄召不至。疏劾之。帝令察爌堪辦賊。許戴罪圖功。明年秋。傳庭將出



關有傳賊自內鄉窺高雒者。檄燿移高州。扼其北犯。已而傳庭師覆。燿遂還鎮。未幾賊陷延綏。寧夏。遂陷蘭州。渡河抵甘州。環攻之。燿與巡撫林日瑞。竭力固守。賊乘雪夜坎而登。士卒寒甚。不能戰。城遂陷。燿。日瑞。及中軍哈維新。姚世儒。皆死焉。

馬宏儒。明殉難都督燿之子。順治辛丑武進士。歷官雲南掌印都司。康熙十二年。吳藩之變。脅授僞職。不從。餓死。妾李氏。賣身殮殮。事平喪歸。易棺時面

色如生。

縣志。註吳逆之變。詆其名。脅與俱叛。不從。以鐵錐錐其齒。齒盡落。血流滿口。終不屈。乃繫昆明南關之貴豐街。以兵守之。囚不食死。

李槐蔭。諸生。鹽驛道源之從子也。援例爲尉。宦遊吳楚。自秦入豫。嘉慶十六年。客滑縣署。縣令強克捷之捕教匪李文成也。槐蔭力贊之。及難作。賊囚槐蔭。脅之從。大罵不屈。絕脰而死。



楊瀛字太僕。蔚縣呂家莊人。曾入大同商業學校肄業。非所願也。及晉督創立學兵團於大同。招收青年。瀛聞之喜。更投身學兵團爲學員。期滿考列前茅。旋任熱河黃旅參謀長。繼改任奉軍三四方面入籍軍大隊隊副。奉軍敗。入籍軍遣散。瀛歸里。任蔚縣政警隊隊長。民國二十年。升充保安第四隊隊長。是年秋。土匪老代王。竄擾蔚邑。鄉民驚惶逃匿。孫縣長克信。派瀛帶隊進擊。遇匪於雙井山。縣城東北猛攻數次。匪勢不支。正追擊間。中流彈而死。時年二十五歲。地方人士莫不悼惜。厚卹其家。

馬友麟。山西陽高縣人。民國十七年。任延慶縣長。勤儉愛民。因駐雜軍。擅開義倉。食用倉穀數千石。兼以強索餉械。支應無策。不忍苛斂民間。吞服鴉片而死。



陳蘭澧。遼寧鐵嶺人。民國二十一年。任延慶縣長。執法峻嚴。臨難不苟。於大股土匪長驅直入。縣城淪陷時。仗義殉難而死。

李振岐。清武舉。署永寧鎮千總。品端術粹。保衛治安。不遺餘力。光緒季年。土匪夤夜入城。卽率領營兵。迎頭痛擊。奮不顧身。土匪開槍還擊。左脇突中流彈。受傷甚重。登時氣絕身亡。

王敬。字子修。明隆慶右衛人。

現在懷來城內

性梗直。行不類己者。勿與交。初爲指

揮同知。與指揮張澄。同學於學正李彝。以忠廉相勵。正統己巳。寇犯雲州。隨守備孫剛赴援。遇戰。與澄及百戶陳顯。共以身蔽剛。俱戰死。吏民死難著名者。九十餘人。俱賜卹典。參政葉盛奏建義烈祠祀之。有碑記其事。

張澄。明隆慶右衛人。

現在懷來城內

永甯指揮。與指揮同知王敬善。同學於學正



李彝並以廉稱。正統己巳，寇犯雲州，隨守備孫剛赴援。遇戰，澄偕王敬及百戶陳顯以身蔽剛，剛敬顯俱戰死。澄猶力戰不退，欲得殺三人者，隨亦被害。事聞，賜卹，入祀義烈祠。陳顯懷來人，官百戶。正統己巳，寇犯雲州，隨守備孫剛赴援戰死。事聞，賜卹，入祀義烈祠。子震年十九，痛父之死，尋尸陣所，卒得之而還。

向通，隆慶右衛人，少讀書，每見古名將所建立，輒欣慕之。長承父蔭，爲指揮同知。成永寧，孫剛雲州之役，向往從之。敵衆圍官軍數重，勢不敵，隨剛死。景泰元年，遣禮部郎中白璧諭祭，蔭其子。又有右少監谷春者，監守永寧，偕剛援雲州，及中途遇寇，春已先入雲州，旣而聞剛死，奮曰：人孰無死，得死沙場，幸耳。遂自縊。雲州隨陷，事聞，賜祭如剛。



曹銳。世居保安前所曹官營。年二十。爲延慶州庠生。嘉靖戊午三月。寇圍營。銳方在學舍。以母在家。疾走歸。突圍救母。被執。罵不絕口。遂遇害。寇退。入收其屍。猶有怒色。

徐珏。涿鹿人。以武舉充本縣參將。善書能文。雅重學校。捐俸修櫺星門。嘉靖十六年。虜犯連家營。珏擊敗之。增修墩堡。陞總兵。其麾下頭目官有安國者。敗虜於花園屯。

劉大信。原任河南祥符縣主簿。廉介有聲。致仕在籍。年已八十餘。崇禎甲戌。大兵至。聞城破。嘆曰。城已破矣。餘生何爲。從容冠帶投井死。

張師載。宿學有養。城破。顧妻子曰。取衣巾來。拜文廟自縊死。先是人約縊城去。載從容曰。上天生我。上天死我。生我死我。有何不可。門生周天成贊曰。穆



穆師範。孔學是研。履仁蹈義。身瘁城顛。衣冠自訣。忠孝克全。死生數語。千古猶賢。

閃煜龍。武進士。欽點侍衛。任山西懷仁城都司。陝西寧羗營遊擊。出師湖北喇叭洞。陣亡。照參將例賜卹。給予雲騎尉世襲。襲次完時。給予恩賜尉。世襲罔替。

文運熙。字春塘。州同職銜。西環琳公之子也。少穎異。負雋名。登道光壬辰賢書。甲辰大挑一等。以知縣用。籤掣陝西。親老告近。改掣山西。初任絳縣猗氏。俱有政聲。丁艱服闋後。仍歸陝西候補。歷任米脂褒城等縣。大吏咸以諳練。相器重。於咸豐十一年。題補城固縣事。同治元年。逆匪竄入漢南。攻圍城固。公督率丁勇。剿除鄧逆股匪於上元觀。大吏保奏。奉旨以直隸州知州補用。



併賞戴花翎。二年五月。隨大隊克復斗寶二山。厥功甚鉅。嗣因城固圍急。日夜焦思。積勞成疾。遂患吐血之症。雖蒙賞假調理。猶帶病防勦。旋致身故。公歿後。城固失守。妻李氏罵賊遇害。長媳范氏投井隕命。女喜妞亦服毒死。三子。長湘。早逝。次灝。承祧別門。三瀚。在山西即補未入。因案保舉。以縣陞用。及聞城固之難。亦一痛身隕。誠可謂一門忠節。

李彬。幼爲衛指揮使。負勇力。遇敵敢鬥。累有斬獲功。陞都指揮。歷守備。參將。僉書都司。嘉靖癸卯。鎮立五戰鋒營。彬領其一。甲辰。虜寇膳房堡。總兵卻永禦之。懼敵勢盛。乃合五戰鋒兵。尾其後。敵過蔚州廣昌。攻破三家村堡。將逼紫荆。因入蔚南山。山勢峻隘。尋路拔營歸。而五戰鋒之師值之。彬奮力與戰。凡十餘合。互有殺傷。四營兵登山却避。不相救援。力竭而死。事聞。彬得褒旌。



餘四營見廢削去。

楊茂春。懷安世襲千戶。崇禎末。歷陞黃甫川參將。闖賊兵至。茂春櫻城堅守。闖以美言招之。登陴罵曰。無賴賊奴。方欲啖爾心。以報朝廷。言未畢。有書辦任彥芳。王佳胤者。早已降賊。聞罵。從背刃其手。家人焦萬。急救入寺中。茂春罵不絕口。東南遙拜曰。臣生不能報國矣。自縊而死。事聞。奉旨歸葬。惜兵戈旁午。未蒙旌典云。

安重倫。字叙五。左衛鎮人。察省警官畢業生也。先充綏遠集寧縣巡官。民國十五年。任懷安縣中區巡官。九月間。適狼溝聚有土匪五十餘名。倫以責無旁貸。奮不顧身。帶領警士數名。挺身往勦。猝與匪遇。對擊良久。以衆寡不敵。爲匪擒殺。死狀極慘。全城爲之追悼。並請卹金五年。



李育德。井溝人也。民國十八年秋。初任西區保衛團隊長。適遇駐防杜團譚變一連。盤居東山。經官紳議定。聯合會勦。伊作先鋒。行中途。突遇匪。方化裝密探。誘入山口。爲匪擊斃。人皆悲之。爲請卹金五年。

張貴。腰站人。爲團丁。民國十七年六月。因匪攻東塔村。團丁盡力抵禦。中彈身死。年僅二十九歲。人皆惜之。當由董事會議給卹金五十元。

江騰龍。長安嶺守備。崇禎七年。大兵從中路之楊許二衝。分頭進兵。攻龍門城。未下。遂轉版搭峪川。奔長安嶺。圖南牧。而長安跨東西兩山爲城。兵登嶺注射。守卒驚散。城陷。悉遭塗毒。騰龍被執。憤激而死。母楊氏。妻張氏。皆死焉。事聞。賜卹典。又命立祠以祀之。

附同死諸人。掌印鄧國昌。千百戶徐文魁。李化龍。王科。張文采。李儒。郭九崇。



生員安汝盤。楊植。喬雲路。任大受。任大才。

以上皆奉旌表。

周允益爲鷓鴣堡防守。崇禎九年六月。大兵從鎮安邊入。疾走環攻。允益偕備禦指揮沈明泰。暨諸官生。約分陴拒敵。允益首撓鏑鋒。明泰等力戰益猛。銃礮矢石無虛發。兵恨攻愈急。忽城頂火藥確自焚。趨撲之。西北角遂陷。一時屠戮之慘不忍言。而官生家之婦女。死於水者。數井皆滿。後皆奉勅賜祭。賜贈賜蔭。賜匾以旌之。

附同死諸人。把總馮世官。指揮耿思誠。千百戶姚世純。胡大貴。姚進綱。徐承

祚。魯三聘。李衍。省祭官雙成。

以上祭蔭。

生員張國昌。牛化麟。武舉阮立都。民總郭寵。鄉約申譚。

以上俱賜祭。

周允益妻李氏。沈明泰妻張氏。姚世純母李氏。姚進綱妻黎氏。索維伸妻李



氏。張汝奇妻某氏。

以上俱旌匾。

王恭辰。清附生。南區晏家莊人。嘉慶二十三年。因知縣劉銘鼎。典史許人應。科歛無度。具呈上控。迄二十五年。經總督方審明。將知縣典史。一律奏請議處革職。並酌定地方辦理夫馬草束等項差務章程。奏奉諭旨。照議辦理在案。案結之後。恭辰又以徵收屯糧等弊。上控。而狀有形格勢禁。難以證明處。經總督顏批。司行提人卷審訊。後雖獲通令。嗣後徵收。悉依章程。百姓咸蒙其福。然恭辰竟依不干己事。慣訟播弄。例問發廣西南寧府新寧州充軍。自道光二年八月二十九日。奏准執行。其子瑞。係廩生。求以身代。不准。至九年。始赦回。時年八十有一歲。人皆壯而哀之。僉曰。因公受累。七八年間。羈囚異域。亦良苦矣。先生曰。本爲百姓除苛政。百姓安而吾之心亦安矣。吾身之夷。



狄患難其小焉者也。志氣德澤。迄今猶爲人贊嘆不置。且現在堡內居民百餘戶。而王氏一族。竟過半數。或服務地方。或耕作田畝。舉止猶有乃祖風。張信。獨石城鎮撫。盧讓。獨石城百戶。宣德四年六月。寇入開平。二人同戰死。

明史宣宗本紀。

孫剛。宣府前衛人。由軍功陞都指揮僉事。守備永寧。正統十四年秋。敵寇獨石。馬營守臣楊俊。棄城遁。遂犯雲州。剛率永寧兵援之。至中途遇賊數萬騎。且戰且行。兵寡不敵。死之。賜祭祀義烈祠。

宣鎮志。

王敬。字子修。隆慶右衛人。性亮直孤介。不類己者。雖貴弗與交。初爲指揮同知。與永寧指揮張澄。同學于學正李彝。居職並以廉潔稱。正統己巳。寇犯雲州。隨守備孫剛赴援。遇戰。與澄及懷來百戶陳顯。共以身蔽剛。剛敬顯俱死。



澄欲得殺三人者。力戰不退。隨亦被害。

宣鎮志。

向通。隆慶右衛人。少讀書。每見古名將所建立。輒欣慕之。長承父蔭爲衛指揮同知。成永寧。孫剛雲州之役。通往從之。賊衆圍我師數重。勢不能敵。乃隨剛死。景泰元年。遣禮部郎中白璧諭祭。蔭其子。又有右少監谷春者。正統十二年。監守永寧。偕剛赴援雲州。及剛至中途遇賊。春已先入雲州。旣而聞剛死。奮然曰。人孰無死。死沙場乃得爲忠義鬼。吾將從剛地下矣。遂自縊而死。

上聞義之。賜贈祭如剛。

宣鎮志。右孫剛王敬向通。谷春以死雲州之難載之。

劉海。開平人。少襲父蔭。爲前所試百戶。巡撫劉源清奇其貌。選爲營軍百夫長。呼前戒曰。若有奇貌當貴。否即爲忠義人。宜自立。海頓首謝。嘉靖庚寅夏六月。哈真率衆寇馬營。陳兵馮家梁。時海爲北路參將先鋒。奮勇前進。遇賊



萬餘騎。從山谷中突出。海語旗牌官張宣等曰。我輩今必不得脫。惟死可以報國。遂犯陣。手刃二賊。皆墮馬。各殊死戰。賊從旁睨視。忿甚。合圍射之。勢不能支。遂死。剝海屍三段。源清聞之曰。我固知海忠義士也。卽不貴。死有餘榮矣。

疏請贈廕。祀褒忠祠。

北中三路志

張宣。開平人。由祖廕爲右所百戶。充督陣旗牌官。聞寇警。詣母焦堂前拜曰。兒此行必擒賊首。回仍得見母。否卽死賊。母弗念兒也。含淚而出。隨參將赴援馬營。遇賊。宣與劉海身先士卒。奮擊。賊衆力不能拒。遂死。賊憤其勇。剖腹取膽。乃去。官爲殮葬。怒氣勃勃猶生。因請贈祭褒忠祠。

宣鎮志

張承憲。龍門所將家子。有氣節。嫻文義。歷任獨石參將。天啓三年。調署龍門所。參將事。時北寇毛乞炭。駐牧龍門所邊外。適直指行邊。至滴水崖。承憲慮



有不虞。遣健丁隨衛。寇果擁衆至塞挾賞。承憲誓以正理。曾詞屈而心益憤。夜從滴水崖邊入。伏鮑魚窠。縱火焚劫。承憲聞警。揮兵疾馳進戰。賊少北。躍馬追之。至鮑魚窠。伏兵四起。險隘不能回旋。與騎下馬靠窠對射。飛矢貫頂。尙握刀殺賊。從騎偕死。是時龍門所營兵守兵。以承憲爲權事官。不用命。故及于難。事聞。賜祭廕。入褒忠祠。

范寶仁。字玉成。張北縣人。年三十八歲。民國十八年五月間。充寶昌公安隊分隊長。十九年升爲隊副。帶隊剿匪。常與土匪接仗。是年冬十二月間。在柳條溝。一次擊斃土匪十一名。因與土匪結仇。二十年七月。土匪等約共二三百人。擾亂縣境。范奉令出剿。集隊兵及保衛團不足二百人。七月四日出發。由官馬溝。跟踪追擊。至六日上午十時。追至保勝鄉毛不拉溝東山。與匪接



戰爲匪壓迫。力不能支。猶當場擊斃四匪。冒死而進。因所持槍不便。竟被包圍。隊副與郭隊員有旺。暨馬隊兵陳有邢。義二名。均被匪擄。力逼投降。范等不屈。同時遇害。

梁庫。原籍陽高。寄居商都保大公司。民七八兩年。曾任興和東北兩區稽查員。剿辦匪首老二貓銀虎子有功。民國十一年。著匪盧占魁。率夥二百餘人。由興和竄入縣境。知事章鴻年。集中全縣警團百餘名。分頭剿擊防堵。是時君任第四區稽查員。首告奮勇。率丁行至白銀不浪。與匪接仗。奮不顧身。單騎追逐。擒匪奪械。頗著奇功。由是任全縣保衛團總稽查。屢率團丁。四出游擊。崔苻聞風遠颺。十五年冬。匪首五大嘴等。率夥二百餘人。擾縣境。甚猖獗。劉知事蔭榛。立臨時游擊隊四十名。舉君爲隊長。率隊剿捕。驅匪至張北腦。



包圖山與匪肉薄鏖戰。卒以匪衆兵寡。後路爲匪包圍。彈盡身亡。勇烈之氣。有足多焉。

喬廷福。字星三。康保人。民國十九年。本縣保衛團改爲保安隊。喬充保安第一分隊長。職雖微而深明大義。每聞匪警。輒以身先。匪衆被擒擊斃者。不可勝記。大吏傳令嘉獎。是年六月。剿匪追至縣屬之加卜寺後山。匪已佔據山頭。負隅力抗。情知不敵。然義憤所迫。奮勇直前。欲力擒之。而後快。竟被擊中要害而死。其所謂殺身成仁。志士不忘喪元者歟。

李占第。字殿魁。原籍張北縣人。民國初年。徙居康保第三區。務農。性勇敢。好義急公。尤精槍法。民國十一年。康保創設保衛團。孟登瀛爲團總。由團丁提升占第爲班長。每剿匪。奮勇直前。十五年。晉奉戰後。充第三區分團總。十七



年升游擊隊長。深資得力。是年北伐告成。又改任公安局巡官。嗣因腿疾請假。病痊後。南下充任第一騎兵師連長。旋回籍。任本縣第三區游擊隊長。本年駐康警備司令。委充特務第二營營長。二月間奉令出發。路經三區。突遇匪衆。挺進直前。匪正不支。忽被槍中胸部。當時卒。匪乘間逸。地賴以安。紳商聞訊。咸感其忠勇。莫不痛惜。可與喬君廷福。並垂不朽矣。







察哈爾省通志卷十六下

戶籍編

名宦

萬全縣名宦

鄧訓字平叔南陽新野人禹第六子也建初六年遷護烏桓校尉黎陽故人

多携將老幼樂隨訓徙邊鮮卑聞其威恩皆不敢南近塞下

東觀記曰吏士常大病瘧轉易

至數十人訓身為煮湯藥咸得平愈其無妻者為適配偶

章和二年代張紆為護羌校尉永元四年卒官

前烏桓吏士皆奔走道路至空城郭吏執不聽以狀白校尉徐儁儁歎息曰

此義也乃釋之遂家家為訓立祠每有疾病輒此請禱求福元興元年以皇

后父賜策追封諡曰平壽敬侯

後漢書本傳



李膺字元禮。潁川襄城人。累轉烏桓校尉。鮮卑數犯塞。膺常蒙矢石。每破走之。鹵甚憚懾。後漢書 黨錮傳

田豫字國讓。漁陽雍奴人。文帝初。北狄疆盛。侵擾邊塞。乃使豫持節護烏桓校尉。豫將銳卒。深入鹵庭。出鹵不意。追討二十餘里。僵尸蔽地。又烏桓王骨進。桀黠不恭。豫因出塞按行。單將麾下百餘騎入進部。進逆拜。遂使左右斬進。顯其罪惡。以令衆。衆皆怖懾。不敢動。便以進弟代進。自是胡人破膽。威震沙漠。三國志 本傳 魏略曰。鮮卑素利等。數來客見。多以牛馬遺豫。豫轉送官。胡乃密懷金三十斤。謂豫曰。我見公貧。故前後遺公牛馬。公輒送官。今密以此上。公可以爲家資。豫張袖受之。答其厚意。胡去之後。皆悉付外。具以狀聞。於是詔褒之曰。昔魏絳開懷以納戎。今卿舉袖以受狄金。朕甚嘉焉。乃即賜絹



五百匹。豫得賜。分以其半藏小府。後胡復來。以半與之。

三國魏志。裴松之注。

源懷。河西人。隴西宣王賀子。高宗末。爲持節督諸軍。屯於漠南。景明中。詔爲使持節。加侍中行臺。巡行北邊六鎮。恒燕朔三州。賑給貧乏。採風考論。殿最事之得失。皆先決。後聞時京師遷洛。邊地遙遠。加以連年旱儉。百姓困弊。懷銜命巡撫。存卹有方。便宜運轉。有無通濟。細民爲豪強陵壓。積年枉滯。一朝見申者百數。所上事宜。便於北邊者。凡四十餘條。皆見嘉納。正始元年。蠕蠕南寇。詔懷以本官出據北蕃。指受規畫。諸所處分。皆以便宜從事。懷至雲中。蠕蠕亡遁。旋至恒代。視諸鎮左右要害之地。築城戍守。凡表五十八條。世宗從之。遷驃騎大將軍。卒諡惠公。

魏書本傳

左承業。陝西鄜州監生。雍正十三年。由縣丞陞任。盡心民事。百廢俱興。縣城



東沙河護堤。洗馬林西沙河護堤。皆由詳建。即其創修縣志。考訂精確。體例謹嚴。亦可見其概已。

莊有昌。廣東番禺舉人。乾隆二十六年任。詳請添建大境石壩。

張慶成。字秋樵。浙江平湖舉人。道光六年任。創建書院。重修文廟。重修大境門石壩。雖由紳士之好義。要其熱心公益。取信于人者。預也。歷任五年。以陞深州去。至今邑人思之。

姚忠亮。字心園。咸豐六年任。大境壩要害被冲。邀紳捐資修築。八年錢法壅塞。百物昂貴。平糶米穀。救濟市面。并制器練士。以防宵小乘機倡亂。造福地方。功德非鮮。

王汝霖。字雨亭。光緒二十一年任。秉性剛直。聽斷明決。到任後。先訪問民間



疾苦。剷除勢豪土棍。審案詳明。民無冤獄。卒以辛勤過度。積勞成疾。歿於任所。旅櫬歸里之日。人民多有泣送者。

萬和寅。字藎卿。江西人。光緒三十一年任。熱心教育。時學校初設。人情疑懼。因念鄉村教育之難於創始。召集各村長副。凱切曉諭。明定賞罰。限期設立。未半年。成立初小學校數十處。又因師資缺乏。詳請開辦師範講習所。並升送士紳赴保定學習警察。預儲警務人才。至對俄商外交。成績尤著。當光緒三十三年。俄商欲在橋東開闢商埠。壟斷市利。乃據通商條約。以元寶山一帶。爲通商地點。距橋東有十餘里之遙。詳請力爭。幾經交涉。繪圖立說。呈省轉部。據理力爭。事乃寢。造福張埠。厥功甚偉。

陳銍。字震之。山西繁峙人。宣統元年任。甫下車。勤求民隱。博訪周諮。聽斷明



欽定四庫全書  
寧陽縣志  
卷十六  
三

決。故有陳青天之譽。辛亥政變。人心汹湧。公兼任張家口工巡局總辦。保衛地方。煞費苦心。張萬得保安全。去官之日。人民思念不已。故張萬兩地均勒德政碑以爲紀念。

### 蔚縣名宦

李君球。蔚州刺史。龍朔元年。大募兵。拜置諸將。天子欲自行。君球建言。高麗小醜。何至傾中國事之。有如高麗既滅。必發兵以守。少發則威不振。多發人不安。是天下疲於轉戍。臣謂征之未如勿征。滅之未如勿滅。會武后亦苦邀帝乃止。

周房。無爲州人。由指揮同知。洪武七年任蔚州衛。衛經元亂。人民未輯。房受事。悉心經畫。肅軍伍。信賞罰。招集流亡。撫循三年。民氣漸復。乃修廢舉墜。衛



署祠宇。以次繕葺。又謂城垣爲根本大計。鳩工建築。歷數寒暑乃成。高厚峻

整。迄今稱鐵城焉。

蔚縣志

鄭牧民。奉天人。康熙初任。下車伊始。慨然有移風易俗之志。邑人魏敏果公象樞。時乞養里居。牧民爲捐俸建願學堂。造門敦請會講。士習一趨於正。時官蔚學者。學正爲王步階。字允升。陽城宿儒也。著有夢易解。吏目爲大興林養心。字華泉。亦奇士。並以道義相勵。牧民刺蔚六年。大著循聲。內擢刑部員外郎。

李英。字樂天。扶風人。繼曹任。時頻歲阻飢。科派積弊。重爲民累。英竭意撫字。陋規如衙署鋪墊。夫役津貼。暖泉西合營市集雜稅。歲約五千餘金。皆嚴革。勒諸石。在職三年。政平訟理。乃葺文廟。修志乘。捐俸爲生徒膏火。孤貧月糧。



計經費米三百餘石。深沙里二堡戶多逃亡。逋賦纍纍。久困追比。爲代輸其課。招徠生聚之。先後又及四百金。己亥春。大雪。徒步禱晴。問民疾苦。泥淖深沒。不恤也。其肫摯如此。先是州民例輸鵬膀黃鷹。及狐狼羔皮。皮張絨毛。多非土產。每歲按丁斂銀。以應里問。車輛暫因軍務借役。後視爲常。供差無時。而運餽煨炭。尤妨農耕。英至。皆罷除。及遷興化知府。其去也。猶力陳其弊於上官。並勒石禁之。蔚民感其惠。迄今言循吏者。必首推焉。

屠沂。孝感人。康熙甲戌進士。選蔚縣知縣。有冰蘖操。面目嚴冷。人不敢干以私。以訟至者。立決。時稱霹靂手。而涖民雅慈愛。縣中雜派集稅。悉與革除。設立義學。暇則集諸生爲之解經義。指文奧。聞者興起。後以行取去。士民爲刊

石頌德焉。

蔚縣志



馮敬玉。字其相。宛平人。練達有幹濟。康熙末。知蔚州。州城北枕壺流。夙稱形勢。歲久。河南徙。壕盡決。城危者屢矣。敬玉至。始議築堤。捐俸爲倡。民感焉。輸力恐後。堤成。建祠其上。面河闢軒亭。環植萬柳。爲觴詠地。蔚然居一州之勝。州人名曰馮公堤。都中士大夫。多賦詩紀之。

王景皋。滿州人。繼屠任。性仁慈。有度量。推誠接物。雅與士民相安。獨嚴馭胥役。不得少售其奸。故事行幸供億。州縣悉派之民間。景皋獨出俸以濟。比遷守長沙。以官逋幾不得去。蔚民爭爲代償。有宋炳奎者。助粟七百石。不少愆。聞者義之。士民亦豎碑署前。與屠並稱賢令云。

李培仁。字樂山。奉天人。爲政務實惠。視民瘼如己疾。乾隆初。連歲大水。城南辛落塔。城西下官莊諸村。田廬半沒。培仁力請於大府。賑濟災黎。隨興帑工。



發庫欸。築以衛之。村人賴免流亡。在官捐補義倉。買儲賑米。養濟院。漏澤園。亦其所建。歲入俸金。率以濟貧。佐公。而自奉儉約。布衣蔬菜。怡如也。嘗病。州志簡略。將重輯之。經畫已具。未及成書。以憂去官。

靳榮藩。字价人。黎城人。年十九歲。乾隆乙丑進士。歷官河南知縣。三十八年。遷蔚州。性敏悟。博極羣書。詩文蟄伏一世。初至蔚。即闢書院。進諸生講授。文習爲之一變。尤多惠政。築暖泉石壩。開東村河渠。興復水利。公暇。輒循行村野。課民種植。詢有孝弟睦婣及節婦。皆表其廬。或爲詩文以獎勵之。有古循吏風。職再滿。遷守大名。著述甚富。有吳詩集覽行於世。

### 宣化縣名宦

耿况。字俠游。扶風茂陵人。少從學老子於安邱先生。後爲朔調連率。

王莽改  
上谷曰



朔調。

王莽敗。令子弇詣更始。會王郎起兵邯鄲。乃馳北上謁光武。留署門下吏。弇因說護軍朱祐來歸。發兵定邯鄲。光武笑曰。小兒曹乃有大意哉。因數召見。從光武北至薊。聞邯鄲兵到。光武遂南馳。弇走昌平就况。况乃使寇恂東約彭寵。各發突騎二千匹。步兵千人。弇與景丹寇恂及漁陽兵合而南。所過擊斬王郎大將九卿以下四百餘級。定涿郡中山。凡二十二縣。遂及光武於廣阿。時更始徵代郡太守趙永。况勸永不應召。令詣光武。五校賊二千餘萬寇上谷。况連擊破之。賊皆退走。建武四年。進封况險廩侯。彭寵擊征鹵將軍祭遵於良鄉。遣弟純發匈奴二千餘騎。胡騎經軍都。弇弟舒襲破其衆。斬匈奴兩王。寵退走。况復與舒攻寵取軍都。五年寵死。天子嘉况功。使光祿持節迎况。賜甲第。奉朝請。封牟平侯。進武十二年。况病。乘輿數自臨幸。弇兄弟六



人皆垂青紫省侍醫藥當代以爲榮况卒諡烈侯

後漢書本傳

王憲字顯則北海劇人秦丞相猛孫也世祖卽位爲上谷太守加中壘將軍賜爵高唐子清身率下風化大行後歷并州刺史加安南將軍封北海公天

安初卒諡康公

魏書本傳

楊佶字正叔南京人統和二十四年進士第一歷官翰林學士承旨重熙元年以工部尙書爲忠順軍節度尋加特進檢校太師同中書門下平章事復拜參知政事兼知南院樞密使重熙十五年出爲武定軍節度使境內亢旱苗稼將槁視事之夕雨澤沾足百姓歌曰何以蘇我上天降雨誰其撫我楊公爲主溧陽水失故道歲爲民害佶以已俸創長橋人不病涉及被召郡民攀轅泣送終吏部尙書同平章事有登瀛集行于世

遼史本傳



鄭亨。合肥人。洪武中封武安侯。永樂元年充總兵官。率請將軍備宣府。時元兵出入塞下。亨度宣府萬全懷來形便。每數堡相距。擇一堡爲高城深池。城多置門。浚井蓄水其中。度可容數堡士馬者。謹斥堠。遠瞭望。寇至。夜舉火。晝鳴礮。并力堅守。規畫周詳。後莫能易。七年復出鎮。從北征。發卒萬人。治龍門道過軍。宣德元年。鎮大同。轉餉宣府。招降酋長四十九人。

明史本傳。

羅亨信。字用實。東莞人。永樂進士。正統三年。巡撫宣府大同。汰諸衛冗官老弱者四百八十餘人。時遣官度二鎮軍田。一軍八十畝外。悉徵稅五升。亨信言。文皇帝時。詔邊軍盡力墾田。毋徵稅。陛下復申命之。今奈何忽爲此舉。塞北諸軍。邊防勞苦。無他生業。惟事田作。每歲自冬徂春。迎送瓦剌使臣。三月始得就田。七月又復刈草。八月以後。修治關梁。計一歲中。曾無休暇。况邊地



饒瘠。霜早收薄。若一收稅。則民不復耕。必至竄逸。帝納其言。土木變作。人情  
訥懼。有議棄宣府城者。官吏軍民紛然就道。亨仗劍坐城下。令曰。出城者斬。  
又誓諸將曰。朝廷付亨信此城。以死守之。人心始定也。先奉車駕至城南。傳  
命開門。亨信登城語曰。奉命守城。不敢擅啓也。先乃去。赤城鵬鸚懷來永寧  
保安諸守將棄城。並按舉其罪。時天子既北狩。寇日薄城下。關門左右皆戰  
場。亨信與總兵楊洪。以孤城當其衝。洪既入衛。又與朱謙共守。外禦強寇。內  
屏京師。以勞進左副都御史。景泰元年。年踰七十。乞致仕。不許。入京。陛見。辭  
益力。免冠叩首。帝見其著兜鍪處。顛髮皆盡。乃許焉。歸八年卒。祀昭德祠。

明史

本傳

黃可潤。福建龍溪人。乾隆己未進士。二十年知宣化縣。先是郡城西。久爲沙



沒。往來者乘以出入。可潤督修城垣。築長隄。內外植柳以蔽之。修柳川書院。設府縣四城義學。人利賴之。

採訪冊。

汪守正。字子常。浙江錢塘人。光緒初年。任宣化知府。有冰孽操。面目嚴冷。人不敢干以私。持已甚端。而諳練吏事。力杜輕生刁訟之風。屬縣有累訟不休者。至府立決。僉悅服之。尤精於醫。說者謂治瘰。崇熙皇太后疾。頗蒙厚遇。郡人問病求方。來者不拒。遂嘖嘖以國手稱。任宣數年。卒于官。本署胥吏。集資塑像。配享於藥王廟之東廡。今廢。

李肇南。字少軒。四川宜賓縣進士。出授宣化知府。光緒二十年。涖任。以振興文教。革除積弊爲務。收令皆憚其丰采。胥吏不敢爲非。每接見下士。循循善誘。無倦容。嘗謂宣郡豈乏人才。而科第鮮通。不能與他屬爭勝。皆守斯土者。



咎也。親臨書院。認真課士。厚給膏火。以獎勵之。又以宣化府治。有縣文廟。而無府文廟。因籌款購地。擬擇日開工。而公素性伉爽。因與武職不和。移任河間。宣郡人士聞風相告。如赤子之失慈母也。趨詣津門。擬作借寇之舉。時玉夔石督直隸。素知公。乃屈於成例。未便准。然其意已默許矣。次年復歸宣。任卽鳩工庀材。刻日興工。甫半年。文廟落成。今之城東北隅。所謂關岳廟者。卽當年李太守經營締造之府文廟也。而四牌樓西。十屬公所。亦同時建築。從此賓至如歸。而無旅況之憂。皆公賜也。當火車未通。居庸關山路崎嶇。行人苦之。公請諸上司。計往來車馬。按數抽捐。以作修道費。工旣成。除歲修常費外。所有盈餘。移修鷓兒嶺道路。仍餘一萬金。發商生息。擬作善舉八條。如鄉會試賓興費。施捨棺木。籌設煖廠。歲修壩工。施種牛痘。敬惜字紙。津貼候補。



具文立案。以傳永久。張家口外。因墾荒涉訟。命公查辦。查得荷包溝無主荒田五十頃。公請上憲。留作柳川書院常產。招佃開墾。獲利甚豐。今乙種工業學校。常年經費。大半賴此。光緒二十六年。山東拳匪肇亂。延及直省。宣化亦聞風響應。公曰。此八卦教之餘孽。無使滋蔓。蔓難圖也。公力禁之。而各官崇奉之。公乃臥閣不出。徒歎無可奈何。尋拳匪勢益張。謂公爲二毛子。時拳匪呼洋人爲大毛子。呼教民爲二毛子。必欲殺而甘心焉。南關龍嚴寺。聚衆設壇。召公至。不來則就殺之。公毅然往。甫至門首。殺聲震動。公直趨入。焚香禮拜。從容而退。毫無懼色。公視此情形。恐成大禍。與各官議。保護教民出城。而封閉其住屋。以免焚戮之慘。否則其禍蔓延。恐不堪收拾。同官皆反對。不得已。密令司城者夜出教民。所全活甚衆。越數日。教堂火起。燒燬教民房屋殆盡。他官率領愚民。齊



聲稱快。公歎曰。愚民無知。地方官不能禁制。將來賠償。必十倍於此。誠可恨。亦可憐。愴然泣下。痛不欲生。臥病者久之。一日召諸生入內闈。屏退左右。語之曰。外兵大至。匪燄將息。而潰勇亂民。實爲地方害。應速練民團。各自保衛。諸生以爲然。擬仿照保甲法組織之。已有端緒矣。而其中道縣作梗。欲行又止。俄而聯軍北上。京師告警。太后皇上出巡。時城內團匪除敗歿外。尙有二百名。公諭令解散。免駕至受驚。匪聞之怒。有匪首王老在者。率衆匪直衝府署來。左右告公曰。匪至矣。勢甚凶。請速避之。曰。吾豈畏匪者哉。爲國爲民。聽命於天。匪雖衆。其如予何。手携小槍。坐大堂以待。開儀門。呼匪首入。王老在氣燄兇兇。衆喧囂呼殺。直逼公。公急呼開槍。槍發塵沙起。昏不見人。匪疑有神助。不敢動。公伺間持小槍視一匪擊之。應聲倒。衆匪大懼。皆匍匐乞哀。



公曰。解巾帶。繳凶器者。出之。負固不服者。殺毋赦。言未既。脫包巾。解腰帶。擲大刀。抱頭鼠竄去。彼時北門甕城關帝廟。北街大真武廟。尙有兩團未散。計二百餘名。亦來攻府署。幸城守營都司張維隆。中營守備何天龍。素與公同志者。率兵來援。途與匪遇。逐至南街。城已閉不得出。商店皆閉門罷市。營兵與團匪相持。稍一動搖。地方必遭蹂躪。公聞之。單騎馳市面彈壓。獲王老在至四牌樓下。斬首示衆。衆匪愕然。咸釋裝繳械。令城門半啓。放之使出。移時匪類肅清。地方安堵。此一役也。民間雞犬不驚。團匪死者僅二人。寓慈愛於勇猛之中。定危亂於呼吸之頃。公之膽識兼優。於此可見。當清帝后之將至宣化也。總兵何乘鰲。兵備道鍾培。知縣陳本。皆東向接駕。公曰。值此人心慌亂之際。地方何可無官。設有不虞。孰任其咎。我留之以防患未然。一以安置



行在。一以保衛閭閻。凡扈駕來者。俾寓南關旅舍。不令入城。恐良莠不齊。擾害百姓也。於駕至之前一日。有太監數人。要住行宮。司城者不能禁。邀公至。公以善言喻之。太監自稱爲李總管。奉太后命。預備行在。公曰。行在如有未適。是我等地方官之罪。請君權屈城外。毋多心。太監忿忿去。次日駕至。以上谷公所爲行宮。衆官覲見出。昨日自稱爲李總管者阻公。謂公曰。太守識得我是真是僞。公曰。吾今日只知有太后皇上。汝等誤國害民輩。何物小子。吾不識也。拂袖而去。時親貴大臣在側。聞之皆有慚色。公之嫉惡過甚。不畏權貴。類如此。明日太后召見。公痛哭流涕。慷慨陳詞。謂非嚴辦罪魁。不足以服外人之心。公哭。太后亦哭。曰。似此良吏。屈於下僚。予之過也。命爾扶予西行。可乎。公曰。遵旨。次日詔公馳赴前站。知府事另人代理。郡人聞之惶甚。聯名



數十人詣行在奏留。莊親王據情代奏。太后允諾。行至左衛。仍命歸任。公還謂郡人曰。君等奏請予歸。意良厚。是予不幸中之幸。然亦幸中之不幸也。當時都不解其意。甫越月。免官之令下。飭赴行在候旨。公知怨家多。往則不利。遂告修墓歸。啓行之日。父老攀轅。婦孺飲泣。自府署至南門。途爲之塞。

王守堃。字敬輿。河南祥符人。前福建巡撫靖懿公之孫也。由蔭生授部曹。簡放知府。光緒二十八年。自大名府移任宣化。以育人才開風氣爲己任。時宣郡僅有中學堂一。然係書院改設。諸事草創。功課不完。公悉遵部章。銳意進行。故來學者日衆。三十一年。貲送學生二十餘名。赴東洋留學。郡城內師範實業各種學堂。及府勸學所教育會。相繼成立。每念學務擴充。經費支絀。乃倡捐二千金。勸諭各縣共集一萬三千餘金。購置口外商都牧羣荒地五百



頃。招佃開墾。擬作中學堂基金。不幸連年旱荒。未獲利益。是公之遺憾也。然猶慮教育之未易普及也。捐廉設模範小學。并予常年經費。宣化學務之進行。自公始。彼時府縣同城。雖係本縣學務及公益事。莫不贊助之。尤熱心實業。注意森林。西郊外植有楊柳數百株。今已成大材。皆公賜也。三十三年因課最升授保定府。瀕行。士子爲刊去思碑。立於南關八蜡廟前。以誌公德云。

### 張北縣名宦

完顏宗道。本名八十。金上京司屬人宗室。世宗時。授右衛將軍。出爲西南路副招討。章宗即位。除西北路招討使。故事。諸部駕馬八百餘匹。宗道辭不受。諸部悅服。邊鄙順治。歷任方面。所至有治聲。在河中府日。民立其像。以時祭之。泰和四年卒。贈龍虎衛上將軍。



鄒振岳字岱東。清光緒十年。涖撫民府同知任。勇於任事。愛民如子。彼時文童尙未列入考試。公提倡歲科兩試。附屬萬全儒學。始得與考。士林均感之。又口外放地。狡黠者侵佔。孤弱者受欺。歷任委員受賄不直。公查勘得實。分別清理。農民歡呼震地。並於十八年放賑救饑。活人無算。書法宗米。筆力勁秀。所遺字跡。後人多寶重之。

查美蔭字仲申。天津人也。清光緒二十九年。委署撫民府同知。涖任伊始。提倡教育。創辦學堂。及三十年。在張垣立高等小學堂。並立講習所。以宏師資。是爲張北創立學校之始。爲人精明幹練。勇於任事。民樂稱之。對教育爲首創辦者。功尤不朽焉。

劉印昌字綬卿。直隸武清人。接任宣化時。值國體變更。政務繁劇。頗費苦心。



民國三年。升任興和道尹。兼理張北縣知事。將撫民府改爲張北縣。時公適當其衝。創辦新政。不遺餘力。遇事果斷。持大體。雖在改革紛紜之際。諸事迎刃而解。有條不紊。一時稱賢令尹。

石琳。字雲峰。海城縣人。由督標行伍出身。於清光緒十四年。升興和城千總。任捕緝土匪出力。閭閻賴以安謐。總督李。以精明練達。緝捕勤能。等考語獎勵之。後因減官米。及代民求賑。人民送萬名傘二柄。並保守備之職。

李長貴。在清光緒年間。創辦洋務局。保護張庫往來行旅客商。後升爲撫民府興和城汎千總。勤辦土匪。甚爲得力。匪徒聞風喪膽。人民賴以安堵。雖愚婦販夫走卒。遠近皆知其名。

胡萬清。字選一。前清武舉。實任獨石廳黑河汎千總。於宣統二年三月。調署



撫民府興和城汎千總。當建築張北公署時。監工購料。頗著勤勞。民國八年。援庫西北軍。至張北城內。與巡防馬隊起衝突。正在鳴鎗危急時際。人民懼。胡冒險奔走雙方。溫言勸慰。事乃解。化險爲夷。後大軍雲集。徵集車馬。支應兵差。人民不受騷擾者。皆胡維持之力也。

達米林扎普。關東蒙古人。先祖從清入關。充軍官。後撥居口北。改爲察哈爾蒙古八旗。歷代祖先。或爲箭長。或爲御前侍衛。或爲參領。均居顯職。及至扎普。於同治二年間。因直隸荒旱。勸捐八旗。以私蓄銀五千兩。戰馬五十匹。捐助賑災。受惠者均感之。事聞詔加三級。委爲第一台正參領。旋奉旨前往內蒙各旗勸捐戰馬。委爲商都牧羣總管。賞戴二品頂花翎。因公積勞病故。都統文奏請以軍官病故例。從優議卹。奉旨准廕一子。給予六品頂戴。其子朋



楚克那木吉勒襲廕。累功至正參領之職。蒙賞二品花翎。其孫蘇毓秀。至今仍管理第一台事務。並兼蒙古隊長之職。

### 延慶縣名宦

劉鳳鏞。山東人。光緒二十九年。任延慶知州。興辦工藝局。創蒙養學堂於村鎮。共計六十餘所。於媽河廣濟橋之東北岸。造紀念林。萬柳垂蔭。防堵河漲。均大有造於延慶。

葛亮升。貴州畢節縣人。宣統元年。由多倫同知。調延慶知州。提倡新政。不遺餘力。奉令減免差徭陋規。如商行面料。鄉民柴草總行店。應交各差徭。由縣議會議決取銷。設戒烟所。搜集有鴉片癮者千餘人。傳入戒烟所。戒清始准出所。直隸總督袁。以有守有爲。勤政愛民之詞。褒揚之。州民歌功頌德焉。



懷來縣名宦

于成龍。山西永甯州人。歲貢生。卒謚清端。清康熙十九年。任直隸巡撫。題請裁撤懷來等處鹽商。令民包辦引課。永食彝鹽。至今便之。邑人建祠於東門外。尸祝之。二十五年。直撫從士民請。崇祀名宦。其孫準。以蔭任直隸守道。至懷來等處。喂養三旗馬駝。事集而民不擾。有乃祖風。士民頌之。

許隆遠。字耐園。南潼人。康熙五十年。以舉人知縣事。洎任六年。政通人和。百廢俱舉。邑志自明萬曆末年。至清康熙五十年間。閱百二十載。文獻久闕。詳加搜探。輯成之。任滿以課最內用。去之日。士民攀留。家尸祝之。爲立德政碑。邑人朱文卿爲之立傳。

熊錫祺。江西高安人。清道光九年。以進士知縣事。先是嚴君爾諱。甫下車。即



以興文教爲己任。各州縣皆有書院。懷獨闕。嚴急議創建。一以假郭氏園。延師集生徒。爲每月考課地。一以謀卜地建院。嚴卒。事遂寢。熊抵任。集耆紳議更舉。捐俸興修。籌經費。增膏火。規模大具。每科試始有舉於鄉者。然則嚴態二公。實爲開發懷來文化之導師焉。

吳永。浙江紹興人。清光緒二十五年。來知縣事。年僅二十八歲。爲人精明強幹。二十六年。拳匪蠭起。以邪教邪說。擾亂地方。吳不爲所惑。並倡練保甲。捍衛地方。清德宗及慈禧太后西幸。道經縣城及沙城保安一帶。大軍雲集。潰兵竄擾。地方秩序。幾將不保。吳一以護駕。一以安撫百姓。雖隨駕西行。而地方克保無恙。君之力也。至今邑人稱之。

陽原縣名宦



潘澤。字澤民。宣德府人。少讀書。遊許魯齋先生門。至元中。知宏州。州旱。詣郭西泉。投文祝曰。山川之神。其所司者。惟在能興雲雨。以水下土耳。今旱。嘆如是不能膏澤之。神固不得其職。使州刺有罪。幸漏譴於明天子。必將殃之。宜止其身。吾民何辜。橫罹斯毒。則爾神有峻罰矣。敢恐惶退俟。終不得命。當自劾去。其夜有光如星。騰泉。明日大雨。爲屋祠龍泉上。自澤未至。州之南。巨風爲災。又爲文禱之。自爾災衰息。前政繫疑盜八人。榜掠百至。求迹無所。澤明其非辜。皆出之。劫家訟澤。故縱。無幾時。而盜果得之。西京械成獄。他郡過治。囚號市曰。此邦之人。神明公。以爲包拯復生。獨不能相活耶。澤將召問。同列謂宜發卒衛出吾界而已。讞非吾事。澤曰。人求直其枉。烏可陽爲不聞。卒問之。竟雪其誣。朝廷赴州市牛。澤懲他郡驅牛至官。擇可受值。聽命浹旬。至廢。



穡事令持價即鄉民自爲市吏無所姦利事集而民不困轉知興中州去人

歌思之。

元姚燧浙西廉訪副使潘公神道碑。

屈可賢字汶川華州人萬曆二十八年任爲舉子時嘗夢守宏州既到官詢知西城即宏州也肅然自惕城無學元初州人李仲臣曾建孔子廟久圯即故址創新之捐俸以供祀其爲政務持大體獄訟爲簡遇士謙抑士亦不敢干以私也職滿遷知桂陽州祀名宦。

薛濂字心言元和人道光九年由進士任持躬清介自奉如寒素臨政務存長厚持大體民不苛之在官五年去之日囊無餘資士民送者爭餽贖謝弗受。

荆世榮字白華萬全人以百夫長官西城及三十年廉勤有爲士大夫皆樂



與之交。道光丁酉旱蝗。議發倉賑貸。令某不以時給。飢民數千大噪。賴世榮馳諭始解散。乃計口受粟。設廠城南。即以世榮監之。民感其惠。迄今誦之弗衰。

涿鹿縣名宦

賀溱。山西臨汾舉人。嘉靖四十三年。任本州知州。隆慶元年。陞北直隸永平府同知。歷陞遼東兵備道。以開源參政致仕。溱在州有政績。前此州城築土爲之。溱始建甃城。樓櫓堅固。民立祠於州署之東祀之。萬歷十年。奉例毀祠。字。知州劉必紹。以修築甃城。保障邊郡。功不可泯。屢爲申請。祠得以存。劉必紹。山東文登恩貢。萬歷十年任。陞陝西平涼府同知。士民保留。改陞保定府同知。管州事。在任八年。修建文廟碑坊。創輯州志。開濬渠堰。修葺倉廩。



捐置義塚。開觀德圃。創建寅賓館。惠民藥局。百廢俱興。日無寧暇。  
楊汝楫。奉天蓋平人。康熙三十八年任。廉明正直。與民休息。洎任七載。事簡  
民安。重修文廟。建南社學。創涿鹿書院。置田以養士。增修州治。增建永豐倉  
廩。重修五公祠及李公祠。以景先賢。陞兵部員外。士民立祠於書院東偏。刻  
石記去思。以識不忘。

楊桂森。雲南石屏人。進士。兩任涿鹿縣知事。不媚權貴。直督琦善。曾執經門  
下。楊未嘗有所干求。曾於保定謁善。善憐其車敝馬羸。令乘其輕肥以歸。則  
其在職清廉可知矣。素以振興教育。提倡實業爲己任。遇書院官課。既已取  
定。超特壹三等。必再邀超特兩等生員至署。校正誤謬。課若特佳。則捐廉獎  
賜。重修孔廟。祭器樂器。亦皆重新整理。復按詩章譜樂。集衆生習禮。然後齋



戒沐浴以祭。一時詩書禮樂之風蔚然興起。每對邑人曰。涿鹿河流甚廣。田多肥沃。以六穀出產而論。當冠塞北。惜不諳養蠶種棉之術。服用布帛。概皆仰給於人。爲一大漏卮。有勸民養蠶織布文。載於志乘。保安州志。卽所修也。在任時。年已七十。紳商贈清白古風匾額。去任後。思謳不已。乃爲之塑像。供奉。稱爲楊公祠。

楊文藻。名文藻。字麗生。陝西大荔縣舉人。光緒庚子。拳匪之亂。涿邑不靖。下車甫三日。招民衆會議。議決勸捐練勇。以保境安民。不數日。集捐款五千餘緡。於是招募勇智壯士。從事教練。又興辦保甲。家出丁演槍。親帥校巡。前募勇。後甲士。槍械鮮明。氣勢雄壯。匪聞訊奔避。闔邑安堵如初。至中秋。突有潰兵數千。羣集沙城堡。是堡西半屬涿鹿。東半屬懷來。公知其不可以勢力爭。



也。單騎星夜馳往。責以大義。曉以利害。堡西之匪遂遠竄。俄而堡東父老泣求退匪。公不分畛域。慨如所請。匪曰。公涿鹿縣牧。非懷來縣牧。何以既驅堡西之兵。而更及之堡東耶。暢勃然怒曰。我坐中國官。當除中國亂。何地之民可死。何地之匪可容。爾等必欲淹留於此。請先斷我頭。然余所募鄉勇不下萬餘。我東來時。已豫備出發。瞬至。將與爾等拚命。爾等吉凶禍福。當自知之也。匪聞之大驚。不及束矢秣馬而竄。沙邑全城遂得保全。是年冬。匪焰又熾。親率勇士。前後捕斃匪首王萬財於懷屬贊家堡。崔得勝於縣屬石門村。惡僧三和尚於縣屬謝家堡。僧盤踞東安寺。霸寺產爲己有。既誅僧。以寺產歸學校。呈上司立案。翌年三月。外國兵自京西北上。道過沙陽。公優待之。因是地方得以不擾。七月。和議成。賠款甚鉅。我邑派捐一萬五千兩。公力陳民艱。



遂蒙豁免。時已捐得八千。公僅解交三千。又從學董王振鐸之請。撥餘金五千於學校。以爲興學之資。壬寅七月。調署清河。父老呈請借寇。終不可得。相率餞於郊。皆爲之灑淚焉。

江開泰。字璞卿。光緒壬寅七月。繼暢文藻知縣事。時土匪又熾。爲鄉里患。江親同練勇赴鄉巡視。歸謂士紳曰。宣懷保三縣地。犬牙相錯。若不共同清鄉。恐匪患難除也。於是檄宣懷兩縣。聯合包勦。初會哨於懷屬新保安。繼會哨於宣懷黃莊村。會銜張示。共緝匪類。州屬美所石門南山一帶。距城遙遠。則委其村英果幹練之士紳。練鄉勇。辦保甲。以守衛。縣城練勇。仿陸軍章程。聘師教練。劃排變陣。挖壕築壘。無不井井有條。遇有匪驚。躬親統師攻擊。冰天雪地。不畏辛勞。彈雨槍林。不避艱險。一年之久。匪患始平。於是興實業。立學



校種種善政。次第舉行。在任記功七次。甲辰夏。升任邯鄲州。民感德不忘。乃於縣城西北。豎立德政碑。以誌不忘云。

朱正元。字秀峯。安徽壽縣人。清光緒三十一年。來署斯土。時人心固陋。懷疑新學。朱患之。政餘之暇。輒馳詣高小學校查視。良師優徒。必有獎贈。以時講演。鄉里因是化除陋習。咸令其子弟來學。而招生始無困難之虞。又日與學董王振鐸。研究擴充法。提捐不在祀典之廟產。水旱地共一千一百一十三畝。學款因而充裕。時警政創始。規模未具。公延聘天津巡警專門教官。訓練新式體操。逐日上堂講解。警士應有之智識。時警款毫無。復從米粟牙用田房牙用藍靛牙用項下。酌量抽捐。俾損私肥而利公益。在任僅八月。其造福於學警兩界者至鉅。可謂勇於任事矣。



懷安縣名宦

王擴。永平人。明昌五年進士。博學多聞。初任鄧州錄事。潤色律令文字。遷懷安令。猾吏張執中。誣敗二令。擴到官。執中挈家避去。邑人畏服。遷同知德州防禦使。歲阻饑。奉詔賑活饑民。翦除逋盜。再遷監察御史。詳讞冤獄。凡鬥殺奏決者。章宗輒減死。擴謂同輩曰。生者既讞。地下之冤云何。是時置三司治財。擴上書曰。曹望之昔爲戶部。財用殷富。政固在得人也。今三司職掌。皆戶部舊式。官亦戶部舊官。而易之。豈愚於戶部。而智於三司乎。既而三司竟罷。故人張煒。職辦西北路糧草。積有亡失。擴按之。無所假借。煒使人道意。擴曰。旣奉詔。安得顧故人哉。貞祐間。上守禦河東策。鑿鑿可行。奏不見省。終陝西東路轉運使。行六部尙書。致仕。卒諡剛毅。



田琢。定安人。明昌五年進士。任懷安令。調尙書省令史。貞祐二年。中都被圍。琢請由間道往山後。招集義勇。以爲宣差兵馬提控。同知忠順軍節度使事。經略山後。琢至蔚州募兵。旬日得三萬人。入山中界屯駐。別遣沈思忠往弘州等處。招集蕩析百姓。得五萬餘人。可充軍者萬五千人。分屯西山諸隘。未幾諸隘失守。琢移軍沃州。朝廷令于衛輝大名就食。尋詔徙屯陝。琢至陝。上書曰。河北失業之民。僑居河南陝西。不可數計。加以百司用度。三軍調發。春種不廣。收成失望。軍民俱困。實係安危。臣聞古之名將。雖在征行。必須屯田。趙充國諸葛亮是也。古之良吏。即當豐裕。亦急農桑。黃霸虞詡是也。方今曠土多。游民衆。乞敕有司。選能吏。勸課耕墾。富者備牛出種。貧者備力服勤。若又不足。則教之區種。期於盡闢而後已。官司圍牧。勢家兼並。亦籍其數。授之



農民寬其負算。省其徭役。使得盡力南畝。則蓄積歲增。家給人足。富國強兵之道也。宣宗深然之。興定初。遷山東東路轉運使。行六部尙書。宣差便宜。招撫使。時李旺據膠西。張聚據棣州。李全據安邱。琢遣將次第討平之。東境以安。會叛將張林作亂。謀害琢。琢以聞。宣宗度林難制。欲馴致之。乃召琢還。行至壽張卒。

李棟。號在菴。直隸無爲州人。世襲山西都司太原右衛指揮同知。嘉靖三十七年。任柴溝堡分守參將。勤政愛民。凡百興舉。嘗於洗馬林堡。鑿井一十八處。建築營房五百餘間。甃墩二十七。邊牆一百餘里。又修築所轄六城之公署。城樓學舍倉廩。捐置義學學田。士民咸利賴之。後調本鎮南路參將。闔屬民懷其德。勒石紀之。



祖允煥。漢軍鑲白旗人。康熙三十二年。任懷安縣。時宣郡調餉。旗馬責辦。芻  
菱。民間兼之。倒斃賠累。公私棘手。煥調劑措置。動中機宜。又嘗以形家言。縣  
巽方文星所占。特捐俸建城東南角文昌祠。凡利弊關民生者。靡不力爲興  
革。去之日。民立碑誌其遺愛。

武一韓。號坦菴。山西太谷人。雍正五年進士。任懷安令。秉性耿直。立政務在  
愛民。甫下車。遍諏疾苦。聞邑有楊木長柴之徭。積年派民輸解爲累。即申請  
捐俸代輸。民得免於役。併立石示後。至今爲惠政。後以便民徵收本色。被黜。  
邑人遮道扳留。如失慈母云。

楊大崑。字玉峰。山東歷城縣人。乾隆四年。任懷安令。甫下車。以重士愛民爲  
己任。興學校。築隄防。編保甲。建坊表。復於簿書之暇。留心掌故。以縣志久缺。



遠稽近考。得殷武二氏稿於周生家。編輯成書。捐俸刊版。爲懷邑文獻之始。事載邑人張泌等楊公德政誌。

何承緒。江西星子縣人。道光元年。任懷安令。懷邑南界大河。多遭水患。何下車。相度形勢。捐俸築隄。水患以息。迄今農安於野。商安於市。皆何之力也。鄒振岳。字岱東。山東淄川縣人。同治壬戌癸亥聯捷進士。宰懷安五年。多善政。性磊落。務在作人。甫下車。開課署內。旋約邑人孝廉劉好信。附貢徐建猷。廩貢宗光熹。歲貢馮兆吉。捐建文昌書院。延名宿主講。暇輒至院中察勤惰。進生童等。親爲指授。其風雅逸韻。迄今猶存。

龍關縣名宦

章焯。字子政。號枝石。浙江山陰籍。會稽人。績學工詩古文。

本縣舊縣志即爲其所撰

庚



辰遴內府教習。壬午北闈掄元。以南籍改置第五名。丙戌授龍門令。下車裁革一切卮漏。公務悉爲賠墊。六年以來。不下數千金。用是居久而愈貧。尤不肯輕出一差。不得已用之。撫然曰。毋乃驚我父老乎。閭閻但知息事。而不知其所以寧人者。其用心亦良苦也。雅意作人。鼓舞士類。勤勤懇懇。以讀書明理。諄復告誡。衛習不尙斯文。至斯乃知向學。窮簷小堡中。誦聲作焉。征比錢糧。不忍多所敲撲。民亦惟恐後時。蓋仁心爲質。痾癯在念。寧一身茹荼。不使百姓失養。六年如一日。閭閻漸有起色。是焯齋而民豐。焯苦而民樂也。壬辰春。奉旨行取。無計攀留。行李蕭然。士民憐之。闔邑紳衿徐方杲趙維倫陳師古王縉劉楫徐方震趙曜倪宏位王延相陳琦張登第等公識。

鮑汝璠。字渭青。安徽壽縣附生。宣統三年。知龍門縣事。甫下車。即以興利除



弊。潔身惠民爲己任。翌年立商務分會。正副總理。宋有祥。馬宗祥。及會董趙玉璽等。以清時舊有七種陋規。歷任縣宰。每年之中。取之商家。雖發官價。實受重虧。年復一年。照舊繳納。久成例事。實難猝改。幸遇鮑公清廉。遂請將舊行陋規。改照時價採買。即爲批准。此百十年久有之例弊。一旦慨允免除。非廉明愛民。曷克臻此。在任常躬親剿匪。捐廉興利。善不勝舉。其裁七種陋規。尤爲商家所感念不忘云。

張昭芹。字魯恂。廣東樂昌縣籍。清季以舉人出任四川德化縣知縣。政績卓著。民國初辭歸京師。三年冬。攝龍關縣篆。輕車簡從。隻身蒞任。傳達公事。祇用一僕。勤政愛民。勵精圖治。事無鉅細。必躬必親。不一月間。舊弊全革。積案悉清。其聽訟也。隨批隨傳。隨訊隨結。片言折獄。案無留牘。對緝捕。主張最嚴。



盜賊斂跡。地方安堵。禁賭不主重罰。惟事懇切勸導。默化潛移。賭風果絕。人始信道德齊禮。有恥且格之言。爲不虛也。延見士紳。推心置腹。創辦新政。以身作則。教育實業。警察道路。極力倡辦。尤嚴督察。因之人無冗濫。款無虛糜。百廢俱舉。咸與維新。種種政績。屢經上峯考查。列爲最優。於五年調陞大名。即經闔邑紳民。臚陳事實。稟請挽留。蒙巡按使朱批。臚陳張知事政績。均屬實在。應飭後任。賡續進行。紳民挽留縣長。例不准行等語。臨去時。人民攀轅臥轍。途爲之塞。迄今猶口碑載道云。

赤城縣名宦

趙致安。中山人。家貧無書。手錄口誦。過目不忘。至正五年。守雲州。均賦減刑。招亡戢盜。民各安其業。乃飭學官。士子肄業其中。舊無公舍。使至館於民。



苦焉。乃擇隙地爲館廡。度閒田數百畝。募民耕種。以廩餼之。歲旱。齋戒禱神。禱畢。即雨。人謂爲守雨。及得代。民狀其行。請留。不報。乃涕泣以送焉。

賀仁傑。字寬甫。京兆鄠人。從世祖征討。累功爲合州安撫使。至元十七年。上都留守闕。宰相擬廷臣以十數。皆不納。帝顧仁傑曰。無以易卿者。特授正議大夫。上都留守。兼本路總管。開平府尹。累加榮祿大夫。中書右丞。留守如故。尙書省立。桑哥用事。奏上都留守司錢穀多失實。召留守忽刺忽耳。及仁傑廷辨。仁傑曰。臣漢人。不能禁吏戕姦。致錢穀多耗傷。臣之罪。忽刺忽耳曰。臣爲長。印在臣手。事未有不關白而能行者。臣之罪。帝曰。以爵讓人者有之。未有爭引咎歸己者。置勿問。仁傑在官五十餘年。爲留守者居半。車駕春秋行幸。出入供億。未嘗致上怒。大德九年。年七十二。請老。拜光祿大夫。平章政事。



商議陝西行中書省事。以子勝襲上都留守。虎賁親軍都指揮使。卒。贈儀同三司太保上柱國。追封雍國公。諡忠貞。延祐六年。加贈太師。追封奉元王。

元史

本傳

尙野。字文蔚。滿城人。大德六年。遷國子助教。諸生入宿衛者。歲從幸上都。丞相哈剌哈孫。始命野分學於上都。以教諸生。仍鑄印給之。上都分學自野始。俄陞國子博士。誨人先經學而後文藝。謂諸生曰。學未有得。徒事華藻。若持錢買水。所取有限。能自鑿井及泉而汲之。不可勝用矣。時學舍未備。野密請御史臺。乞出帑藏所積。而大建學舍。以廣教育。歷官國子祭酒。卒。諡文懿。

元史

本傳

葉盛。字與中。崑山人。正統十年進士。授兵科給事中。土木師覆。諸將多遁。盛



率同列。請先正扈從失律者罪。然後選將練兵。爲復讐計。郕王即位。例有賞賚。盛以君父蒙塵。辭不許。推右參政。督餉宣府。尋以李秉薦。協贊都督僉事。孫安軍務。初安嘗領袖獨石馬營龍門衛所四城備禦。英宗旣北狩。安以四城孤懸塞北。奏棄之。內徙。至是建議修復。仍以命安。盛與闢草萊。修廬舍。庀戰具。招流移。爲行旅置煖舖。請帑金買牛千頭。以畀屯卒。立社學。置義塚。療疾扶傷。兩歲間。四城及赤城鵬鶚諸堡。次第修復。皆完城。憲宗立。遷左僉都御史。巡撫宣府。復舉官牛官田之法。墾田四千餘頃。以其餘積市戰馬千八百匹。修屯堡七百餘所。邊塞益寧。獨石鎮守內官進保貪暴。盛劾奏之。累進吏部右侍郎。盛清修積學。志在君民。不爲身計。有古大臣風。卒。諡文莊。祀昭德祠。



方逢時。字行之。嘉魚人。嘉靖進士。隆慶初。改宣府口北道。萬曆。總督宣大山西軍務。始逢時與前任宣大總督王崇古共決大計。招徠俺答。至是復代王崇古。乃申明約信。兩人首尾共濟。邊境遂安。逢時巡口北時。親行塞外。自龍門盤道墩以東。至靖安堡山梁。一百餘里。形勢聯絡。嘆曰。此山天險。若修鑿。北可達獨石。南可援南山。誠陵京一藩籬也。及赴陽河道。居庸出關。見邊務修舉。欲并遂前策。上疏曰。獨石在宣府北。三面臨敵。勢極孤懸。懷永與陵寢。只限一山。所係尤重。其間地本相屬。而經行之路。尙在塞外。以故聲援不便。若設盤道之險。舍迂就徑。自龍門黑峪。以達寧遠。經行三十里。南山獨石。皆可以朝發夕至。不惟拓地百里。亦可漸資屯牧。于戰守皆利。遂與巡撫吳兌。經營修築。設兵戍守。累進兵部尙書。加少保。告歸。御書盡忠字賜之。逢時才



略明練。處置邊事。皆協機宜。其功名與王崇古相亞。稱王方云。

劉象瑤。字君岫。四川富順人。分巡口北。見墩台亭障多頽。戈甲器具不精。力爲教舉。時方市馬。瑤約束嚴整。不令滋事。常借大司農白金萬兩。爲糴本。歲權之以市鐵。弗置官冶。即於產鐵處所。令置輪焉。其他心計率類是。萬曆間。巡按吳亮。析龍門衛所爲二學。而廩員不加多。瑤置學田餼之。善九章法。左手握算。右手操觚。不差圭撮。性廉潔。布衣蔬食。泊如也。初以戶部郎。司餉易水。朝廷嘉其節。已兩賜書勞焉。

李光玉。字公亮。湖廣應城人。康熙歲甲寅。吳逆之變。仗劍從軍。攻辰龍關。紀功。鎮守備陳某。爲苗人朝王擄去。光玉單騎詣苗砦。曉諭之。朝王心折。款居三日。以陳守備歸。卽補鎮守營千總。俸滿引見。騎射稱善。陞任龍門所守。



備訓練嚴整。總鎮康泰。特加題薦。

羅毓祥。字秉直。湖南長沙人。光緒三十二年來任。慈祥悲惻。體恤民隱。敬教勸學。不遺餘力。赤城舊有大行店。司斗抽捐。供應官府。擇農民輪班充任。官府目爲利藪。農民虧累不堪。多有以之傾家者。公毅然去之。一縣稱頌。民國建元仍繼任。二年交卸。僑居天津。縣民愛戴不置。聞其歿。於縣城南門外龍王廟內。築羅公專祠。歲時致祀。

### 寶昌縣名宦

林茂亭。河南商水縣人。前清附貢生。字子青。知府銜。候補直隸州知州。民國五年五月間。察哈爾全區墾務總局。呈准設立兩翼牧場清丈行局。清理私墾各地。林被委來寶。成立清丈行局。於閃電河右翼所屬馬政局內。九月間。



因房屋不敷分住。行局又遷回太僕寺牧政公署。清丈行局於七年一月。改爲寶昌招墾設治局。復被委爲招墾設治局局長。民國九年十月間。奉調商都縣知事。在任三年。清丈牧場地。創辦設治局。建築縣署監獄。放墾兩翼。及正白旗蒙荒。劃撥多倫張北沽源三縣地畝。風塵跋涉。經營墾畫。賢勞足多。寶昌縣之成立。未始非其功。飲水思源。至今人民猶愛戴不置也。

### 商都縣名宦

郭成鈞。安徽滁縣人。本縣設治局局長也。在設治伊始。地本蒙荒。蒿萊滿目。政令所自出之縣署。及學校警察所營房等。均付缺如。君日夜經營。斬荆棘。披草萊。於一年之內。次第落成。嗣爲防衛城垣計。開濬壕溝。十有二里。至此商邑廨署粗具。守衛有所憑焉。民國六年。撫匪朱成章。倉猝叛變。與鉅匪盧



占魁聯合。迫近縣城。朝不保夕。君親冒鋒鏑。往見匪首。曉以大義。不令其殘害生靈。一面星夜請兵援救。迨兵到而匪已遠竄。商民得免塗炭。至今頌之。范茂松。山西繁峙人。民國十九年。任本縣縣長。時值連年荒歉。土匪蠭起。城多倒塌。池亦淤塞。警團不滿百名。素乏訓練。商民畏禍至之無日。人心惶惶。范悉心規畫。毅然重新築城。請准上司。於無可設法之中。不加捐。不派款。籌銀幣五千餘元。重建城垣十有餘里。蓋即由城基地加價。以作是項經費也。並捐俸七百元。領地十方。以爲紳商倡。會年來匪患雖烈。縣城商民。得以安枕無憂者。實范賜也。

### 康保縣名宦

張孝沆。字冠生。豫省固始人也。倜儻不羈。善飲工詩。尤精篆石。有名士風。民



國十六年來宰是邦。適值地方不靖。晉兵突變。邑紳驚逃。頗涉嫌疑。上擬以叛逆罪之。令君查辦。君以前曾涖康。知邑人素皆安分。非好事者流。豈敢思叛。下車後。先召逃紳歸。接以禮。曉以義。辦理善後。措置悉當。不數日。恢復原狀。事平。未罔一人。康保匪警時聞。出沒無常。又地當張庫孔道。巨商來往運貨。多出其途。貨價約值百萬。因匪阻道途梗塞。電請商會出資。邀軍護運。竇旅一營接護。道經康城。駝馬盈千。宿城內外。人民供給。計費千元。紳言請款於公家。以減輕人民負擔。慨應之。遂到省垣。向商會交涉。賠償一千三百元。悉數分給民商。其惠及閭閻。非淺鮮也。既而大赦令下。公則折獄如神。量爲減等釋放。嗣因公晉省。委科長黃衡府君代拆代行。突遇政變。奉軍退却。晉軍進入。團丁譁變。警士驚奔。城無一兵。匪冒軍入城炸獄。既去。復欲攻城。黃



君乃收集團丁。奮勇夾擊。斃匪十餘。城得保全。是雖黃君督率之力。要亦張  
知人善任之功也。及張返康。報賞有功。無不備至。在任八月。政績昭彰。凡屬  
康民。有口皆碑。藉非公勤政愛民。德化感人。曷足以語此。

查貴奇。字勳甫。安徽人。十四年三月一日任職。到任之九月。以地方應設之  
機關。財政則有公款所。教育則有勸學所。捍禦則有保衛團。公安則有警察  
所。規模俱備。因呈准改進計畫。到任不過二載。凡利於民者。極意振興。病於  
民者。竭力革除。凡百庶政。次第悉舉。對教育尤提倡不遺餘力。心懷坦白。時  
以廉潔自守。以故無苛斂。無搜剝。嗣因調任。邑民呈請挽留不准。因送公正  
廉明匾額。作永遠紀念云。

流寓



萬全縣流寓

傅字香。字小林。原不知爲何省人。於清同治初年。由山西來萬。傾囊貨馬。資斧告竭。幾作路旁之餓殍。幸遇龍池屯富翁杜芳者。識爲俊傑。待以上賓。先生學業宏富。兼通醫術。後在李公映泉家中。設帳授徒。負笈來學者。頗稱一時之盛。本邑後起之秀。多出其門下。經映泉公擇姻婭中。謹厚之女而妻之。生子二女一。乃置田畝。購廬舍而家焉。先生臨卒時。始告衆徒真姓名。喬其姓。秋桂其名。向之傅姓。從外祖也。

蔚縣流寓

北魏

陸麗。東平王侯子也。少以忠謹侍左右。爲南部尙書。世祖崩。南安王余立。爲



宗愛所弑。百僚憂惶。莫知所立。麗以高宗世嫡之重。民望所係。首建大議。迎立之。社稷獲安。興安初。封平原王。遷侍中。撫軍大將軍。司徒。公固辭不受。好學愛士。常以講習爲業。其所待皆篤行之流。士多歸之。和平元年。高宗崩。時療疾於代郡溫泉。即蔚縣東五臺之湯浴寺。聞諱欲赴。左右止之曰。宮車晏駕。王德望素重。奸臣若疾民譽。慮有不測之禍。願少遲回。麗曰。安有聞君父之喪。方慮禍難。不即奔波者。遂便馳赴。乙渾尋專朝政。忌而害之。顯祖甚追惜。謚曰簡王。按北史陸俟代人。其祖引世。領部落。從道武征伐。有戰功。其時元魏都代。在今平城。蔚爲古代地。亦不過彼時之一邊邑。史傳稱陸俟。雖爲代人。不敢斷定其必爲蔚產。故不列於鄉賢。至列麗於流寓。居斯地。流風餘韻。有可令人思者也。



明

朱謙。夏邑人。宣德元年。以北征功。由指揮使進萬全都指揮僉事。正統六年。與參將王眞。巡哨遇敵。連擊敗之。八年。與楊洪破兀良哈於克列蘇。累功進都督同知。帝北狩。也先擁帝至宣府城下。令開門。謙與參將紀廣。御史羅亨信。不應。遂去。尋代楊洪鎮守宣府。景泰元年五月。敵入犯。謙率兵禦之。次關子口。數千騎突至。拒之鹿角。火器擊之。少卻。如是數四。謙退軍。敵復追之。都督江福來援。失利。謙軍亦傷。卒力戰卻敵。踰月。敵二千騎。復南侵。遣都指揮牛璽等禦之。戰南陂。謙見塵起。率參將范廣等馳援。自巳至午。敵敗遁。論功封撫寧伯。敵屢擾宣府大同。意二城可旦夕下。而謙守宣府。郭登守大同。數以羸師挫其勁騎也。先知邊城難犯。始有還上皇意。明年卒於鎮。成化中。謚



武襄子永。

永字景昌。既嗣爵。分領宣威營。改督團營。成化二年。荆襄盜劉通作亂。永與尚書白圭討平之。阿羅寇延綏。永偕都御史王鉞。都督劉玉。劉聚等。出擊。大敗之。牛家寨。明年復敗之。混忽都河。十九年秋。小王子大入邊。宣大告急。以永爲鎮朔大將軍。督諸將周玉。李瑄等擊敗之。永治軍嚴肅。所至多奏功。前後八佩將軍印。內總十二團營。掌都督。累進保國公。賜世襲。加太保。宏治九年卒。追封宣平王。諡武毅。子暉襲爵。總督京營。加太保。暉子騏襲。出鎮兩廣。以軍功加太師太保。

李因篤。字天生。富平人。博窮載籍。踐履篤實。與李中孚齊名。號關中二李。嘗至蔚。以詩謁敏果公。相與論學。康熙己未。舉博學鴻詞。授檢討。以養母乞歸。



敏果送以詩。有蔚蘿曾與談經史。今日方看實踐時之句。又馬爾楹者。字構斯。從容城孫徵君遊。聞敏果講學。自蘇門徒步至。執弟子禮。甚謹。敏果館之家。其歸也。爲作如晤語貽之。

寒松堂文集

徐化溥。字雲門。陽高人。博學工文。嘗輯雲中郡志。與魏敏果公友善。每至蔚。必主其家。以古學相切磨。敏果家譜其所定也。簡札往來。詩篇唱和。殆無虛日。年八十。以歲貢終。著有勉言集。雲門集。敏果爲序而行之。

寒松堂文集

羅星斗。天鎮人。順治初。授徒蔚之千勝。稱人經師。後膺十年選拔貢生。官濼縣知縣。既解組。因入蔚籍。築室於千勝。而終焉。

牛冲雲。字凌霄。榆林人。嘗官蔚州參將。樂其風土。遂占籍焉。家世以武功顯。冲雲獨嗜文墨。今其子孫猶遵其教云。時有杜坦者。字易之。亦榆林人。曾官



守備康熙初遊蔚。後賣宅會子里。入縣籍以終。性慷慨。喜施予。年至九十五歲。人咸以耆舊推之。

梁毓奇。字發秀。廣靈人。居蔚縣者四世矣。毓奇有學行。後進多從之遊。經其指授。各有成就。而立品端方。尤爲一時所重。以歲貢終。

聶源。宣化人。官武昌同知。後攝蔚州知州。有惠政。既老。僑居於蔚。康熙二十一年。有修學之役。源與衛人李雲華。實倡舉焉。

劉涵。字湛菴。榆林人。官絳州知州。其子世模。娶李尙書女。以節著。涵既解官。遂家於蔚焉。涵工書。在官甚有廉聲。以事偶過絳。老幼歡迎。堅請停驂。持紙筆索書。謁門下者。日絡繹不絕。

董友筠。字柯亭。滄州人。嘉慶甲戌進士。道光初主講文蔚書院。激誘後進。務



爲實學。從之遊者。多有所表見。後由知縣官至金衢嚴道。著有宦楚宦浙記略諸書。

汪振基。字良山。潁上人。道光中以翰林督學山西。丁酉拔萃。所得多知名士。差竣。供職史館。未幾乞養歸。粵逆之亂。避地北上。知州伊鏗額。延主書院。性和易。邃於文律。士翕宗之。後卒於宣化。殯蔚之園通寺。同治中。粵逆蕩平。蔚人爲賻歸其柩。

趙占鼇。字六峯。平定州人。歲貢。嘗應京兆試。不得志。以醫遊蔚。樂其風土。遂家焉。博覽多藝。精堪輿家言。而深自韜晦。有造請者。雖重幣弗往。曰。吾直以術爲寄耳。烏能爲人僕僕作葬師哉。劬學至老。手不停披。著有地學集要。醫奧義若干卷。六峯詩一卷。卒年七十。



徐嵩年。江蘇如皋人。子鈞。於同治三年任蔚州吏目。隨之任所。詞藻富麗。才思華贍。寓蔚三年。名勝古跡。多所題詠。其蔚州秋興。有烽銷榆塞無傳火。風逆桑乾有急流。襟帶紫荊誇劇郡。牛羊禾黍遍平疇之句。又謁忠武廟。有自昔軍威震河朔。於今廟食在燕雲之句。尤工書法。隻字片紙。人爭寶之。

宣化縣流寓

金

夾谷土刺。字大用。上京阿懶路人。泰和三年進士。由撫寧海濱主簿。歷官武寧軍節度副使。興定初。拒宋兵於泗州。以功遷兩階。四年召爲戶部員外。轉刑部。遷郎中。元光初。授京南路司農少卿。正大初。擢裕州刺史。改睢州。四年。授同知中京留守。兼同知金昌府事。改汝州防禦使。又改陳州防禦使。超授



同知開封府事。正大六年。授武寧軍節度。兼徐州管內觀察河防等使。行樞密院事。踰年告歸。初貞祐時。宣宗南遷。土剌留次子斜烈於北。後任元官。先鋒使。金亡。斜烈奉朝命迎土剌北歸。居於宣德。土剌以身見代。謝愴然傷懷。居常倍自貶損。時貴有欲謁見者。皆不得通。惟與渾源魏邦彥爲文字友。後五年卒。葬永興縣王家堡西北原。

詳見藝文。

周昂。字德卿。真定人。年二十二擢第。調南和簿。有異政。遷良鄉令。入拜監察御史。路鐸以言事被斥。昂送以詩。語涉謗訕。坐停銓。久之。起爲龍州都軍。以邊功復召爲三司官。大安兵興。權行六部員外郎。其甥王若虛嘗學于昂。昂教之曰。文章工于外而拙於內者。可以驚四筵。而不可以適獨坐。可以取口稱。而不可以得首肯。又云。文章以意爲主。以言語爲役。主強而役弱。則無令



不從。今人往往驕其所役。至跋扈難制。甚者反役其主。雖極詞語之工。而豈文之正哉。昂孝友喜名節。學術醇正。文章高雅。諸儒皆師尊之。坐詩得罪。謫十數年。始入翰林。言事愈切。出佐三司。非其所好。從宗室承裕軍。承裕失利。跳走上谷。衆欲徑歸。昂獨不從。城陷。與其從子嗣明同死於難。金史本傳。嗣明字晦之。短小精悍。有古俠士風。年未三十。交遊半天下。識高志大。善談論。而中節。詩簡澹溫麗。最長義理之學。試于府。于禮部。俱第一。擢第。主涑水簿。從其叔北征。得還。不忍去。蓋嗣明文字不及其叔。而理性過之。嘗謂學不至邵康節。程伊川。非儒者也。其說類此。金李純甫屏山故人傳

元

歸陽。字彥溫。汴梁人。學無師傅。而精敏過人。登至順元年進士。授同知穎州。



轉大都儒學提舉。未上。後至元五年。杞縣人范孟謀不軌。詐爲詔使。殺河南行省平章。月魯帖木兒不花等。詔官屬及去位者。署而用之。暘時在汴。賊召使北守黃河口。力拒不從。賊怒。繫之獄。尋以賊敗獲免。同里有吳炳者。嘗以翰林待制。徵不起。至是污僞命。時人爲之語曰。歸暘出角。吳炳無光。自此名譽赫然。明年拜監察御史。及入謝。臺臣奏曰。此即河南抗賊者也。帝曰。好事卿宜數爲之。賜以上尊。已而辭歸養親。至正五年。除僉河南廉訪司事。六年。轉僉淮東。七年。遷右司都事。順江酋長求內附。請立宣撫司。置郡縣。暘曰。古人有言。鞭雖長。不及馬腹。使郡縣果設。有事不救。則孤來附意。救之則罷中國。所謂獲虛名而受實禍也。與左丞呂思誠抗辨甚力。丞相伯顏笑曰。歸都事善。然其策果將焉出。暘曰。其酋長可授宣撫。弗責其賦稅。使者賜以金。



帛遣歸足矣。卒從暘。京師苦寒。有丐訴於丞相馬前。丞相索皮服予之。且覈在官皮服。將悉給貧民。暘曰。宰相當以廣濟天下爲心。皮服之給能幾何。不若錄寒饑者稍賑之耳。丞相悟而止之。湖廣行省沙班卒。其子沙的爲中書椽。請奔喪。丞相以有兄弟不許。暘曰。孝者人子之同情。以其有兄弟而沮其請。非以孝治天下也。遂從之。八年。陞左司員外。中書用其言。損河間餘鹽五萬引以裕民。又諫以楮幣易銀實內藏。尋遷參議樞密院。時江浙行省朵兒只丹討方國珍。兵敗爲所獲。國珍遣人從朵兒只丹走京師。請降。暘曰。國珍敗我王師。又拘我王臣。力屈而來。非眞降也。必討之以令四方。朝廷事姑息不從。後果屢叛。九年。進禮部。會開端本堂。皇太子就學。召爲贊善。暘言師傅當與皇太子東西相向授書。不然。師道不立。卒從其議。尋以疾辭歸。在上都。



曰脫脫自甘州還將入相屬賜草詔賜不可後屢遷參知政事刑部尙書不就十七年授集賢學士興疾至京不起上三策曰振紀綱選將材審形勢塵  
甕數千言時不能用乃以資德大夫致仕僑居宏州徙蔚州又徙宣德二十  
七年卒

府志

清

李良年字武曾浙江嘉興人康熙初來遊宣府主鎮人胡大令以溫家良年  
學瞻文逸負海內望在其鄉時與秀水朱彝尊錫鬯嘉興譚吉璠舟石諸子  
齊名而其兄繩遠字斯年弟符字分虎皆有聲于時號禾中三李康熙己未  
舉博學宏詞科罷歸隱於鄉所著有秋錦山房集

府志

張元懷字莘田寄籍宣化縣康熙戊子科舉人癸巳恩科進士由翰林院改



授工科給事中。戶科掌印給事中。巡察河外。轉廣西按察司使。陞授廣西布政司使。調安徽布政司使。署河南巡撫。以事降甘肅安西兵備道。尋被召。卒於京。公少讀書有大志。官翰林。不屑屑雕蟲小技。受世廟知遇。置言路。挺拔自立。思所建白。會巡視中州時。田公文鏡總制河東。文飾吏治。察屬安民。稱爲天下最。公入境。則劾守土官之不職者數人。又以河南歲連歉。奏請截漕米十萬石。備賑糶。田公力持之。公奏蒙報可。田公銜焉。後署河南撫篆。多反田公政。解篆回浙。田公摭拾其事。屢劾之。皆蒙恩鑒。最後以故出人罪。題參部議降職。公所至務以寬大持政體。廣西積獄千百人。淹滯經年。瘐死無算。公至。奏請盡出之。分別案結。數日囹圄爲空。

府志

延慶縣流寓



葛九調。原籍無考。官山東省兗州府知府。厲延慶。樂善好施。縣城西南角。築有遂道。至今尙存洞門。在縣城三皇廟殿後。西街西頭西大寺。舊有葛公祠。已坍塌。葛公泥像。現在寺內。縣城上帝廟。有葛九調碑。

陳漢。原籍遼寧鐵嶺人。鑲紅旗。清順治年。流寓延慶縣城北三里河村。教子有方。致世代子孫。文武科目。代不乏人。陳登甲爲候補道。陳廷杰丁酉科舉人。任廣東糧儲道。陳廷墉任雲南大關同知。陳廷銓清太學生。陳式平任江南淮安府桃北同知。陳階平候選州同。縣城北里許。有陳氏墓。誌碑書撰可考。

### 懷來縣流寓

陳光甲。字瀛舫。蓬萊人。清咸豐癸丑進士。爲沮陽書院山長。好學工書。尤長



於時藝性敦樸。因材善誘。經其指授者。多通品。旋以庶常候散館。歿於京寓。有手臨靈飛經一冊。賞識家寶惜之。擬刻石以公所好。惜飄零寓所。不可尋覓矣。其餘零星遺墨。多存諸弟子家。士林咸楷式之。

涿鹿縣流寓

沈鍊。浙江紹興人。嘉靖戊戌進士。由溧陽令。調荏平。尋補清豐。行取錦衣經歷。以建言謫戍保安。忤嚴嵩。被殺。長子襄。白父冤。尋蒙卹錄。贈光祿寺卿。蔭一子。入監讀書。詔立祠保安。春秋祀之。變以保安諸生。久次膺貢。上春官。歷刑部郎中。姚安知府。乞恩侍母。廕讓與弟。表及襄子成立。表復具奏。歸廕其侄。忠孝友愛。萃於一門。姪孫良卿。俱籍本州。食餼於庠。恩生存德。任太僕寺主簿。



顧存仁。南直蘇州太倉州人。由進士任禮科給事。以建言謫戍保安。尋起用。累官太僕寺卿。官爲建祠於州衙西。歲有祀典。祠則火於明崇禎甲戌之變。龍關縣流寓。

徐渭。字文長。浙江山陰人。九歲能文。年十餘。倣楊雄解嘲。作釋毀。二十爲諸生。胡宗憲總督浙江。招置幕府。筦書記。渭與約。當具客禮。非時不得出入。乃葛衣烏巾。長揖就坐。縱談天下事。時獲白鹿。將表獻。渭具藁以進。表上。世宗大悅。宗憲益重渭。時督府勢嚴重。文武吏庭見。無敢仰視。而渭以部下一諸生傲之。然亦矯節自好。無所請求。好奇計。譚兵多中。凡誘繫汪徐諸巨寇。渭皆與謀。及宗憲罷職。渭縱遊金陵。居京師者數年。北客於上谷。窮覽朔漠。所見山奔海立。沙起雲行。風鳴樹偃。幽谷大都。人物魚鳥。一切可驚可愕之狀。



一一達之於詩。如嗔如笑。如水鳴峽。如豆出土。如寡婦之夜哭。羈人之寒起。當其放意。平疇千里。偶爾愴懷。鬼語秋墳。時所謂達官貴人。騷人墨客。渭皆叱而奴之。卒發病棄歸。日閉門。自郡守丞以下。求與見不可得。晚絕穀食十餘年。曰吾噉之久。偶厭不食耳。年七十三卒。渭爲人度於義無所關係時。輒疏縱不爲儒縛。一涉義所否。雖斷頭不可奪。爲文不拘定體。賦情大小畢備。書疏宛約精麗。不類其爲人。行草書尤奇偉。自言書第一。詩二。文三。畫四。所著文長集。闕編。櫻桃館集。及註莊子內篇。參同契。黃帝素問。郭璞葬書。各若干卷。四書解首。楞嚴經解各數篇。渭父總以戍籍。領貴州鄉薦。任至夔州府同知。渭貌修偉。肥白。朗然如唳鶴。常中夜呼嘯。有羣鶴應焉。二子枚。枳。按徐文長。北遊上谷。遠覽沙漠。及披遺文。考其歲月。蓋禹宣府者。歷冬徂夏。而龍



門之朝陽洞。八里莊題詩在焉。蓋棲遲寒谷。杖履所經者。非伊朝夕。不比驅車過之者。借光流寓。確有可徵。豈徒私鄉之前輩乎。

李思鄴。字長源。浙江會稽人。幼即思爲名宰相。又時有乘霞餐玉之想。謁鄉先生秦太史宗游。一見奇之。以爲此偉器。宜在木天視詔草。非塵埃中物。康熙庚午春。受知於學使周太史清原。歷試輒高等。以課讀爲養。事繼母能孝。教諸弟皆成立。雖居城市。足跡不一至公室。厭遠機變詐力。事事以和厚爲本。能盡脫鄉閭囂競氣。紹邑多才雋士。多遊歷四方。長源獨潛修篤志。安里閉自適。年四十。舉乙酉孝廉。始以計偕來京師。丙戌會試不第。爰下帷龍門。志益勵。精舉子業。期進取。每示家人以司馬題橋之意。爲人淵靜沉默。謙退不矜伐。與人交始若淡漠。不欵曲。久而愈懇篤。賦詩坐酒時。談諧雅謔。終能



自持擇。不至流蕩。故四方至者。知名士多與訂肺腑交。縣令章燁修邑志。長源實襄厥事。搜討舊聞藏帙。及躬所歷山川道路祠廟招提。凡斷碑荒碣。無不採掇收拾以爲常。又志在表善。凡貞臣孝子悌弟義夫節婦。及他一言一行可譔錄。務俾微蹟昭著而後快。其爲文與詩。皆力趨雅正。不求怪險。故論者以爲有廟堂清貴之氣。由文以下其遇。石渠金匱。當高置一坐云。

林盛。字大林。號海岳。楚黃陂人。父廸夏先生。德藝冠時。江黃士大夫爭延爲師。海岳隨學。歲己酉庚午間。文氣油滑。輒厭薄棄去。惟究心程朱之學。迫於父命。乙卯始赴道試。試輒以七藝冠軍。爲諸生。屢試前茅。而尤受知於葉忠烈公。拔爲八郡第一人。乃屢赴棘闈不第。以明經終。客燕爲簡藩師九年。端介勤慎。講說皆正誼明道之言。人以爲賈董再見。性好吟詠。亦嗜山水。凡生



平足跡半天下。舉所閱歷。皆發爲詩。有此遠堂詩集文集若干卷。生平學窮理奧。留心經濟。嘗言井田不必泥古。要以限田爲主。八股取士。法乖習敝。須復鄉舉。僧道亦不必火書焚居。止禁其披剃。不許民間作佛事。供香火。自然漸滅。又俗移風易。如倡優色目人等。淫巧貨物諸項。惟禁之自上。正本澄源。乃可斷絕。諸如此類。著有經世錄。雖未卒業。人以爲名言。其抱性醇靜。不立崖岸。居恒以名書讀不盡。名士交不盡。名山遊不盡。爲三憾。故日孜孜。惟恐虛度歲月。晚欲歸侍親養。廼夏先生以健飯。遣之重遊燕北。因出居庸。與戚友盤桓。凡宣郡志乘。多其修輯云。

赤城流寓

元



劉秉忠字仲晦。邢臺人。家貧。性豪爽。不羈。為府令史。既而棄去。隱武安山。尋為僧於天寧寺。往來雲中。元世祖在藩邸。召僧人海雲。邀秉忠與俱。應對稱旨。大愛之。凡征伐謀議。皆與。上書數千言。世祖皆嘉納焉。從征大理雲南。每贊以天地之好生。又從伐宋。全活甚衆。即位後。問以治天下之大經。拜太保。預中書省事。以天下為己任。凡所甄拔。後悉為名臣。一代成憲。皆自秉忠發之。精術數。占事若合符契。十一年扈從至上都。赤即元之上都路其地有南屏山。

山在獨石口南四十里。赤城北六十里。在三山堡西北一里許。三山並峙。如列屏然。築精舍居之。秋八月。無疾端坐而卒。帝聞驚悼。贈太傅。封趙國公。謚文貞。

事見元名臣言行錄。

廉希憲字善甫。畏吾人。篤好經史。手不釋卷。一日方讀孟子。聞召。急懷以進。世祖問其說。遂以性善義利仁暴之旨為對。世祖嘉之。目曰廉孟子。由是知



名世祖即位。以希憲爲京兆四川道宣撫使。進中書右丞。行秦蜀省事。討平  
渾都海阿藍答兒。進拜中書平章政事。賜宅一區。至元元年。丁母憂。率親族  
行古喪禮。勺飲不入口者三日。慟則嘔血不能起。寢臥草土。廬于墓旁。宰執  
以憂制未定。欲極力起之。相與詣廬。聞號痛聲。竟不忍言。未幾。有詔奪情起  
復。希憲雖不敢違旨。然出則素服。入必纓絰。及喪父。亦如之。方士請煉大丹。  
勅中書給所需。希憲具以秦漢故奏。且曰。堯舜得壽。不因大丹也。帝曰。然。遂  
卻之。時方尊禮國師。帝命希憲受戒。對曰。臣受孔子戒矣。帝曰。孔子亦有戒  
耶。對曰。爲臣當忠。爲子當孝。孔子之戒。如是而已。七年。罷政居家讀書。不復  
求進。十一年。詔起爲北京行省平章政事。十二年。右丞阿里海牙下江陵。請  
命重臣開大府以鎮之。帝急召希憲還。使行省荆南。詔令承制授三品以下



官希憲至鎮。即日禁剽掠。通商販。興利除害。兵民安堵。先時江陵城外蓄水。扞禦。希憲命決之。得良田數萬畝。以爲貧民之業。發沙市倉粟之不入官籍者二十萬斛。以賑公安之饑。大綱旣舉。乃曰。教不可緩也。遂大興學校。選教官。置經籍。旦日親詣講舍。以厲諸生。西南溪洞。及思播田楊二氏。及重慶制置趙定應。俱越境請降。十四年。以江陵濕熱。疾久不愈。召還。江陵民號泣遮道留之。不得。相與畫像建祠。希憲還。囊橐蕭然。琴書自隨而已。帝知其貧。特賜白金五千兩。鈔萬貫。五月至上都。太常卿田忠良來問疾。希憲謂曰。上都聖上龍飛之地。天下視爲根本。近聞龍岡遺火。延燒民居。此常事耳。慎勿令妄談地理者。感動上意。未幾。果有以徙置都邑事奏者。中書左丞張文謙等。力言不可。帝不悅。明日召忠良質其事。忠良以希憲語對。議遂止。詔徵揚州



名醫王仲明視希憲疾。服其藥。能杖而起。帝喜。謂曰。卿得良醫。疾向愈矣。對曰。醫持善藥以療臣疾。苟能戒慎。誠如聖諭。設或肆情。良醫何益。蓋以醫諷諫也。十六年。詔復入中書。希憲稱疾篤。戒其子曰。丈夫見義勇爲。禍福無預於已。謂臯夔稷契伊傅周召爲不可及。是自棄也。天下事。苟無牽制。三代可復也。又曰。汝讀狄梁公傳乎。梁有大節。爲不肖子所墜。汝輩宜慎之。十七年十一月十九夜。有大星隕於正寢之旁。流光照地。久之方滅。是夕希憲卒。年五十。大德八年。贈太師上國柱。追封恒陽王。諡文正。

元史本傳。

### 商都縣流寓

劉蔭榛。字西銘。河北任邱人。民國十四年。任本縣知事。鑒於民智未開。文化落後。竭力整頓學校。提倡社會教育。建築民衆講演所。附設閱報室。每日下



午後督同講演所長張傑。在街衢繁華之區。擇可警世牖民之往事。露天講演。一年之間。未嘗少懈。解組後。寄居斯土。襄辦地方公益事宜。二十年。任教育局長。以女子不學。不能相夫教子。因募款數百元。爲建女校一所。不費公帑。而學舍成。女學興。熱心毅力。有足多焉。



